

Ka Mgo Hinang to Mgo Apustulis ni Hisu-Kristu

Umajamnon

Ka Mgo Hinang to Mgo Apustulis ni Hisu-Kristu

First Edition

(Umajamnon)

Manobo Bible Church Association of Mindanao

2007

OMF International

Ka Mgo Hinang To Mgo Apustulis ni Hisu-Kristu

1 ¹Su-un Tiypilu, ka nauna no sulat ku insulat kud ka tibo no pigpanhinang dow ka inpan-anad ni Hisus likat pad to pogpu-una din to hinangon din ^{2,3} hantud to piglibong on kandin diya to langit. Pogkaponga to kamatajon din dow to pogkabanhow, mahan-in timpu no nigpa-aha kandin duon to mgo apustulis din to pogpamatu-ud no nabanhow kandin likat to kamatajon. Taman to kapatan no arow nigpa-aha si Hisus kandan dow pig-ikagihan din kandan mahitongod to pogpanguu to Diyus. Dow no wara pad kandin libonga diya to langit, duon mgo tumanon no imbilin din duon to pigpili din no mgo apustulis. Sikan no mgo tumanon imbogoy rin pinabaja to gahom to Bala-an Ispiritu. ⁴Songo arow to sikan aman no kamuu ogko-on si Hisus duma to mgo apustulis din nig-iling kandin, "Kona kow pad on laguy kani to Hirusalim. Tagari now pad ka Bala-an Ispiritu no insa-ad to Diyus no Amoy, no innangon kud on iyu tagna. ⁵Namawutismu si Huwan to wohig, di konad no makapila ogbawutismuhan kow to Bala-an Ispiritu."

Ka poglibonga ki Hisus diya to langit

⁶Songo arow to sikan, aman no nighimun kandan, pig-insa-an dan si Hisus, "Magbabaja, iyan on buwa soi ka timpu nog bakulion no og-isaba ka kapanguuhan to Israil?" ⁷Nigtabak si Hisus, "Wara mog-ujun ka Amoy nog kama-anan now ko kagan-u ogkatuman ka timpu to kahigtabananan. ⁸Di kog konsad on ka Bala-an ispiritu duon to iyu ogbogajan kow

kandin to gahom. Dow ipamatbat now ka mahitongod kanakon, dini to Hirusalim, to tibu-uk no gibanwahan to Hudiya dow to Samarya, dow to tibu-uk kalibutan."

⁹Pogkaponga rin to pog-ikagi to sikan, piglibong on kandin diya to langit. Aman no kamuu ra'g aha-a kandin no piglibong, pigdagponan on kandin to gabun dow nahanow dajun kandin.

¹⁰Aman no kamuu pad kandan ogloonghag diya to langit, ingkahigpat dan on no duon daruwa no lukos no nigtingdog duon to dani ran no nigsasabinit to maputi. ¹¹Dow nig-ikagi ka daruwa no lukos kandan, "Iyu no matig-Galilya, manya tog titingdog kow pad kani nog manloonghag diya to langit? Ka Hisus no na-aha now no piglibong diya to langit ogliku da dini to kalibutan. Dow ko pig-amonu man to poglibonga kandin diya to langit, angod da ra-an to sikan to pogliku rin dini to kalibutan."

Nigpili ka mgo Apustulis ko hontawa ka igliwan dan ki Hudas

¹²Pogkaponga to sikan, namanliku ka mgo apustulis diya to Hirusalim likat to bubungan no Kaulibuhan. Sikan no bubungan mgo songo kilumitru ka kariyuon likat to siyudad to Hirusalim. ¹³Pogtiriow ran diya, nigponhik kandan duon to ikaduwa no andanas diya to baoy no pigdatongan dan. Soi iyan sing Pidru, Huwan, Santiyagu, Andris, Pilipi, Tumas, Bartulumi, Matiyu, Santiyagu no anak ni Alpiyu, Simun no nighiribildi tagna to Ruma, dow si Hudas no anak ni Santiyagu. ¹⁴Kunlajun kandan oghimun sug maman-ampu. Duma ran da-an ka pila no kabowbohiyan lagkos on si Mariya no inoy ni Hisus, dow ka mgo su-un din no mgo lukos.

¹⁵Songo arow to sikan, aman no nighimun ka songo gatos dow kaawa-an no tumutu-u, nigtindog si Pidru no nig-iling, ¹⁶"Mgo su-un, kinahanglan nog katuman ka pig-iling duon to Kasulatan no impanagna to Bala-an Ispiritu dow no nauna no timpu pinabaja ki Dabid. Mahitongod soini ki Hudas, no iyan nighindu to namandakop ki Hisus. ¹⁷Duma roy kandin no apustul no pigpili ni Hisus, dow bulig doy ra-an kandin to hinangon."

¹⁸(Di nigboli si Hudas to pasak no iyan din imboli ka saapi no napurut din duon to maro-ot no hinang, dow diya kandin nauug no taman-taman nakabugsok. Nigbodlas ka gotok din dow nakadas-ag ka bituka rin. ¹⁹Nama-anan soi to tibo no mgo otow to Hirusalim, kaling pigngaranan dan sikan no pasak to Akildama, no ka igpasabot to sikan, "Pasak no naangosahan.") ²⁰Nig-iling pad iyan si Pidru, "Nakasulat duon to mgo Salmu,

'Pabay-anan on ka pig-ugpa-an din, dow warad on ogpaugpaon diya.'

Dow nakasulat da-an,

'Nog pasokolihan to bugti ka katongdanan din.'

^{21,22}"Kaling, kinahanglan nog pili ki to saboka no otow no ig-isab ita no sampuu dow saboka no apustulis. Kinahanglan no saboka kandin no duma ta no apustulis ni Hisus no Magbabaja dow no kani pad kandin to kalibutan, likat to pogpamawutismu ni Huwan hantud to piglibong si Hisus diya to langit. Su kinahanglan no makatitigus kandin no duma ita mahitongod to pogkabanhow ni Hisus." ²³Kaling daruwa no lukos ka pigpilian dan: Si Matiyas dow si Husi no piglanulanuhan ki Barsabas (o Hustu). ²⁴Dajun naman-ampu

kandan, "Magbabaja, ikow ra ka nama-an to ginhawa to tibo no otow. Kaling ipakiyaa nu kanami ko hontaa to soi daruwa kag kapilian nu ²⁵no'g kahinang no apustul no igliwan ki Hudas. Su pig-ojowan ni Hudas ka katongdanan din no saboka no apustul, dow nig-andiya kandin to banwa no angajan kandin." ²⁶Pogkaponga ran to pog-ampu, nigbabaa kandan dow si Matiyas ka pig-ajunan nog makaliwan ki Hudas. Kaling si Matiyas ka in-isab duon to sampuu dow saboka no apustulis.

Ka pogkonsad to Bala-an Ispiritu

2 ¹Aman no katumanan on to arow to Pintikustis, nahimun ka tibo no mgo tumutu-u duon to songo baoy. ²Aman kamuu kandan nahimun, duon nigdawhinog no sibu ka to nighoros no hahagboti no kaamag. Nigpanikung-sikung duon to baoy no pighimunan dan. ³Dow duon nanga-aha ran no ogkangadila-dila no logdog no nig-untud to kara saboka kandan. ⁴Tibo kandan pigkonsaran to Bala-an Ispiritu, dow duon dajun impaikagi kandan to Ispiritu to mgo inikagihan no wara dan pad mama-ani.

⁵Sikan no timpu duon nig-ugpa no mgo diyusnon no mgo Hudiya duon to Hirusalim no niglikat to inggad hondo no gibanwahan to kalibutan. ⁶Pogkarinog dan to sikan dawhinog, nigpakilas kandan nig-andiya duon to nahimunan to mgo tumutu-u. Naboon on iyan kandan su ka kara saboka kandan nakarinog to tu-un din no inikagihan no pig-ikagi duon to mgo tumutu-u. ⁷Nig-iling kandan, "Hoy, kona buwa no tibo kandan matig-Galilya? ⁸Manya tog makaikagi man kandan to ita no inikagihan? ⁹Ka duma ta matig-Partiya. Duon mgo matig-Midiya, dow ka duma matig-Ilam. Duon matig-

Misuputamya, Hudiya, Kapadusya. Duon da-an Matig-Puntu dow Asya. ¹⁰Ka duma mgo matig-Pirigya, mgo matig-Pampilya, mgo matig-Ihiptu dow ka duma likat to mgo banwa no sakup to Libya no dani to Sirini. Duon da-an matig-Ruma, mgo Hudiyu, dow kona no Hudiyu no nasakup to tinu-uhan to mgo Hudiyu. ¹¹Dow ka duma likat to Krita dow Arabya. Di inggad kona'g a-angod-angod ka ita no inikagihan ogkarinog ta kandan nog ikagi to tibo tanow no mgo inikagihan mahitongod to kaboonganang no mgo pighinang to Diyus!" ¹²Naboong-boong on iyan ka tibo no mgo otow diya. Aman su kona ran ogkasabut ko nokoy ka nahitabu nigpamaw-insa-ay on puli ka kara saboka kandan, "Nokoy buwa soi?" ¹³Di ka duma puli ra nigwali-wali to mgo tumutu-u no nig-iling, "Ingad maka nangahubug da duon nog!"

Ka Pogpamatbat ni Pidru

¹⁴Kaling nigtindog si Pidru dow ka sampuu dow saboka no mgo apustulis dow nigbansagon kandin duon to mgo otow, "Mgo su-un ku no mgo Hudiyu, dow iyu tibo no matig-Hirusalim, paminog kow sug hiluwasan ku iyu. ¹⁵Sajop ka iyu no pogdoromdom no nangahubug soini mgo duma ku su alas nuwibi pad soi to kasoomi. ¹⁶Iyan soi ka impanagna ni Juwil no tagailagan to Diyus to Diyus no nig-iling kandin,

¹⁷Nig-iling ka Diyus, 'To mahuri no mgo arow
igpakonsad ku to tibo no kaotawan ka
Ispiritu ku.

Ka iyu no mgo anak no lukos dow bohi
ogpamatbat to ikagihonon ku;

Dow ogpa-atawan ku kag kangabajow-bajow no
mgo lukos now;

Dow ogpamakaro-oton ku ka mgo manigoon now.

¹⁸Sikan lagboy no arow igpakonsad ku ka kanak
no Ispiritu to mgo suguanon ku no lukos dow
bohi,

Dow ogpamatbat kandan to kagihonon ku.

¹⁹Ogpa-aha a to kaboonganon no inggad nokoy
duon to langit dow duon to pasak: dow duon
langosa, hapuy dow maramoo no oboo.

²⁰Ogdiglom ka sog, sibu ka to langosa ka
buwan. Ogdiglokan soi to kona pad ogditirow
ka kaboonganon no arow to kahigtabanan to
Magbabaja.

²¹Di inggad hontawa nog sampit to Magbabaja
ogkalipwas.' "

²²Nigparajun si Pidru nig-ikagi, "Mgo su-un ku no mgo
kabuwaran ni Israel, paminog kow! Si Hisus no matig-
Nasarit impa-andini to Diyus ita, dow soi impakiyaa to Diyus
pinabaja to mgo tanhaga dow mgo kaboonganon no inggad
nokoy no pighinang din. Lagboy kow no nama-an to soi su
dini natuman to ita no banwa. ²³Nama-an on ka Diyus no si
Hesus igdihaa diya to iyu su planu rin on tahan soi.

Pigpahimatajan now kandin to mgo makasasaa no mgo otow
no iyan niglansang kandin diya to krus. ²⁴Di pigbanhow
kandin to Diyus dow piglipwas likat to gahom to kamatajon,
su ka tutu-u, inggad ka kamatajon kona ogmakataawid
kandin. ²⁵Su nig-iling taga si Dabid mahitongod kandin,

'Nama-anan ku no ka Magbabaja kunlajun
ogduma kanak dow wara a rin pabay-ani. Kaling
kona a ogkaiw-isdad. ²⁶Iyan soi ka inkaraga ku.
Dow kona kug kapagbo-otan ka pogdajan ku to
Magbabaja. Dow inggad pad kog kamatoy a,
duon pad pog-iman ku. ²⁷Su nama-anan ku no

kona a nu, ogpabay-anan diya to banwa to kamatajon. Kona nu ig-ujun nog kagasgasan ka matinumanon nu no suguanon. ²⁸Pighindu nu kanakon ka daan to untung, su ikow ka kunlajun ogduma-ruma kanak, naragadaga ad on iyan.' "

²⁹Dow nigparajun pad si Pidru, "Mgo su-un, kalaro amani no wara mog-ikagi si Dabid mahitongod to kandin no tu-un. Su nama-anan tad no ka ita no gin-apuan no si Dabid namatoy on dow inlobong dow, hantud pad kunto-on nama-anan ta ko hondoï kandin ilobong. ³⁰Tagailagan to Diyus si Dabid dow nama-an kandin no ka Diyus nigma-ad kandin no ka saboka no mgo kabuwaran din iyan ogmaka-angkon to kandin no kapanguuhan. ³¹Dow aman da-an su nama-anan ni Dabid ko nokoy kag hinangon to Diyus, nig-ikagi kandin mahitongod to pogkabanhow ni Kristu, no wara kandin pabay-ani diya to banwa to kamatajon, dow wara magasgasi ka lawa rin.

³²Warad bugti no impasabut din ko kona no si Hisus no pigbanhow to Diyus. Tibo koy namakasiyanta no nabanhow kandin su na-aha doy man iyan kandin. ³³Piglibong kandin dow impaingkud diya dapit to kalintu-u to Diyus. Dow imbogoy kandin to Amoy ka Bala-an Ispiritu no insa-ad kandin. Dow soini no Bala-an Ispiritu impakonsad kanami ni Hisus, dow ka kandin no gahom iyan sikan na-aha now dow narinog now kunto-on. ^{34,35}Kona no si Dabid ka piglibong diya to langit, di nig-ilng kandin,

'Kagi ka Diyus diya to Magbabaja ku, ingkud ka kani to kalintu-u ku, taman to igpamahuraa ku ikow ka tibo no mgo kablang nu.'

³⁶Kaling kinahanglan iyan nog kama-anan to tibo no mgo Israilinhun no ka Hisus no inlansang now to krus iyan ka

pigpili to Diyus no Magbabaja dow Kristu." ³⁷Aman no pogkarinog to mgo otow to sikan napanuuk ka ginhawa ran. Kaling nanginsa kandan ki Pidru dow to mgo karumahan din no mgo apustulis, "Mgo su-un nokoy ka angajan nog hinangon doy?" ³⁸Nig-iling si Pidru kandan, "Ka kara saboka iyu ogpangajumpu to iyu no mgo saa dow pabawutismu to ngaran ni Hisu-Kristu dow kag kapasaylu ka mgo saa now dow ogkakunsaran kow to Bala-an Ispiritu no gasa to Diyus. ³⁹Su ka Bala-an Ispiritu iyan man insa-ad iyu dow ka iyu no mgo kabuwaran dow to tibo no kaotawan no diya to mariyu, dow ka tibo nog sabihon to Magbabaja no ita no Diyus no ogdani kandin."

⁴⁰Mahan-in pad ka impamatbat ni Pidru to pogpamatu-ud to mgo batbaton din. Dow nig-iling kandin diya to mgo otow, "Palingkawas kow to soini mgo mangabagadbagad no kaotawan." ⁴¹Mahan-in ka namanu-u to impamatbat din dow duon dajun nigpamabawutismu kandan. Sikan no arawa mgo totowu no libu ka mgo otow no namakaisab to mgo tumutu-u. ⁴²Kunlajun kandan no nasaboka dow ungud kandan ogpaminog to pogpan-anad to mgo apustulis, dow to mgo pog-ampu, dow pogdomdom to kamatajon ni Hisus pinabaja to pogpanibag-tibag to pan

Ka pogpama-siwsiguruhay to mgo tumutu-u

⁴³Mahan-in no mgo tanhaga dow mgo kaboongan no pighinang to Diyus pinabaja to mgo apustulis. Kaling ka mgo otow duon pogtahud dow kaharok to Diyus. ⁴⁴Nigpama-siwsiguruhay ka mgo tumutu-u to daan to pogdapita dow ka mgo botang dan pigsawupungan dan. ⁴⁵Impamaligya dan ka mgo pasak dan dow mgo botang dow imbogoy ran ka halin

diya to mgo karumahan dan sumaa to pigkinahanglan to kara saboka. ⁴⁶Arow-arow nighihimun-himun kandan diya to timplu dow nigpamatiwtibagay to pan diya to mgo baoy ran. Amani ka karaga dan no nigsasawu-sawu no namango-on, ⁴⁷dow kunlajun kandan no ogdajan to Diyus. Nangaraga ka tibo no mgo otow kandan. Arow-arow og-isaban to Magbabaja kandan to mgo otow no piglipwas din.

Ka pogkauli-i duon to otow no pogkot

3 ¹Songo arow to sikan, mgo alas tris to mahapun, nig-andiya si Pidru dow si Huwan to timplu. Timpu sikan to pog-ampu. ²Duon to habangan to timplu duon otow no pogkot likat pad to pogkaotow rin. Kara arow ighinatod kandin diya to habangan nog ngaranan to "Makaduman-duman", sug pakilimus to mgo otow nog mamanoon to timplu. ³Pogka-aha rin ki Pidru dow ki Huwan no ogsood to timplu, namuju kandin to limus. ⁴Niglonglongan kandin ni Pidru dow si Huwan. Dow nig-iling si Pidru kandin, "Hanu, aha ka kanami." ⁵Nig-aha ka pogkot kandan no nigpasasagad kog limusan kandin. ⁶Di nig-iling si Pidru kandin, "Haka, wara saapi doy di duon igbogoy ku ikow: To ngaran ni Hisu-Kristu no matig-Nasarit, hipanow!" ⁷Dajun pigtagonan ni Pidru ka kalintu-u no bowad duon to pogkot dow impatindog kandin. Duon-duon nigmaroson ka kobong din dow bukubuku. ⁸Saguna nakatindog kandin dow nakahipanow dow pakiruma kandin king Pidru to pogsood to timplu. Dow nighiwhipanow dow nigsawsagbu no nigdajan to Diyus. ⁹Na-aha to tibo no nakahipanow on kandin dow nigdajan to Diyus. ¹⁰Nakiyaa ran ka otow no iyan ka pogkot no ungud og-i-ingkud no nigpakilimus duon to habangan to timplu nog ngaranan to

"Makaduman-duman no habangan." Kaling amani on iyan naboong-boong kandan to pogmakahipanow to sikan no otow.

Nigpamatbat si Pidru duon to insuung nog ngaranan to Balkun ni Sulumun

¹¹Ka sikan no otow warad iyan mogsabuk nog tatagon ki Pidru dow ki Huwan. Dow no duon pad kandan to howunganan nog ngaranan to Balkun ni Sulumun. Kaling namanduguk ka mgo otow kandan su naboong on iyan amani. ¹²Pogka-aha ni Pidru to mgo otow pig-ikagihan din kandan, "Mgo su-un ku no kabuwaran ni Israil, manya tog kaboong kow to soi? Nokoy tog longlong kow man kanami? Manya! Nigdoromdom kow buwa no inkapahipanow roy soini no otawa tongod to kanami no gahom dow to pogkadiyusnon?" ¹³Su ka Diyus no pigtu-uhan to ita no gin-apuan no si Abraham, si Isa-ak, dow si Hakub no iyan ka nakauli to soi para to pogpabantug to suguanon din no si Hisus. Iyan soi ka Hisus no indihaa now diya to mgo otow no duon katongod dow piglubusan now on duon to atubangan ni Pilatu, inggad ogsabukan din on poron si Hisus. ¹⁴Bala-an dow matarong kandin, di pinakawara now on kandin dow nangamuju kow on suga ki Pilatu no iyan din ogsabukan ka saboka no manghimatajay. ¹⁵Di nasi now on pahimataji si Hisus no iyan ka napu-unan to untung, di pigbanhow kandin to Diyus. Dow ogmaka-titigus koy ra-an no nabanhow kandin. ¹⁶Ka pogtu-u to gahom to ngaran ni Hisus iyan nakauli to soi otow no nakiyaa dow na-aha now kani, su kunto-on nakatitigus kow no naulian kandin tongod to pogtu-u ki Hisus."

¹⁷Di kagi ni Pidru, "Mgo su-un, nama-anan ku no iyu dow ka mgo panguu now ka nigpahimatoy ki Hisus su wara kow

mama-an ko hontawa iyan kandin. ¹⁸Kaling kuntoon pigtuman to Diyus ka nauna ra impahajag diya to mgo Tagailagan to Diyus, no ka Kristu kinahanglan iyan no igduwagid to bajad. ¹⁹Na, kunto-on kinahanglan nog pangajumpu kow on dow huraa to Diyus dow kag pasayluhon ka mgo saa now, ²⁰dow ogtirow iyu ka marjow no untung no likat to Magbabaja. Dow ogpalikuon din si Hisus no iyan ka Kristu no inhina-at on tahan nog hari ita. ²¹Di tagaod to diya pad si Hisus to langit taman tog katuman ka timpu no ogbakulion to Diyus ka tibo. Iyan da-an tagna ka impaikagi to Diyus pinabaja to mgo tagailagan to Diyus rin. ²²Angod duon to impanagna ni Muysis, 'Ka Magbabaja no Diyus ta ogbogoy iyu to saboka no tagailagan to Diyus no ogkapu-un diya to iyu no kabuwaran no angod kanak. Kinahanglan nog tumanon now ka tibo no ignangon din iyu. ²³Su ka otow no kona ogtuman to soi no tagailagan to Diyus igbugti duon to mgo kaotawan to Diyus dow oglogparan.' ²⁴Kagi pad ni Pidru, "Angod da-an ka impanagna to tibo no mgo tagailagan to Diyus likat pad ki Samwil. Su kandan tibo nanagna ko nokoy kag kangahitabu kunto-on no mgo timpu. ²⁵Ka mgo insa-ad to Diyus pinabaja to mgo tagailagan to Diyus rin para iyan itaw no mgo Hudiyu, su nakalagkos ki to kasabutan no pighinang to Diyus diya to mgo gin-apuan ta. Su pig-ikagihan to Diyus si Abraham, 'Pinabaja to kabuwaran nu ogpanalanginan ku ka tibo no mgo kaotowan kani to kalibutan.' ²⁶Kaling impa-andini to Diyus ka anak din no si Hisus impauna dini to ita no mgo Hudiyu, para ogkapanalangin ki pinabaja to pogtalikud to mgaro-ot no mgo batasan ta."

***Si Pidru dow si Huwan nig-atubang diya to
Maghusajay***

4 ¹Aman no kamuu pad ogpamatbat si Pidru dow si Huan to mgo otow, duon namandani kandan no mgo pari, mgo Sadusiyu, dow ka agaon to mgo taagbantoy to timplu. ²Nabowu kandan ki Pidru dow si Huan su nigpan-anad kandan no si Hisus nabanhaw, su kagi ran iyan soi ka nigpakiyaa no ka mgo nangamatoy ogkangabanhaw ra. ³Kaling impadakop dan si Pidru dow si Huwan. Ogsukitsukiton dan pad poron kandan, di aman sug kasaklop on, intagaod dan pad insood to pirisuhan taman tog kabukas. ⁴Di inggad ko sikan on ka naparoogan dan di mahan-in ka namanu-u no namakarinog to impannangon dan. Ka mgo lukos da no nigtu-u nigkabat on to mgo lima no libu.

⁵Pogkamasoom, nighimun diya to Hirusalim ka mgo agaon to mgo Hudiyu dow ka mgo igmanigo-on dow ka mgo mag-anaray to Pano-osan. ⁶Songo diya da-an si Anas no iyan ka kinalabawan no pari lagkos si Kaipas, si Huwan, si Alihandru, dow ka duma pad no mgo kabuwaran ni Anas. ⁷Dajun dan impaatubang si Pidru dow si Huwan dow pig-insa-an, "Nokoy gahoma dow hontawa no ngaran ka inkauli-i now duon to otow no pogkot?" ⁸Si Pidru no nigbuusan to Bala-an Ispiritu nigtabak, "Mgo panguu dow mgo tinahuran to kaotawan, ⁹kog panginsa kow kanami mahitongod to pogkauli-i duon to pogkot no otow. ¹⁰Kinahanglan nog kama-anan now dow to tibo no mgo kabuwaran ni Israil, no ka nakauli to soini no otow no nigtitindog kani to kabakna-an ta pinabaja to gahom ni Hisu-Kristu no matig-Nasarit. Kandin iyan ka impalansang now to krus di pigbanhow kandin to Diyus likat to kamatajon. ¹¹Si Hisus ka impasabut duon to Kasulatan no pig-iling, 'Ka batu no pinakawara now no mgo panday iyan on suga nahinang no pasikad to baoy.' ¹²Warad on lain no

ogmakalipwas ita kani to tibu-uk kalibutan ko kona no si Hisus da."

¹³Naboongboong kandan ki Pidru dow si Huwan su warad iyan kaharok dan to pogpan-iw-ikagi. Nama-anan dan no yanu ra ka daruwa no otow dow maintok da ka sinabut dan. Dow naromdoman dan no duma kandan ni Hisus no nauna. ¹⁴Wara kandan mamakatabak ki Pidru dow si Huan su ka otow no naulian nigtitindog duon to kabakna-an dan. ¹⁵Kaling impaguwa dan pad si Pidru dow si Huwan likat duon to Maghusajay dan dajun nigsusuboy-suboy kandan. ¹⁶Nig-iling kandan, "Nokoy on buwa ka oghinangon ta to soini no mgo otawa? Nigtangkap on kani to tibu-uk Hirusalim no nakahinang kandan to tanhaga dow kona ki ogmakapaginggawu to soi. ¹⁷Di para konad ogmakaparajun ka pogpan-nad dan to mgo otow, ogpatahanan ta kandan no konad on ogpan-anad kandan mahitongod ki Hisus." ¹⁸Dajun dan impatawag si Pidru dow si Huwan dow pigpatahanan no konad on iyan kandan ogpamatbat dow ogpan-anad mahitongod ki Hisus. ¹⁹Di nigtabak si Pidru dow si Huwan kandan, "Haka, puli now on tiwtimbanga ko hondo i ka igkabonayi to Diyus, ka pogtuman iyu dow ko pogtuman to Diyus? ²⁰Su konag kabawuy no kona do i igkapamatbat ka nasiyantahan do i no na-aha dow narinog." ²¹Di pigpasaitan da iyan kandan no konad ogpamatbat, dow dajun pigsabukan kandan. Inggad ko duon ginhawa ran no ogdapatan dan si Pedru dow si Juan, di kona dan ogkato-oran su naharok kandan to mgo otow. Su ka mgo otow nakasaja man to Diyus mahitongod to tanhaga no nahitabu. ²²Su ka pogkot no naulian pinabaja to tanhaga subra on kapatan no tuig.

Ka pangamuju to mgo tumutu-u diya to Diyus

²³Aman no pigsabukan on si Pidru dow si Huwan nig-uli kandan diya to mgo duma ran. Dajun dan impamatbat ko nokoy ka impatahan duon to mgo labaw no pari dow ka mgo agaon to mgo Hudiyu. ²⁴Pogkarinog to sikan to mgo tumutu-u naman-ampu kandan, "Magbabaja no amani no gahomanon to tibo, ikow ka nighinang to langit, to pasak, to dagat, dow to tibo no nakabotang duon. ²⁵Pinabaja to Bala-an Ispiritu impaikagi nu ka gin-apuan doy no si Dabid no suguanon nu no nig-iling,

'Manya man to nabowu-bowu ka konan mgo Hudiyu? Dow manya ka mgo Hudiyu nog dorom-dom to wara puus? ²⁶Ka mgo hari kani to kalibutan dow ka mgo agaon no nighimun dow nig-andam to pogpakiglogong to Diyus dow ka Kristu rin.'

²⁷No bali natuman on iyan ka impaikagi nu tagna kani to Hirusalim. No ka mgo Hudiyu dow ka kona no Hudiyu, lagkos si Hirudis no hari dow si Punsu Pilatu no Gubirnadur nakag-ujun nog tamhangon ka bala-an no suguanon no si Hisus, no iyan ogpaharion nu. ²⁸Su ka pighinang dan bali no natuman on ka ikow no planu tagna sumaa to gahom dow pogbo-ot nu.

²⁹Kaling kunto-on, Magbabaja, pigbaharan koy ran. Buligi koy ubag no mgo suguanon nu no kona koy maharok dow masomosomo nog pamatbat to ikagihonon nu. ³⁰Ipakiyaa nu poron ka gahom nu para ogkangaulian ka mgo magindawuhanon dow duon mgo tanhaga dow mgo kaboongan pinabaja to gahom to ngaran ni Hisus no Bala-an no suguanon nu."

³¹Aman no pogmakaponga ran on to pog-ampu, nahujung ka baoy no pighimunan dan. Dajun namuusan kandan tibo to Bala-an Ispiritu dow warad kasamosamo dan to pogpamatbat to ikagihonon to Diyus.

Ka pogbinuligay to mgo tumutu-u

³²Ka tibo no tumutu-u nasaboka to ginhawa dow to pangdoromdomay. Wara mog-iling no ka botang din kandin da ka tagitu-un ko kona pigsawupungan dan. ³³Dow pinabaja to dogin gahom no impamatu-ud to mgo apustulis mahitongod to pogkabanhow ni Hisus no Magbabaja. Dow dogi amani ka imbulig to Diyus to tibo no mgo tumutu-u.

³⁴Tibo kandan natimhanan to mgo ka kuwangon dan su ka duma ran no mgo tumutu-u namamaligya to mgo pasak dan dow mgo baoy. ³⁵Dow indihaa ran ka halin diya to mgo apustulis para iyan on ogpanhandog diya to mgo otow sumaa to pigkinahanglan dan.

³⁶Duon da-an tumutu-u no matig-Sipri no si Husi no kabuwaran ni Libi no piglanulanuhan kandin to mgo apustulis ki Birnabi, no ka kahiluwasanan, "Magdansogay." ³⁷Songo nigbaligya da-an to pasak din dow indihaa rin ka halin diya to mgo apustulis.

Si Ananiyas dow si Sapira

5 ¹Duon mag-asawa no songo nigbaligya to pasak dan nog ngaranan ki Ananiyas no ka bohi si Sapira. ²Di aman no wara pad idihaa ni Ananiyas diya to mgo apustulis ka halin duon to pasak, naujun ka mag-asawa nog salinan dan ka saapi para to tu-un dan. Aman no indihaa on ni Ananiyas

ka saapi diya to mgo apustulis nig-iling kandin no soi ra ka tibo no halin to pasak. ³Nanginsa si Pidru kandin, "Ananiyas, manya't nigpabagla ka man ki Satanas? Piggawuan nu ka Bala-an Ispiritu. Nokoy no pigsalanan nu man ka halin to pasak nu? ⁴Dow no wara nu pad ikabaligya ka pasak nu ikow man ka tagitu-un to sikan? Dow no ikabaligya nud on songo ikow kag makagbo-ot kog omonuhon nu ka saapi? Manya to nakadorom-dom ka pad to angod to soi? Kona no otow ra ka piggawuan nu ko kona labaw on ka Diyus."

^{5,6}Pogkarinog ni Ananiyas to sikan, nabantang kandin dow namatoy. Dajun namanduguk ka mgo bawbata dow bukusi ka lawa rin, dajun dan tatawtambingi diya to guwa dow iloobong. Nangaharok on iyan ka tibo no namakarinog to sikan no hitabu.

⁷Aman no mgo totowu on no uras, niglupug ka asawa ni Ananiyas. Di wara kandin mama-an ko nokoy ka naparoogan to asawa rin. ⁸Pig-insa-an kandin ni Pidru, "Tug-ani a nu ko tutu-u no soi ra iyan ka tibo no halin duon to pasak no imbaligya now?" Nigtabak si Sapira, "Hoo, sikan da iyan."

⁹Kaling nig-ling si Pidru kandin, "Manya to nakag-ujun kow man no mag-asawa nog antihan now ka Ispiritu to Magbabaja? Haka, sojan on to pawa ka mgo bawbata no namanloobong to asawa nu. Na, ikow kunto-on ka igsunu no igloobong dan." ¹⁰Dajun nabantang si Sapira duon to atubangan ni Pidru dow namatoy. Pogsood duon to mgo bawbata na-aha ran no namatoy on si Sapira. Nokoy ka man no pigtatatawtambingan da na-an duon to mgo bawbata, diya to guwa dow iloobong no impahulid da duon to asawa rin. ¹¹Tongod to sikan no mgo hitabu, nangaharok on iyan ka tibo no mgo tumutu-u, dow ka tibo no namakarinog to sikan.

Mgo tanhaga dow kaboongan no nahinang to mgo apustulis

¹²Mahan-in mgo tanhaga dow mgo kaboongan no nahinang to mgo apustulis duon to mgo otow. Kunlajun oghimun ka tibo no mgo tumutu-u diya to howunganan nog ngaranan to Balkun ni Sulumun. ¹³Pigtahud kandan to kaotawan, di ka duma kona kandan ogpasaum to pogpasakup. ¹⁴Di inggad pad to sikan undag on nasi nigmahan-in ka mgo lukos dow mgo bohi no tumutu-u to Magbabaja. ¹⁵Su mahitongod to mgo tanhaga no nahinang to mgo apustulis mahanin no piglaahunan dan no magindawuhanon no pigpandaa dow impamahibat diya to kilid to daan. Awoson dan ubag nog kabaja-an kandan ni Pidru inggad lambungan da puli parag kangaulian. ¹⁶Kona no sikan da, mahan-in pad da-an no mgo otow no likat to nakalibong no mgo banwa no namanirow diya to Hirusalim no nigpandaa to mgo magindawuhanon dow ka mgo otow no pig-ongonan to busow. Dow nangaulian kandan tibo.

Pigpasipaahan ka mgo apustulis

¹⁷No ka kinalabawan no pari dow ka mgo duma rin no mgo sakup to panong to Sadusiyu nasina on to mgo apustulis. ¹⁸Kaling imparakop dan ka mgo apustulis dow isood to pirisuhan. ¹⁹Aman no pogkarukilom on, pigpuwa-an to diwata to Magbabaja ka lokoban to pirisuhan dow ipaguwa din kandan. Dajun nig-iling ka diwata kandan, ²⁰ⁿAndiya kow to timplu dow pan-anara now ka mgo otow mahitongod to soini bag-u no untung no likat ki Hisus." ²¹Kaling no pagkabukas on namanood kandan to timplu dow naman-anad to mgo otow.

To sikan no kasooman ingpatawag to kinalabawan no pari dow to mgo duma rin ka tibo no tigdumaa to mgo Hudiyu su igpatambong ka tibo no Maghusajay to mgo Hudiyu. Songo pigpa-andiya-an da-an ka mgo apustulis diya to pirisuhan su igpa-atubang to mgo Maghusajay. ²²Di aman no pogtirow on duon to pigsugu diya to pirisuhan puli nangahowat ka mata ran no warad ka mgo apustulis. Dajun namanliku kandan diya to Maghusajay to mgo Hudiyu. ²³Dow kagi ran, "Pogtirow doy diya na-aha doy no nakandaruhan pad ka pirisuhan dow ka mgo taagbantoy songo duon da man to habangan. Di aman no mapuwa-an doy on, warad man diya ka mgo pinirisu.

²⁴Pogkarinog duon to agaon to mgo taagbantoy diya to timplu, dow ka mgo panguu to pari, nangataong kandan dow wara hanow ran ko nokoy ka nangaparoogan duon to mgo apustulis. ²⁵Kawugoy-lugoy duon nigtirow no nignangon, "Hika now, ka mgo otow no impapirisu now gabi-i diyad man to timplu nog pan-anad to mgo otow." ²⁶Dajun andiyai to agaon to mgo taagbantoy dow ka mgo sakup din dajun isaba ran dakopa ka mgo apustulis. Di wara dan dapati su naharok kandan kog dorogpakan to mgo otow.

²⁷Impa-atubang dan ka mgo apustulis diya to Maghusajay to mgo Hudiyu. Nig-iling ka panguu no Pari, ²⁸"Kona no pigpasa-itan doy on man iyu no kona kow on ogpan-anad mahitongod ki Hisus? Nokoy man nasi now on impamatbat! No kunto-on nigtangkap on to tibu-uk Hirusalim ka iyu no tinu-uhan, dow kanami pad ka pigdakosowan now to kamatajon din!"

²⁹Nigtabak si Pidru dow ka mgo duma rin, "Kinahanglan nog tumanon doy ka Diyus kona no mgo otow. ³⁰Pigpahimatajan now si Hisus pinabaja to poglansang kandin diya to krus. Di pigbanhow kandin to Diyus to mgo gin-apuan ta. ³¹Dow

pigbajow si Hisus to Diyus dow impasoing diya to kalintu-u rin dow pigsab-ungan to katongod to pogka-Panguu dow pogka-Manlipipwas. Para itaw no mgo Hudiyu dow makapangajumpu kiw dow kag kapasaylu ka mgo saa ta.

³²Ogpamatu-ud koy to soi tibo dow ra-an ka Bala-an Ispiritu no igbogoy to Diyus to tibo no ogtuman kandin."

³³Pogkarinog to mgo sakup to Maghusajay to mgo Hudiyu to sikan pig-ikagi ni Pidru nangalawlangotan on iyan kandan kaling oghimatajan dan on poron ka mgo apustulis. ³⁴Di nigtingdog si Gamalil no songo Parisiyu dow mag-anaray to Pano-osan no tinahud kandin to tibo. Nigsugu kandin nog paguwaon pad ka mgo apustulis. ³⁵Dow kagi ni Gamalil duon to mgo duma rin, "Mgo su-un ku no kabuwaran ni Israil, ha ka, tiwtimbanga now ka nokoy ka hukum now to sikan no mgo otawa. ³⁶Aman no tagna duon otow no ogngaranan ki Tiyudas no nigpalabawlabaw no angod to si hontawa on kandin, dow duon mgo upat no gatus no nigpasakup kandin. Di iyan tamana ka pighihimatajan si Tiyudas dow ka naparoogan to mgo sakop din namakag-susuwoy-suwoy. ³⁷Angod da-an to timpu to pogpanlistaha to mgo kaotawan duon matig-Galilya no si Hudas no songo nakasakup da-an to mahan-in no mgo otow. Di pighimatajan da da-an kandin songo angod no namakagsusuwoy-suwoy ra da-an ka mgo ginsakupan din.

³⁸Kaling mgo su-un, hagtongi now ra duon sikan no mgo otowa, dow kona now ra duon kandan bali-baliha. Su ka pighinang dow impan-anad dan ko puli ran da pig-otawi, songo angod no ogkahanow ra sikan. ³⁹Di ko likat man soi to Diyus kona ta ogkababagan. Su atuk da iyan ko Diyus on nasi kag ka kalogong ta."

Kaling nabonaan ka maghuhusoy to mgo Hudiyu to sambag ni Gamalil. ⁴⁰Impama-atubang da na-an ka mgo apustulis dow pigbarasan. pokaponga pigpasa-itan dan kandan no konad og-isab og pan-anad mahitongod ki Hisus, dow dajun dan saboki kandan. ⁴¹Di nighipanow ka mgo apustulis no nangaraga amani, su impasugamak kandan to Diyus to mapoit no pogpahilu-hilu tongod to ngaran ni Hisus. ⁴²Arow-arow diya kandan to timplu dow diya to mgo gibaajan dow maparajonon ka pogpan-anad dan diya to dow pogpamatbat to pangudlingon ni Hisus no iyan ka Kiristu.

Ka pogpili to pitu no lukos

6 ¹Dow no sikan no Timpu, nig-ananoy nigmahan-in ka tumutu-u ki Hisus. Noka mgo Hudiyu no Ginirigu ka inikagihan dan nig-aw-amuung duon to duma ran no songo Hudiyu no Hinibriyu ka inikagihan dan su iyan danda ogpaabihon ka kandan no bahu no bohi to inarow arow no bulig kandan. ²Kaling pighimun duon to sampuu dow daruwa no mgo apustulis ka tibo no tumutu-u dow nig-iling kandan, "Kona no angajan no iyan doy ogtalikuran ka pogpangudling to ikagihonon to Diyus dow paabiha ka pogpananuu dow pogbulig to kawawajan. ³Kaling, mgo su-un, pili kow diyan to iyu no pitu no lukos nog kasaligan now, ma-agsob dow piglona-an to Bala-an Ispiritu. Iyan ta kandan ogpadumaahon to soi no katongdanan. ⁴Dow ka kanami no ataa ogkatibuus duon to pog-ampu dow to pogpamatbat to ikagihonon to Diyus." ⁵Nabonaan ka tibo no tumutu-u duon to pig-ikagi to mgo apustulis. Kaling si Istiban ka napilian dan, su hogot ka pogtu-u rin ki Hisus dow piglona-an to Bala-an-Ispiritu. Ka duma si Pilipi, si Purukuru, Nikanur, si Timun, si Parminas, dow si Nikulas, no matig Antukya. Aman

si Nikulas kona no Hudiyu, di nigpasakup to tinu-uhan to mgo Hudiyu. ⁶Pigduma ran ka nangapili diya to mgo apustulis, dow pig-ampuan kandan to mgo apustulis, dow pigdap-onan dan kandan to mgo bowad dan.

⁷Kaling nigparajun ka pogwadwad to ikagihonon to Diyus. Dow mahan-in da-an nahinang no mgo tumutu-u ki Hisus, dow mahan-in da-an mgo pari no namanu-u kandin.

Pigdakop si Istiban

⁸Pigpanalanginan to Diyus si Istiban dow pigbogajan to gahom. Kaling mahan-in no mgo tanhaga dow mgo kaboonganan no nahinang din no nasiyantahan to mgo otow. ⁹Di duon mgo otow no nigsupak ki Istiban. Soini no mgo otawa Hudiyu no likat to Sirini, diya to Alihandiriya, diya to Silisya dow to Asya. Mgo sakup soi tosimbahan to mgo Hudiyu no pigngaranan to Sinabukan no uripon, ungud ogpakig-apuu ki Istiban. ¹⁰Di aman su si Istiban pigtanda-an to Bala-an Ispiritu to ka-agsob kaling kona dan ogkawupig kandin. ¹¹Kaling nanuhuu kandan to pila no ka otow, nog iling, "Narinog doy si Istiban no nigpasipaa ki Muysis dow to Diyus." ¹²Pigpa-agihan da ka kaotawan dow'g kangangootan, ka mgo panguu to Hudiyu, dow ka mgo mag-anaray to Panoosan. Pigdakop dan si Istiban dow ipa-atubang diya to Maghusajay to mgo Hudiyu. ¹³Duon impasood dan no pila no ka otow su igpatitigus dan to gawu ki Istiban. Kunlajun ka og-ikagi to pogpasipaa to Bala-an no timplu dow to Panoosan ni Muysis. ¹⁴Narinog doy kandin no nig-iling no ka timplu ogtompagon ni Hisus no matig-Nasarit dow'g liwanan din ka mgo tumanon no imbogoy ita ni Muysis!" ¹⁵Ka tibo no mgo sakup to Maghusajay to mgo Hudiyu niglonglong iyan amani ki Istiban, dow na-aha ran no ka bayhu rin no sibu ka to bayhu to diwata.

Ka pogpakigdunga ni Istiban

7 ¹Dow nanginsa ka panguu to pari ki Istiban, "Nokoy man, tutu-u iyan ka pig-ikagi to soi no mgo otawa?" ²Nig-iling si Istiban, "Mgo su-un dow mgo amoy, paminoga a now. Ka Diyus no makagagahom nigpa-aha tagna to gin-apuan ta no si Abraham no diya pad kandin ugpa to Misuputamya

no wara pad kandin moghalin diya to Haran. ³Nig-iling ka Diyus diya ki Abraham, 'Ojowi nu ka nasud nu dow ka mgo karumahan nu dow andiya ka to banwa no ighindu ku ikow.' ⁴Kaling niglaguy si Abraham to nasud to Kaldiya dow nig-ugpa diya to Haran. Aman no pogkamatoy on duo't amoy rin impahalin kandin to Diyus kani to soi no banwa no pig-ugpa-an ta kunto-on. ⁵Sikan no timpu wara pad bogaji to Diyus si Abraham to inggad malig-otay no pasak. Di ka Diyus nigsad no soini no pasak igbogoy rin kandin dow to mgo kabuwaran din. Wara pad anak ni Abraham no pogsa-ad to Diyus to soini kandin. ⁶Nig-iling ka Diyus kandin, ka mgo kabuwaran nu to kawugajan diya og-ugpa to bugti no nasud, dow oghinangon kandan diya no uripon dow dawraogon kandan to sood to upat no gatus no tuig. ⁷Di'g logparan ku ka nasud nog uripon kandan. Pogkaponga, og-ojowan dan sikan no nasud dow ogmanliku kani to soini no banwa dow dini kandan ogsimba kanakon.' ⁸Dow isip indananan to kandin no sa-ad pig-ikagihan to Diyus si Abraham no kinahanglan nog tulion ka tibo no mgo lukos. Kaling no pogkaotow duon to anak din no si Isa-ak, pigtuli din soi no igkawawu pad no arow. Iyan da-an soi pighinang ni Isa-ak ki Hakub no anak din. Dow si Hakub nighinang da-an to angod to soi duon to sampuu dow daruwa no mgo anak no iyan kapu-un to mgo Hudiyu.

⁹"Si Husi no saboka kandin duon to sampuu dow daruwa no mgo anak ni Hakub nasinahan kandin to mgo su-un din, kaling imbabaligya dan kandin. Dow pigduma kandin diya to Ihiptu dow nauripon kandin diya. Di aman su pigduma-rumahan kandin to Diyus. ¹⁰Pigbuligan kandin to tibo no kalisod no nabawbaja-an din. Pigbogajan da-an kandin to Diyus to ka-agsob. Kaling nasaja kandin ni Paraun, ka hari to Ihiptu

nahinang kandin no Gubirnadur to tibu-uk Ihiptu dow sinaligan to tibo no kabotangan. ¹¹To kawugajan duon manongtongan no bontas diya to tibu-uk Ihiptu dow diya to Kana-an induwagid amani ka mgao otow, dow ka mgo gin-apuan ta warad iyan ogkawugsaran no ogpurutan tog kako-on. ¹²Kaling no pogkarinog ni Hakub no duon pogko-on diya to Ihiptu, impa-andiya rin ka mgo anak din, no mgo gin-apuan ta. Iyan sikan ka aw-anajan no pog-andiya ran to Ihiptu. ¹³To ikaruwa no pog-andiya ran to Ihiptu, nigpakiya si Husi duon to mgo su-un din, dow nawungan ni Paraun ka kabagbagan ni Husi. ¹⁴Dajun imparaoakat ni Husi ka amoy rin no si Hakub duma ka tibo no kaampungan din no igpa-andiya to Iyiptu. (Mgo kapituwan dow lima kandan tibo.) ¹⁵Kaling si Hakub dow ka gin-apuan ta nighalin nig-ugpa diya to Ihiptu dow diyad kandan kangamatoy. ¹⁶Ka mgo minatoy ran diya dan da ipanlobong to Sikim diya to lobonganan no naboli tagna ni Abraham duon to mgo anak ni Hamur.

¹⁷^aAman no marani on ogkatuman ka insa-ad to Diyus ki Abraham, nigmahan-in pad ka mgo kabuwaran to mgo gin-apuan ta diya to Ihiptu. ¹⁸Dow no sikan no timpu, bag-u ra na-an ka hari duon to Ihiptu wara kandin makakiyaa ki Husi. ¹⁹Pigpamislay duon to panguu ka mgo gin-apuan ta. Dow pigdaogdaog. Pigpogos dan kandan nog paojowan kag tagaunraon dan no mgo bata dow kag kangapulipu on. ²⁰Iyan sikan no timpu ka pogkaotow da-an ni Muysis, natawtamoan sikan no bata to Diyus. Pigtanu kandin to inoy rin sood to totowu nu buwan. ²¹Di aman no intu-us on kandin diya to guwa to baoy. Pigporot kandin to anak ni Paraon no bohi dow tanuwa angod to tu-un din no anak. ²²In-anad ki Muysis ka tibo no ka-agsob diya to Ihiptu, dow nabantug kandin to ikagihonon dow hinang.

²³"Aman no kapatán on no tuig nakadoromdom si Muysis nog panlombas diya to karumahan din no mgo Israilinhon. ²⁴Duon saboka no na-aha din no pigdaogdaog to Ihiptuhanon. Nanabang kandin duon to karumahan din no mgo Israilita isip panimaos pinabaja to poghiMAToy rin to Ihiptuhanon. ²⁵Nigdoromdom si Muysis no oglaboton to duma rin no Israilita no kandin ka pigpili to Diyus to poglipwas kandan. Di wara kandan makasabut. ²⁶Pogkabukas nigliku si Muysis dow na-aha rin ka daruwa no Israilinhon no nigbubuwow oghusajon din poron ka daruwa, kaling pig-ilingan din kandan, 'Usi ha ka, nigsusu-un kow ra man manya tog bubuwow kow man.' ²⁷Di puli ra iwakli si Muysis duon to saboka no mabagadbagad kagi rin hontawa ka nig-iling ikow no taaghusoy dow'g panguu kanami. ²⁸Nokoy igdugpa a nu su nahinanad ka duon to pighimatajan nu gabi-i no Ihiptuhanon? ²⁹Pogkarinog ni Muysis no nama-anan da kandin dajun nighipanow kandin pailing diya to Midyan. Diyad kandin naka-asawa dow diyad manga otow ka daruwa no anak din no lukos.

³⁰"Anoy man no nigkabat on to kapatán no tuig duon saboka no diwata no nigpa-aha ki Muysis no diya kandin to ka-awangan no dani to bubungan to Sinai na-aha ni Muysis ka diwata duon to nigkaabkaab no sapinit. ³¹Naboong boong on iyan si Muysis duon to na-aha din, kaling nigduguk kandin duon to sapinit su og-ahaon din ko nokoy sikan. Aman no ogkaranihan din on narinog din ka lagong to Magbabaja no nigpag-uboyuboy kandin. ³²'Kanak ka Diyus to gin-apuan nu no si Abraham, si Isa-ak, dow si Hakub.' Pogkarinog ni Muysis to sikan pinamid-pid kandin to kaharok dow wara kandin moglangob nog aha. ³³Dow nig-iling ka Diyus kandin,

'puwasa nu ka sapatus nu su bala-an soi pigtindogan nu. ³⁴Na-aha ku ka mapoit amani no impahilu-hiu to mgo pinili ku no kaotawan diya to Ihiptu, dow narinog ku ra-an ka pogpangananoy ran kaling nigbuus to poglipwas kandan. Kunto-on ikow ka igpa-andiya ku to Ihiptu.'

³⁵"Iyan soi ka Muysis no pinakawara tagna to mgo karumahan no mgo Israilinhon no nig-iling, 'Hontawa ka nig-iling ikow no panguu dow maghuhusoy kanami?' Dow iyan da-an soi ka Muysis no impa-andiya to Diyus no nahinang no panguu dow manlipilipwasay to mgo Israilinhon pinabaja to bulig to diwata no na-aha rin diya to nigkaabkaab no sapiniton. ³⁶Si Muysis iyan ka panguu to Israilinhon to pogguwa likat to Ihiptu. Nighinang kandin to ngo tanhaga dow mgo kaboongan diya to Ihiptu, diya to maliga no Dagat, dow diya to ka-awangan no pighipanawan dan sood to kapatan no tuig. ³⁷Iyan da-an soi no Muysis ka nig-iling to mgo Israilinhon, 'Kibali impa-andini a to Diyus iyu, ogpa-andini pad da-an ka Diyus iyu to saboka no tagailigan to Diyus nog kapu-un da da-an to mgo kabuwaran now.' ³⁸Aman no diya ka mgo gin-apuan taw to ka-awangan, si Muysis da-an ka tubu-tonga to otow dow to diwata nog pag-uboy-uboy kandin diya to bubungan to Sinay; dow diya kandin makarawat to ikagihonon to Diyus no nigbogoy to untung dow igbogoy ra-an ita."

³⁹"Di ka mgo gin-apuan ta wara mog-ujun to tuman on ni Muysis. Pigwal-i si Muysis no poron panguu ran, dow namandoromdom kandan nog mamanliku diya to Ihiptu. ⁴⁰Pig-ikagihan si Aaron, 'Hinangi koy to mgo diyus-diyus doyo no iyan og-una kanami, su warad hanow roy ko nokoy ka naparoogan duon to Muysis no kun panguu kanami likat to

Ihiptu.' ⁴¹Dajun naman hihinang kandan to mgo diyus-diyus dow impa-angod to bayhu to nati to baka dow pigtataapagan dan soi dow'g pabantugan dan ka pighinang dan.

⁴²Nigtalikuran dan on ka Diyus. Pigpabay-anan din on puli kandan nog simba to mgo bitu-un to langit. Iyan soini ka insulat to tagailigan to Diyus:

'Iyu no mgo Israilinhon sood to kapatan no tuig no iyu diya kow to ka-awangan namani-iyaw kow to mgo bohi dow intaapag now. Di kona no kanak ka pigtaapagan now. ⁴³Pigdaa raa now ka piwpinajag no diyus-diyus now no si Molok, dow ka mgo linarawan no bituon no iyu no diyus-diyus no si Rapan. Pighinang now soi no mgo diyus-diyus para'g simbahon now. Kaling ogpabay-anan ku ra duon nog kangabihag kow diya to kayalu pad to Babilunya.' "

⁴⁴Aman no diya pad kandan to ka-awangan, ka ita no gin-apuan duon piwpinajag dan no sikan pasabut no kunlajun ogduma ruma ka magbabaja. Sikan no piwpinajag pighinang sumaa to pogbo-ot to Diyus, sumaa to impa-aha ki Muysis to Diyus. ⁴⁵Duon no nangamatoy on ka ita no gin-apuan, ka kandan no mgo kabuwaran iyan ka mgo pasak no insa-ad dow no pamaagujon to Diyus ka tahan no naman ugpa duon no banwa dow duon da kataman ka kunlajun da'g daw raaha no piwpinajaga to mgo Israilinhon taman no si Dabid on ka nahinang no panguu. ⁴⁶Nasaja to Diyus si Dabid dow nighangyu kandin diya to Diyus nog ujunan nog papalindog to baoy to Diyus dow'g mamakasimba ka kabuwaran ni Hakub.

⁴⁷Di si Sulumun on nasi ka nakahinang to timplu to Diyus.

⁴⁸"Di ka Diyus no labaw to tibo kona og-ugpa to baoy no hininang da to otow sumaa to in-ikagi to tagailigan to Diyus, kagi to Diyus:

⁴⁹Ka langit iyan turunu ku dow ka pasak iyan giokanan to kobong ku. Kaling inggad nokoy pad no kalasihan no baoy kag hinangon para kanak? Hondoi buwa no banwa kag kahimaajan ku?

⁵⁰Kona now ogdorom domon no kanak man ka nighinang to tibo?' "

⁵¹Kagi ni Istiban nanga-amonu on man iyan ka ginhawa now! Nigpamalingowlingow puli to ikagihonon to Diyus su kona kow'g kaliyag ogtuman to innangon iyu. Angod kow ra iyan to gin-apuan now. No kunlajun now ogsupaka ka Bala-an Ispiritu. ⁵²Wara tagailigan to Diyus tagna no wara dan pasipaahi. Inggad ka nigpan nangon mahitongod to pogtirow to Matarong no Suguanon pighimatajan dan da-an dow ra-an no pogtirow ni Hisus dini, iyu ra-an ka niglubus dow nighimatoy dow nighimatoy kandin. ⁵³Anoy narawat now on ka Pano-osan pinabaja to mgo diwata, di wara now tamora soi.

Pigbatu si Istibaban

⁵⁴Pogkarinog to soi mgo sakup to Maghusajay, nangabowu-bowu amani kandan ki Istiban. Puli namangagot ka mgo ngipon dan to pogkangabowu-bowu. ⁵⁵Di aman si Istiban pigkonsaran to Bala-an Ispiritu niglonghag diya to langit dow na-aha rin ka ka-anlag to Diyus no nigbandog dow si Hisus no nigtindog dapit to kalintu-u to Diyus. ⁵⁶Pogka-aha rin to soi kagi rin, "Ha nu, aha kow na-aha ku no nabungkasan ka langit dow soja si Hisus no anak to otow no

nigtitindog diya dapit to kalintu-u to Diyus!" ⁵⁷namangiyak ka sakup to Maghusajay dow pigpanagpongan dan ka mgo talinga ran dow ka kona ran ogkarinog ka in-ikagi ni Istiban. Dow dorongani ran tog duus. ⁵⁸Dajun dan gugujura si Istiban diya to gawas to lunsud dow babatuha ran to batu. Piglobasan to mgo titigus ka namanbatu ki Istiban pighukas dan dow itu-us duon to bawbata no igngaranan ki Sawlu. ⁵⁹Tagaod to pigdorogpakan dan si Istiban, nig-ampu kandin diya to Magbabaja no nig-iling, "Hesus no Magbabaja, dawata ka umagad ku." ⁶⁰Dow pakiluhud kandin dow pangiyak to mahagbot, Magbabaja kona nog sukuti kandan to saa no nahinang dan." Dajun kandin kabigtawi

8 ^{1,2}Inlobong si Istiban to mgo tumutu-u no otow, pigdarawugmatajan su amani ran pig-oog kandin.

Ka pogpasipaa ni Sawlu tao mgo tumutu-u

Pu-una to sikan, mapoit on amani ka naparoogan to mgo tumutu-u diya to Hirusalim. Kaling namakagsusuwoy-suwoy kandan diya to purubinsya to Hudiyu dow Samarya. Ka mgo apustulis da na-an ka nigpamatilon diya to Hirusalim. Si Sawlu nig-ujun to poghimataji ki Istiban. ³Nanamantaman on iyan nog kagawang ka mgo tumutu-u ki Hesus. Kaling pigpan-andiya-an din ka kara baoy dow pandumaha ka mgo lukos dow bohi dajun pamirisuha.

Impamatbat ka pangudlingon diya to Samarya

⁴Nangasuwoysuwoy ka mgo tumutu-u dow namabatbat kandan to pangudlingon. ⁵Ka mgo tumutu-u si Pilipi nig-andiya kandin to banwa to Samarya dow namatbat kandin

mahitongod ki Kiristu. ⁶Aman no pogkarinog to mgo otow to in-ikagi ni Pilipi, dow nangaboong kandan to mgo tanhaga no pighinang din namaminog on iyan kandan. ⁷Mahan-in otow no piglona-an to maro-ot no diwata no nangaulian din namangiyak to mahagbot no lagong ka maro-ot no diwata dow no poglagoy ran duon to mgo otow. Mahan-in da-an pogkot dow pingkaw no nangaulian. ⁸Kaling nanga-raga on iyan ka mgo tagbanwa.

⁹Duon da-an otow duon no pigngaranan ki Simun. Nawugoy on kandin no naiw-inuhan to matig-Samarya mahitongod to salamangka rin. No nigpagaroo no gahomanon kandin. ¹⁰Ka tibo tagbanwa, sapian ko makawuu-uy namaminog iyan kandan. Kagi ran, "Soi no otawa iyan ka gahom to Diyus no pig-iling, manongtongan no gahom." ¹¹Nawugoylugoy on ka pogpatu-uha rin to mgo kaotawan duon to salamangka rin. ¹²Di aman no pogpamatbat ni Pilipi kandan to pangudlingon da-an ki Hisu Kiristu, namanu-u kandan dow nigpamabawutismu, mgo lukos dow bohi. ¹³Inggad si Simun nigtu-u, dow ra-an no pogkabawutismuhi rin on nigdumaruma kandin ki Pilipi. Naboongboong on iyan kandin to mgo kaboongan no mgo tanhaga no pighinang ni Pilipi.

¹⁴Pogkarinog to mgo apustulis diya to Hirusalim no ka matig-Samarya namanu-u on da-an to ikagihonon to Diyus kaling impa-andiya ran si Pidru dow si Huwan. ¹⁵Aman no pogtirow ran diya to Samarya pigpan-ampuan dan ka mgo tumutu-u diya dow'g konsaran kandan to Bala-an Ispiritu. ¹⁶Su inggad ko nabawutismuhan on kandan to ngaran to Magbabaja no si Hisus, di wara pad mogkonsad kandan ka Bala-an Ispiritu. ¹⁷Indap-on ning Pidru dow si Huwan ka bowad dan diya't kandan, dow duon-duon nigkonsad kandan ka Bala-an

Ispiritu. ¹⁸Na-aha ni Simun, aman no idap-on to mgo apustulis ka mgo bowad dan to mgo tumutu-u nigkonsad kandan ka Ispiritu. Kaling pighanyagan din to saapi si Pidru dow si Huwan pig-ikagihan kandin. ¹⁹“Bogaji a now ra-an to sikan no gahom para ko hontawa ra-an kag dap-onon ku to kanak no bowad no songo ka konsaran to Bala-an Ispiritu.” ²⁰Di nigtabak si Pidru kandin, “Aman poron kog ka unung to saapi nu! Sug doromdom ka nog kaboli no to saapi ka igbogoy to Diyus? ²¹Wara labut nu mahitongod to igpahinang kanami to Diyus. ²²Kaling pangajumpu ka duon to maro-ot nu no karomdomanan dow ampu ka to Magbabaja dow’g pasayluhon ka maro-ot no ginhawa nu. ²³Su na-aha ku no amani ka masinahon dow nauripon ka to saa.” ²⁴Kagi ni Simun diya ki Pidru dow ki Huwan, “No kog kabawuy pa poron iampu anow ra-an ubag diya to Magbabaja dow ka kona ogkahitabu dini’t kanak ka logpad no pig-ikagi now.”

²⁵Pogkaponga ran to pogpasabut dow pogpamatbat to pangudling to Magbabaja, nigliku kandan diya to Hirusalim. Dow namatbat da-an kandan to pangudlingon diya to mgo kabaryuhan no nabawbaja-an dan diya to gibanwahan to Samarya.

Si Pilipi dow ka duon katongod no matig-Itiyupya

²⁶Dow duon diwata to Magbabaja no nigpag-uboy-uboy ki Pilipi, “Andiya ka kunto-on dajun ka diya dapit to babagan kalintu-u dow unuga puli ka daan no likat to Hirusalim no pailing to Gasa.” (Matagsa on ogbajai sikan no daan) ²⁷Kaling nighipanow si Pilipi dow na-aha din diya ka otow no matig-Itiyupya. Og-uli on kandin likat to Hirusalim songo nigsimba kandin to Diyus. Marogi ka katongod din su kandin ka

sinaligan to tibo no katigajunan to Kandansi. (Ka Kandansi iyan ka rayna to Itiyupya.) ²⁸No nigluwan kandin duon to lawananan din dow nigbasa basa to sinulat ni tagailigan to Diyus Isayas. ²⁹Nig-iling ka Bala-an Ispiritu ki Pilipi, "Lupuga nu dow agubaji nu ka luwananan din." ³⁰Kaling nigpinaaguy si Pilipi dow nasaponan din ka luwananan, dow narinog din no nigbasa-basa ka duon katongod to insulat ni Isayas, pig-insa-an kandin ni Pilipi ko nasabut din buwa ka pigbasa rin. ³¹Nigtabak ka duon katongod, "Wara iyan! Sug amonuhon ku to pogkasabut angin na-an ko duon og-anad kanak?" Dajun din ipaluwan si Pilipi duon to luwanan din no igpasoing kandin. ³²No iyan soi in-iling to Kasulatan no pigbasa rin:

"Warad iyan kandin mog-aw-amuung, angod kandin to karniru no pigdaa diya to iyawanan su oghimatajan, dow angod kanidn to karniru nog tabuugan nog patujun. ³³Pigpasikawan kandin dow pigpabayaran inggad wara saa din wara'g makasay say mahitngod to kandin no kabuwaran su ka untung din kani to kalibutan nahanow on man."

³⁴Nig-iling ka duon katongod diya ki Pilipi, "Nangoni a nu ko hontawa ka igpasabut to tagailigan to Diyus; ka kandin buwa no tu-un dow ko bugti no otow?" ³⁵Kaling likat to pig-iling duon to kasulatan, insaysay ni Pilipi kandin ka pangudlingon mahitngod ki Hisus. ³⁶Aman no kamuu pad kandan ogluwan nakabaja kandan to duon wohig. Nig-ling ka duon katongod ki Pilipi, "Hoh! Soid ma'k wohig, nokoy na-an to kona a nu magbawutismuhan?" ³⁷Nigtabak si Pilipi kandin, "Kabawuy kad nog bawutismuhan basta napungun on iyn ka ginhawa nog tu-u kad." Kagi duon to duon katongod, "Ho-o, nigtu-u ad no

si Hisu-Kiristu iyan ka anak to Diyus." ³⁸Dajun ipatawo-on ka luwananan to duon katongod dow lugsad kandan no daruwa dow andiya to wohig dow bawutismuhi kandin ni Pilipi.

³⁹Poghapit dan likat to wohig si Pilipi pighignali puruta to Ispiritu to Magbabaja. Nahaglong on kandin to duon katongod, di ka duon katongod nigparajun to poghipanow no naraga to pog-uli din. ⁴⁰Hinu-un kama-an ma-an si Pilipi, diyard kandin to Asutu. Dajun namatbat kandin to pangudlingon diya to mgo Lunsud no nangabaja-an din taman to nakatirow kandin diya to Sisarya.

Ka pogkakabig ni Sawlu

9 ¹Nigparajun pad iyan ka pogpanhinarok ni Sawlu to mgo inudlingan to Magbabaja nog himatajan din kandan. Dow nig-andiya pad kandin to panguu to pari. ²Dow namuju kandin to kalig-onan no igkapa-aha rin diya to kasimbahan to mgo Hudiyu diya to Damasku. No ka tu-ud din iyan ka pogpandakop to mgo tumutu-u ki Hisus no lukos dow bohi no og ka-aha rin dow ogdaahon diya to Hirusalim.

³Aman no ogmakadani-rani on sing Sawlu to banwa to Damasku, hignali no du-un maajag no nakabandog diya to kandin no likat to langit. ⁴Nabantang dajun si Sawlu dow duon lagong no narinog din no nig-iling, "Sawlu Sawlu! Manya to pigpa-hiluhilu a nu?" ⁵Nigtabak si Sawlu, "Si hontawa ka man?" Nigtabak kandin no nig-iling, si Hisus no pigpasipaahan nu. ⁶Tindog kad dow andiya to maganob no ugpa-an, su duon ognangon ikow diya ko nokoy ka angajan nog hinangon nu." ⁷Nangatanongan ka mgo duma ni Sawlu. No nakarinog kandan to lagong, di wara na-aha dan. ⁸Pa-aligbangon si Sawlu, di pogbowat din konad kandin ogmaka-

aha kaling pigkipit to duma rin pailing to Damasku.

⁹Nakatowu ka wara kandin maka-aha dow wara kandin makako-on dow makainom.

¹⁰Diya to Damasku duon saboka no tumutu-u ki Hisus nog ngaranan ki Ananiyas. Impa-aha rin pinabaja to karo-ot no nig-iling, "Ananiyas!" Nigtabak si Ananiyas, "Soini a Magbabaja." ¹¹Nig-iling ka Magbabaja diya to kandin, "Andiya ka to daan nog ilingon to 'Matul-id no Daan, dow pan-aha a nu diya to baoy ni Hudas ka otow no matig-Tarsu no pigngaranan ki Sawlu. To soi no timpu og-ampu kandin.

¹²Dow impa-aha ku kandin pinabaja to karo-ot no ikow nigsood no indap-on nu ka bowad nu diya to kandin para'g makaisab kandin ogmaka-aha. ¹³Di nigtabak si Ananiyas, "Magbabaja, ingkabaanawog on man sikan to ka-otawan, no amani mabagad-bagad sikan to mgo inudlingan diya to Hirusalim. ¹⁴Anoy ra man di nig-andini kandin kunto-on to Damasku no inuyunan to likat to labaw to mgo Pari dowka ogpandakopon din ka tibo no tumutu-u ikow." ¹⁵Di nig-iling ka Magbabaja diya ki Ananiyas, "Diya kad, andiyai nud kandin, su pigpili ku kandin no suguanon dow igpamatbat din ka ngaran ku diya to kona no mgo Hudiyu dow diya't Hari ran, dow matig-Israilinhon. ¹⁶Dow igpano-om-no-om ku ra-an kandin ka pogduwagid to bajad no kinahanglan din nog kabaja-an mahitongod kanak.

¹⁷Kaling pig-andiya-an ni Ananiyas si Sawlu diya to baoy no pigdatongan din, dow aman no pogsood din indap-on din ka bowad din diya ki Sawlu. Dow kagi rin, "Su-un Sawlu, pigsugu a to Magbabaja no si Hisus to pog-andini kani to ikow. Kandin ka nigpa-aha ikow dow no kamuu kag hipanow pailing dini. Dow ka ogmakaisab kag maka-aha dow oglona-an

to Bala-an Ispiritu. ¹⁸Duon dajun nangatanak nog ka-angod to hun-ap to isda no likat to mata ni Sawlu, dajun kandin maka-aha dow pakitindog dow pabawutismu. ¹⁹Pogkaponga rin to nigko-on dajun nigdoson kandin.

Nigpangudling si Sawlu diya to Damasku

Nkaugpa pad to pila no arow si Sawlu diya to Damasku duma rin ka mgo inudlingan. ²⁰Nig-andiya kandin to kasimbahan to mgo Hudiyu dow impangudling din ka mahitongod ki Hisus no kandin anak to Diyus. ²¹Naboongboong on iyan ka tibo no nakadinog kandin. Kagi ran, "Kona no iyan sojan ka ungud ogpahilu-hilu duon to mgo tumutu-u ki Hisus diya to Hirusalim? Kona no iyan in-andini rin sug pandakopon din ka mgo tumutu-u dow ka namanu-u to ngaran ni Hisus dow kag daahon diya to labaw to mgo Pari?"

²²Nig-undag on ka pogpangudling ni Sawlu. Impamatu-ud din no si Hisus iyan ka kristu. Dow ka mgo Hudiyu diya to Damasku kona og mamakatabak kandin. ²³Poglaboy to pila no arow nahimun ka ngo Hudiyu dow nigplanu kandan to poghimatoy ki Sawlu. ²⁴Ma-arow dow karukiloman pigbanganan dan ka guguwa-an to sikan no magonob nog ugpa-an sug himatajan dan kandin kog ka-aha dan. Di duon nigbahog ki Sawlu mahitongod to planu ran. ²⁵Kaling no songo karukiloman to sikan insosood kandin to pungki duon to mgo tumutu-u dow tuntuna diya to dibaoy to pagaad to magonob no' ugpa-an.

Ka pog-andiya ni Sawlu to Hirusalim

²⁶Pogtirow ni Sawlu diya to Hirusaliml, kaliyag poron kandin ogpagduma duon to mgo inudlingan, di naharok kandan kandin. Kona kandan ogmanu-u no songo nigtu-u on kandin.

²⁷Di pigbuligan kandin ni Birnabi. Pigduma kandin ni Birnabi diya to mgo apustulis su impakiyaa. Insaysay ni Birnabi kandan ko naomonu ka pogka-aha din to Magbabaja no si Hisus diya to daan ko nokoy ka nahitabu. Dow innangon din da-an ka wara pogtawtadha-ay ni Sawlu to pogpamatbat mahitongod ki Hisus diya to Damasku. ²⁸Kaling taman duon duma ran on si Sawlu, dow inggad hondo wara kaharok ni Sawlu to pogpangudling mahitongod to Magbabaja diya to Hirusalim. ²⁹Nigpag-uboy-uboy dow nigpag-apuu kandin to mgo Hudiya noka inikagihan Ginirigu, nangaangotan kandan dow nigpapalanu to poghimatoy kandin. ³⁰Pogkama-ani ra man duon to mgo tumutu-u. To sikan ka planu, imbu-us dan si Sawlu diya to lunsud to Sisarya dow impauli diya to Tarsu.

³¹Pogkaponga to sikan, nigmalinaw on ka pog-ugpa to mgo tumutu-u diya to Hudiya, to Galilya dow diya to Samarya. Nig-undag pad nigmabaga ka pogtu-u to tumutu-u dow nigugpa kandan no duon amani pogtahod to Magbabaja; su ka Bala-an Ispiritu iyan nigdigon kandan dow nigmahan-in pad kandan.

Nanlombas si Pidru diya to Lida dow Hupi

³²Mahan-in no banwa ka pigpan-andiya-an ni Pidru su ogpanlombas kandin to mgo ka-otawan to Diyus. Dow nig-andiya da-an kandin to mgo tumutu-u diya to Lida. ³³Diya na-

aha ni Pidru ka otow no ogngaranan ki Inyas. Warad iyan makabangunbangun kandin sood to wawu no tuig to pogka-umii rin. ³⁴Nig-iling si Pidru kandin, "Inyas, iyan nakauli ikow si Hisu-kristu. Kaling bangun kad dow himosa nud ka dujanan nu." Dajun nakabangun si Inyas. ³⁵Namaka-aha ka tibo no matig-Lida dow matig-Sarum no naulian on si Inyas, dow songo namanu-u on to Magbabaja.

³⁶Dow diya to Hupi, duon tumutu-u no bohi no ogngaranan ki Tabita. (Ka ngaran din to Girigu Durkas no ko ita pa usa.) Sikan no bohiyuna marojow amani ka nahinang din dow nakabulig kandin to makawu-uy. ³⁷To sikan no timpu narawuhan kandin dow namatoy. Pigdigus ran ka patoy no lawa rin dow pigkotang dan on diya to sinabong. ³⁸Ka Hopi kona da amani no mariyu diya to Lida. Kaling to pogkarinog to mgo inudlingan no si Pidru diya to Lida. Nigsugu kandan to daruwa no ka otow su igparaokat dan si Pidru kog kabawuy pa poron ogduma kandin diya to Hupi. ³⁹Pogtiriow duon to nigsuruy ki Pidru, duon dajun nigduma si Pidru kandan. Pogtiriow ran diya to Hupi impaponhik kandan diya to sinabong no pigkotangan. Duon namandarawugmatoy diya no bawu. Dow ipahiling-hiling ki Pidru ka mgo kabo no pigpanohi ni Durkas dow no bubuhi pad kandin.

⁴⁰Impamaguwa kandan tibo ni Pidru diya to sinabong. Nigluhud dow nig-ampu kandin. Pogkaponga nig-atubang kandin duon to pigkotang nig-iling kandin, "Tabita, bangun kad!" Nakabowat si Tabita dow to pogka-aha rin ki Pidru nigbangon kandin. ⁴¹Pigtagonan ni Pidru ka bowad din dow pig-aapwat no ogmakatindog. Pogkaponga pigsabi rin ka mgo bawu dow ka mgo duma no mgo tumutu-u diya to guwa dow impa-aha rin no si Tabita na buhi on. ⁴²Soi no hitabu nabatbat to tibo no Hupi, dow mahan-in namanu-u to Magbabaja.

⁴³Nig-u-ugpa-ay pad si Pidru to pila no arow diya to Hupi diya to panimaoy ni Simun no tigbowad to kindaa to mgo bubuhion.

Si Pidru dow si Kurnilyu

10 ¹Diya to Sisarya duon otow nog ngaran ki Kurnilyu soi no otawa saboka no kapitan to mgo sunndawu no Rumanhon no panong nog ilingon to kasudawuhan no Italyanu. ²Diyusnonatinumanon si Kurnilyu to Diys dow tibo kandan no songo gipuun. Mahan-in da-an ka pigbuligan no makawu-uy no mgo Hudiyu, dow mainampuon kandin to Diys. ³Songo arow to sikan, mgo alas tiris on sikan to mahapun, duon nigpa-aha kandin no diwata to Diys. Mapajag on iyan to pogka-aha din no nigsood to baoy rin dow nigsabi kandin, "Kurnilyu!" ⁴Pogka-aha rin duon to diwata naharok kandin dow nig-iling, "Nokoy man ka tu-ud nu?" Nig-iling ka diwata, "Pigdinog ka mgo pog-ampu nu to Diys dow ka pogbulig nu to mgo makawu-uy. Kaling wara ka malingawi to Diys. ⁵Kunto-on, sugu ka to otow diya to Hupi no igparaokat ki Simun nog ngaran da-an ki Pidru. ⁶Diya kandin mogparatong to baoy ni Simun no magbowaray to kindaa to bubuhion. Ka baoy rin diya to baybajon to dagat." ⁷Aman no naboong on ni Kurnilyu ka diwata, dajun din pigsabi ka daruwa no suguanon dow soboka no sundawu no songo diyusnon da-an no pangabaga rin. ⁸Pig-ikagihan kandin kandan ni Kurnilyu to tibo no na-aha rin, dajun din sugua kandan diya to Hupi.

⁹Aman no sunu da na-an no arow no ogmakadani-rani on kandan to mapono nog ugpa-an to Hupi, pogka-ugtu nigponhik si Pidru diya to atop to baoy su og-ampu. diya to

atop to baoy sug ampu. ¹⁰Pigbontas si Pidru ima rin poron nog maka ko-on. Di taga-od tog soson-ad kandan duon impa-aha kandin to Diyus. ¹¹Na-aha din ka langit no nabungkasan dow duon intuntun no angud to habo no pighikotan ka upat no kilid. ¹²Duon to sood to haboo na-aha din ka sinaman-saman no mgo bubuhion ka ogmamanhipanow kag kunanap dow kag manlajang. ¹³Dow duon lagong no narinog din no nig-iling, "Pidru, tindog ka! I-iyaw ka dow ko-on!" ¹⁴Nigtabak si Pidru, "Ih, kona a, Magbabaja, su anoy on na-an ka kagan-u a makako-on to sikan, su maligsom dow in-ojow to pano-osan." ¹⁵Duon da na-an narinog din naisab no lagong no nig-iling, "Kona no ngarani no maligsom ka inggad nokoy no pighugasan on to Diyus." ¹⁶Katotowu sikan suwsublia, dow hignali nabatun diya to langit ka angod to haboo no pigtun-tun.

¹⁷Kamuu'g doromdom si Pidru ko nokoy ka kalitukan duon to na-aha din, iyan da-an pogtirow duon to mgo otow no pigsugu ni Kurnilyu. Su pogkama-ani ran ko hondoi ka baoy ni Simun nigdajun kandan diya, nigdajun kandan diya; Aman no pogtirow ran duon to guguwa-an to pagaad, ¹⁸Nanabi kandan dow nanginsa ko diya mogdatong si Simun no nigngaranan ki Pidru. ¹⁹Taga-od to ungud pad ogpasoy si Pidru ko nokoy ka ogkalitukan duon to na-aha rin. Nig-iling ka Bala-an Ispitu kandin, "Duon totowu no ka otow no nangaha ikow. ²⁰Lugsad kad dow pakiduma kad kandan, dow kona kag duwaduwa to pogduma su kanak ka nigsugu kandan." ²¹Kaling nigkilugsad si Pidru dow nig-iling duon to mgo otow, kanakon man ka pigpanga now. Nokoy man ka tu-ud now kanak?" ²²Nig-iling kandan, "Pigsugu koy ni kapitan Kurnilyu. Matarong kandin no otow dow songo diyusnon. Dow tinahod kandin to mgo Hudiyu. Pignangonan kandin to diwata no igparaokat ka sug pa-andiyaon ka to baoy rin dow ka ogmakapaminog kandin to

ikagihon nu." ²³Dajun pasora ni Pidru dow diyad kandan makahibat to sikan no karukiloman.

Pogkasunu no arow nigduma si Pidru kandan. Duon da-an pila no mgo tumutu-u diya to Hupi no namanduma kandin.

²⁴Pogkabukas nakatirow on kandan diya to Sisarya.

Nigtatagad si Kurnilyu, dow ka mgo karumahan din dow ka mgo sumbaaja no pinanhingat din. ²⁵Aman no pogdatong on ni Pidru, pigtagbu kandin ni Kurnilyu dow nigluhud to pogsimba kandin. ²⁶Di impatindog kandin ni Pidru dow pig-ilingan, "Kona a nu'g simbaha, su otow a ra." ²⁷Nigpauw-ubajay kandan pailing diya to sood to baoy. Diya na-aha ni Pidru ka mahan-in no mgo otow no nangahimun. ²⁸Pig-ikagihan kandan ni Pidru, "Nama-an kow no kanami no mgo Hudiyu supak to tinu-uhan doy ka pogpanumbaoy dow ka pogpagduma to kona no Hudiyu. Di impahajag kanakon to Diyus no kona ku ogdorom-domon no maligsom ka inggad hontawa. ²⁹Kaling no pogpasugui kanak nog pa-andinihon a now, wara ad mogbalibad. Na kunto-on ima ku nog kamaan ku ko nokoy ka pogpa-andiniha now kanak."

³⁰Nigtabak si Kurnilyu, "Nakatowu on kunto-on taman to pog-ampu ku kani to baoy, dow songo angod da-an to soi no uras, mgo alas tiris to mahapun. Taga-od to nig-ampu a, hignali puli nigpa-aha kanak ka otow no maa jag ka sabinit.

³¹No nig-iling kandan, Kurnilyu, pigdinog to Diyus ka mgo pog-ampu nu dow wara din kalingawi ka pogbulig nu to makawu-uy. ³²Kunto-on sugu ka to mgo otow no igpa-andiya nu to Hupi dow igparaokat ki Simun nog ngaranan da-an ki Pidru. Diya kandin nigdatong to baoy ni Simun no magbowaray to kinda to bubuhion. No ka baoy rin diya diya to higad to baybajon to dagat. ³³Kaling dajun ku ikow

pasugui, dow marojow ubag su nig-andini ka. Soini koy nangahimun to atubangan to Magbabaja sug paminog koy ko nokoy ka insugu ikow to Diyus no igpanngon kanami."

Nangudling si Pidru diya to baoy ni Kurnilyu

³⁴Kaling nig-iling si Pidru, "Bali kunto-on no nama-anan kud no wara iyan pinaabi to Diyus. ³⁵Ka otow no duon kaharok to Diyus dow ko morojow ka hinang, inggad nokoy pad kandin no otawa ogdawaton kandin to Diyus. ³⁶Narinog now on ka pangudlingon no in-ikagi kanami to Diyus no mgo Israilinhon no ka otow ogkaliku ka marojow no pogdapita diya't kandin pinabaja to pogtu-u ki Hisu-Kiristu kandin ka Magbabaja to tibo. ^{37,38}Songo nama-anan now on da-an ka nahitabu diya to gibanwahan to Hudiya mahitongod ki Hisus no matig-Nasarit. Kona no diya man mogpu-una to Galilya pogkaponga to pogpangudling ni Huwan mahitongod to pogbawutismu? Pigpabuusan to Diyus si Hisus to Bala-an Ispiritu dow gahom. Su ka Diyus nigduma kandin, nig-andiya kandin to inggad hondo no banwa dow nighinang to marojow. Dow nangaulian din ka pigpabakaran to busow. ³⁹Nasiyantahan doy ka tibonami iyan ogmakatitigus to tibo rin no hinang su na-aha doy man ka nahinang din diya to Hirusalim dow diya to duma no lunsud to mgo Hudiya. Pighihimatajan kandin to mgo Hudiya pinabaja to poglansang kandin diya to krus. ⁴⁰Di pogmakatowu pigbanhow kandin to Diyus dow impa-aha kanami no bubuhi kandin. ⁴¹Wara kandin mogpa-aha diya to kahan-inan ko kona kanami ra no mgo pinili to Diyus isip mgo titigus mahitongod kandin. Pogkabanhow rin nigpakigsawu koy pad kandin to pogko-on dow pog-inom human kandin mabanhow. ⁴²Pigsugu koy to pangudlingon diya to ka-otawan dow ogtitigus no kandin iyan ka pigpili to Diyus no oghukum to bubuhi dow ka nangamatoy. ⁴³Si Hisu-Kiristu iyan ka pig-

iling to tibo no mgo tagailigan to Diyus no ogtu-u kandin ogpasayluhon ka mgo saa dan pinabaja to ngaran din."

Pigpangonsaran to Bala-an Ispiritu ka kona no mgo Hudiyu

⁴⁴Kamuu'g pangudling si Pidru nigbuus ka Bala-an Ispiritu dow pigpahuupan ka tibo no namaminog to batbatonon. ⁴⁵Ka mgo tumutu-u no mgo Hudiyu no namanduma ki Pidru no likat to Hupi nangaboong-boong no pigbuusan to Diyus to Bala-an Ispiritu ka kona no mgo Hudiyu. ⁴⁶Su narinog dan kandan no namakaikagi to kona og-a-angod-ango no inikagihan dow namandajan to Diyus. Kaling nig-iling si Pidru, ⁴⁷"Inggad kona kandan no mgo Hudiyu nasisingan kandan to Bala-an Ispiritu angod no songo nasisingan da-an, kaling warad on ogmakabaabag ko bawutismuhan kandan to wohig." ⁴⁸Dajun kandan sugua nog pabawutismu to ngaran ni Hisu-Kristu. Pogkaponga to sikan pigtaawiran dan pad si Pidru nog uw-ugpa-ay pad to pila no arow.

Pigsaysajan ni Pidru ka mgo tumutu-u diya to Hirusalim

11 ¹Aman no namakarinog ka mgo apustulis dow ka mgo tumutu-u diya't Hudiya no ka konan mgo Hudiyu songo namanu-u on to pangudlingon to Diyus. ²Kaling no pogliku ni Pidru diya to Hirusalim, pigsawoy kandin to mgo tumutu-u Hudiyu no ka nigtu-u no kona no mgo Hudiyu kinahanglan nog patuli pad human og-amut kandan. ³Nig-iling kandan ki Pidru, "Ikow Hudiyu ka. Manya tog andiya ka man to mgo baoy to otow no konan tinuli, dow nigpagsawu ka

kandan?" ⁴Kaling pigsay-sajan kandan ni Pidru to tibo no nahitabu kandin likat pad to pu-una-an.

⁵Nig-iling kandin, kamuu og-ampu diya to banwa to Hupi duon impa-aha kanak to Diyus. Na-aha ku ka angod to maaw-ag no habo no intuntun likat to langit. Pighikotan ka upat no kilid, Dow natao-on no naka-dani kanak. ⁶Pighiling-hiling ko ka himus to sikan, na-aha ku ka sinaman saman no bubuhion no ogmamakahipanow, mamanduwa no mgo uwod dow ogmamanlajang no mgo bawbajaku. ⁷Dow narinog ku ka lagong no nig-iling kanakon, "Pidru tindog ka! I-iyaw ka dow ko-on!" ⁸Di nigtabak a, 'Magbabaja, anoy on na-an ko kagan-u a mogko-on to bubuhion no angod to sikan likat pad nauna, su maligsom dow in-ojow to pano-osan.' ⁹Duon da na-an lagong no nig-ikagi likat to langit, kona nog ngarani no maligsom ka pighugasan on to Diyus. ¹⁰Katotowu soi suwsublia, dow pogkaponga pigbatun sikan diya to langit. ¹¹Sikan no urasa duon totowu ra-an no otow no likat to Sisarya no nigtirow diya't pigparatongan ku no baoy. Sikan no mgo otawa pigsugu su igpapangaha kanak. ¹²Pignangonan a to Bala-an Ispiritu no kona a ogduwa ruwa to pogduma kandin. Soi onom ta no mgo su-un ki Kristu no matig-Hupi duma ku to pog-andiya to baoy ni Kurnilyu diya to Sisarya. ¹³Pogtirow doy diya pig-ikagihan koy ni Kurnilyu no duon na-ha din no diwata diya to sood to baoy rin, dow nig-iling ka diwata kandin. Sugu ka to otow nog pa-andiyaon nu to Hupi dow iparaokat ki Simun no pigngaranan ki Pidru. ¹⁴Ig-ikagi rin ikow ko nokoy ka pa-agi nog kalipwas ka dow ka tibo nu no gipun.' ¹⁵Aman no nigpu-una ad nig-ikagi, nigbuus ka Bala-an Ispiritu angod da-an no pogbuusi itaw nauna. ¹⁶Dow naromdoman ku ka pig-iling to Magbabaja no si Hisus: 'Nigbawutismu si Huwan to wohig, di iyu ogbawutismuhan

kow to Bala-an Ispiritu.' ¹⁷Kaling sikan no panghitabu nigpasabut no ka imbogoy ita to Diyus no mgo Hudiyu dow no namanu-u kid on to Magbabaja no si Hisu-Kiristu songo imbogoy rin da-an to konan mgo Hudiyu. Kaling ko iyan man sikan pogbo-ot to Diyus, si hontawa aman nog baabag to soi?" ¹⁸Aman no marinog on duon to mgo tumutu-u no Hudiyu, warad kandan mogsawoy ki Pidru. Nasi no naman dajan kandan to Diyus. Nig-iling kandan, "Ko iyan sikan, songo imbogoy ra-an to Diyus to kona no mgo Hudiyu ka kahigajunan to pogpangajumpu dow songo ogmaka-angkon to untung no wara katamanan."

Ka mgo tumutu-u to Antukya

¹⁹Taman to pogkamatoy ni Istiban namakagsusuwoy-suwoy on ka mgo tumutu-u tongod to pogpahilu-hilu kandin. Kaduma ran naka-agpot diya to Pinisya, diya to puu to Sipri, dow diya to lunsud to Antukya. Impamatbat dan ka pangudlingon duon tog kabawbaja-an dan di iyan da ka Hudiyu'g nanganon dan. ²⁰Di ka tumutu-u no duma matig-Sipri dow matig-Sirini naman-andiya da-an to Antukya, dow inggad ka kona no Hudiyu pignanganon dan mahitongod to pangudlingon to Magbabaja no si Hisu-Kiristu. ²¹Ka gahom to Magbabaja diya't kandan dow mahan-in da-an namanu-u dow nahinang no tumutu-u to Magbabaja.

²²Soini no panhitabu narinog to mgo tumutu-u to Hirusalim, kaling impa-andiya ran si Birnabi to Antukya. ²³Pogtirow din diya naraga kandin su na-aha din ka mgo otow diya no pigpanalanginan kandan to Diyus. Dow pigbaghot din kandan nog matinumanon dow ogmandigon to pogtu-u ran to Magbabaja. ²⁴Si Birnabi marojow soi no otow. Pigpahuupan

to Bala-an Ispiritu, dow madigon amani ka pogtu-u rin to Diyus. Kaling mahan-in ka namanu-u to Magbabaj diya.

²⁵Dow nig-andiya si Birnabi to Tarsu sug pan-ahaon din si Sawlu. ²⁶Pogka-aha din ki Sawlu pigduma rin isaba diya to Antukya. Songo tuig lagboy ka pogmamakagdumaruma ran to mgo tumutu-u diya dow mahan-in mgo otow no nanga-anad dan. Ka mgo tumutu-u ki Hisus diya't Antukya iyan nauna pigngaranan to Kristuhanon. ²⁷To sikan no timpu duon mgo tagailigan to Diyus to Hirusalim no nig-andiya to Antukya. ²⁸Ka saboka kandan pigngaranan ki Agabu. Nigtindog kandin pinabaja to Bala-an Ispiritu no nailagan din no duon manongtongan no bontas no ogtirow to tibu-uk kalibutan. (Nahitabu soi to timpu no iyan pad si Kalawudju Impiradur to Ruma.) ²⁹Kaling ka sumusunud ki Hisus diya to Antukya nangaujun no ka kara saboka kandan no ogpamaraa to bulig dan to mgo kasu-unan dan ki Kristu diya to Hudiya sumaa to igkabulig dan. ³⁰Imparaa ran soi pinabaja ki Birnabi dow ki Sawlu dow ka igbogoy to mgo panguu to Hirusalim.

Impahilu-hilu ni Hirudis ka mgo tumutu-u

12 ¹Sikan no timpu nigpu-una si hari Hirudis to pogpahilu-hilu to mgo tumutu-u. ²Pigpahimatajan dan si Santiyagu no su-un ni Huwan pinabaja to kalis. ³To pogka-aha din no nangaraga ka mgo Hudiya mahitongoid to pighinang din, imparakop din da-an si Pidru. Nahitabu soi dow no timpu to Kahuugan to pan no Wara Patulin. ⁴Impapirisu din si Pidru dow pigbantajan to upat no panong no mgo sundawu no ta'g upat upat kara panong. Soi upat no panong ogsosowsokoli'g bantoy. Sumaa to planu ni Hirudis, no kog kaponga on ka Kahuugan to Poglaboy igpa-atubang din

si Pidru diya to kaotawan.⁵Kaling pigpabantajan din to mgo sundawu si Pidru diya to pirisuhan. Di ka mgo tumutu-u hogot no nigparajun to mgo pog-ampu ran kandin diya to Diyus.

Impaguwa si Pidru diya to pirisuhan

⁶To sikan no karukiloman no wara pad husaja si Pidru, naliporong kandin no pigbaku ka daruwa no kobong din no pigpagtonga to daruwa no sundawu dow songo duon nigbantoy diya to habangan to pirisuhan.⁷Nighignali no nigma-awang ka sood to pirisuhan dow nigpa-aha ka saboka no diwata no pigsugu to Magbabaja. Pigdagpi ka takiringan ni Pidru dow kag makabowat, dow nig-iling kandin, "Agpas kad bangun!" Duon dajun nangatangga ka sagikaa no imbaku to mgo bowad din.⁸Nig-iling ka diwata, "Panabinit ka dow sasandal." Pigtuman soi ni Pidru. Dow nig-iling ka diwata diya to kandin. "Ikabo nu ka linajun dow duma ka kanak."⁹Dajun duma kandin to diwata diya to guwa to pirisuhan. Wara kama-an si Pidru ko tutu-u buwa ka nahitabu. Nailing ka ginhawa rin no puli rin da karo-ot.¹⁰Piglabajan dan puli ka nauna dow ka ikaruwa no taagbantoy. Aman no pogtirow ran to habangan no puthow no naka atubang diya to magonob no ugpa-an, napuwa ka lokop to habangan. Dow dajun nigguwa kandan. Poglaboy ran to saboka no daan puli rin on nahadlong ka diwata.¹¹Diyad on kandin kama-an ma-an no kona mana-an no puli rin da karo-ot. Naka iling kandin, "Tutu-u mana-an iyan no impa-andini to Magbabaja ka diwata rin dow piglipwas a rin to bowad ni Hirudis dow to tibo no planu to mgo Hudiyu nog kahitabu kanakon."

¹²Pogkabarong-barong din no nakalipwas on kandin, nig-andiya kandin to baoy ni Mariya no inoy ni Huwan Markus. Mahan-in otow no nanganhimun diya no naman-ampu.

¹³Nigpatukow si Pidru diya to habangan, dajun nigguwa ka suguanon no si Ruda su pig-aha rin ko hontawa ka nigpatukow. ¹⁴Pogkakiyaa rin to lagong ni Pidru puli na raga-daga, anoy man sug puwa-an din on ka habangan nasi on suga diya kandin makapailing to sood dow kag kaikagihan din ka duma rin no duon si Pidru to guwa. ¹⁵Nig-iling kandan ki Ruda, "Hoo naangog kad man buwa!" Di nangatarongan si Ruda, duon iyan si Pidru. Kaling nig-iling kandan, "Atuk ko diwata sikan ni Pidru." ¹⁶Di si Pidru ungud da iyan ogpatukow. Kaling pigpuwa-an dan ka habangan su kona kandan ogmakatu-u no si Pidru iyan. ¹⁷Piglarawanan kandan ni Pidru no oghagtong, dow insaysay rin kandan ko pig-omonu kandin to pogpagawasa to Magbabaja likat to pirisuhan. Pig-ikagihan din kandan no ognangonan dan si Santiyagu dow ka duma pad no tumutu-u. Dajun nighipanow kandin dow andiya to songo banwahan.

¹⁸To sikan no kasooman nagulimbut ka mgo taagbantoy su warad on si Pidru diya dow wara hanow ran ko nokoy ka naparoogan din. ¹⁹Nigsugu si Hirudis no ogpangaha on kandin, di wara dan on iyan kandin ma-aha kaling impasukit-sukit din ka mgo taagbantoy dow pogkaponga to sikan pigpamahimatajan din kandan. Niglikat si Hurudis diya to Hudiya. Nig-andiya kandin to Sisarya dow diyad kandin mog-uppa.

Ka pogkamatoy ni Hirudis

²⁰Nabowu-bowu amani si Hirudis to mgo otow no matig-Tiru dow matig-Sidun. Kaling nangaujun ka mgo otow nog paghusoy to hari su diya kandan ogpinanauli to pogko-on to maponu no ugpa-an duon to hari. Kapu-una-an pigpujuk dan si Balastu dow kag ka buligan kandan, su kandin man ka pangabaga to hari diya to palasyu. Dajun nig-andiya kandan to hari sug pakig-aha kandin. ²¹Aman no pogkatuman on to arow no ogpakig-aha on si Hirudis to matig-Tiru dow matig-Sidun, nanabinit on kandin to sabinit to pogka hari dow i-inkud duon to bangkasu dow mogpamisaa. ²²Naman agyahaw ka mgo otow, "Kona no puli-puli no otow soi nigpamisaa, ko kona Diyus!" ²³Duon dajun piglogparan si Hirudis to diwata to Magbabaja, su tongod to wara din pahimantugi ka Diyus. Pig-iyasan kandin dow namatoy. ²⁴Kaling nigparajun nigtangkap ka pangudlingon to Diyus, dow mahan-in pad ka nahinang no ngo tumutu-u. ²⁵Pogkaponga ni Birnabi dow si Sawlu, to poghatud to mgo hinabang diya to Hirusalim, nanliku kandan diya to Antukya dow nigduma ran si Huwan Markus.

Ka pogsugu a ki Birnabi dow si Sawlu to Bala-an Ispiritu

13 ¹Diya to Antukya duon mgo tagailigan to Diyus dow mag-anaray no sakup to punduk to tumutu-u. Ka ngaran dan si Birnabi, si Simyun no pigngaranan to hurom, si Lusyu no matig-Sirini, si Manain diyad matulin ki Hirudis no gubirnadur dow si Sawlu. ²Aman no kamuu kandan ogsimba to Magbabaja dow namanaang nigko-on kandan nigiling ka Bala-an Ispiritu kandan, "Itapid now para kanak si Birnabi dow si Sawlu su duon igpahinang ku kandan."

³Pogkaponga to pogpanaang dan to pogko-on dow pog-ampu,

pigdap-onan dan si Birnabi dow si Sawlu to bowad dan dajun
ipahipanow kandan.

Si Birnabi dow si Sawlu diya to Sipri

⁴Kaling pigsugu to Bala-an Ispiritu si Birnabi dow si Sawlu diya to Silyusya. Likat diya nigluwan kandan pailing diya to Sipri. ⁵Pogtirirow ran diya to mapono no ugpa-anlunsud to Salamina nigpangudling kandan diya to mgo kasimbahan to mgo Hudiyu. Duma ran da-an si Huwan Markus dao ka ogmakabulig kandan to oghinangon dan. ⁶Pigligbut dan ka tibo no puu taman to nakatirow kandan to mapono no ugpa-an Papus. Duon na-aha dan diya no salamangkahan nog ngaranan ki Bar-Hisus. Hudiyu kandin, di nigpa-aw-amangkuwa no tagailagan kandin to Diyus. ⁷Amigu kandin ni Sirgiyu Pawlu no gubirnadur to sikan no puu. Si Sirgiyu Pawlu ma-agsob no otow. Impa-angoy rin si Birnabi dow si Sawlu su ogkaliyag kandin ogpaminog to pangudlingon to Diyus. ⁸Di pigbaabagan kandin ni Ilimas no salamangkahan. (Iyan soi ngaran ni Bar-Hisus to Ginirigu no inikagihan.) Su ima rin no kona ogtu-u ka gubirnadur ki Hisu-Kiristu. ⁹Di aman si Sawlu no pigngaranan da-an ki Pablu pigpahuupan to Bala-an Ispiritu, Nigloong-long ki Ilimas dow nig-iling, ¹⁰"Anak ka ni Satanas! Kablang ka to tibo no marojow! Malimbungon ka dow pogpamislay ra ka ungud nog hinanga. Kunlajun nog supaka ka kamatu-uran no likat to Magbabaja. ¹¹Kunto-on oglogparan ka to Magbabaja ogkapisok ka dow kona ka ogmaka-aha taman to pila no arow." Dajun nigdiglom ka pog-aha ni Ilimas dow napisok kandin. Nakapandamdandam da na-an kandin dow nigpan-aha tog makakipit kandin. ¹²Aman no pogkama-ani duon to gubirnadur ka naparoogan ni Ilimas nakatu-u kandin, dow naboong-boong on iyan kandin to tinu-uhan mahitongod to Magbabaja.

Sing Pablu diya to Atukya no sakup to Pisidya

¹³Poglikat nin Pablu diya to Papus, nigdahipag kandan pailing diya to Pirga no sakup to gibanwahan to Panpilya. Pogdatong dan pig-owjan kandin ni Huwan Markus. Nigliku kandin diya to Hirusalim. ¹⁴No sing Pablu nigdajun diya to Antukya no sakup to gibanwahan to Pisidya. Aman no Arow on to Hihimaajay nig-andiya kandan to simbahan to Hudiyu dow nig-ingkud diya. ¹⁵Duon nigbasa to pano-osan ni Muysis dow sinulat to mgo tagailigan to Diyus. Dow duon pigsugu to duon katongod no og-iling ki Pablu, "Mgo su-un, ko duon igkaikagi now no igkabaghid to mgo kaotawan i-ikagi now." ¹⁶Kaling nigtindog si Pablu dow niglarawanan din ka ngo otow nog paminog kandin. Nig-iling kandin, "Mgo su-un ku no mgo Israilinhon dow iyu no kona no Israilinhon di songo nigsimba da-an to Diyus, paminoga a now! ¹⁷Ka Diyus no pigsimba to mgo Israilinhon iyan nigpili to itaw no gin-apuan, dow impahan-in din kandan dow no diya pad kandan mog-ugpa to Ihiptu. Dow pinabaja to kandin no gahom pigbuligan din kandan dow ka ogmamakaguwa diya to Ihiptu. ¹⁸Sood to kapatan no tuig, dow no diya pad kandan to kahanongan nigpa-anud-anud ka Diyus kandan! ¹⁹Pogkaponga pigguwa rin ka pitu no nasud to Kana-an, dow imbogoy rin soini no pasak to mgo gin-apuan taw. ²⁰Soi tibo no pighinang to Diyus sood to upat no gatus dow kalimahan no tuig.

"Dow pigbogajan din kandan to mgo taaghusoy dow ka igpadumaa kandan taman to timpu ni Samwil no tagailigan to Diyus. ²¹To kawugajan nigbuju kandan to hari, kaling imbogoy to Diyus si Sawlu no anak to Kis no saboka no kabuwaran ni Binhamin. Nighari si Sawlu kandan to sood to kapatan no tuig. ²²Aman no piggawangan on to Diyus si Sawlu

to pogkahari, si Dabid da na-an ka pigpili din no oghari kandan. Iyan soi in-ililng to Diyus, 'Nabonaan a ki Dabid no anak ni Jisi. Sug tumanon din ka tibo no igsugu ku kandin?'

²³Nig-iling si Pablu, "Si Hisus no manlilipwas no insa-ad to Diyus to Israil na pu-un to kabuwaran ni Dabid. ²⁴Aman no wara pad si Hisus mogpu-una to hinang din, nigpangudling si Huwan to tibo no Israilinhon nog pangajumpu kandan to mgo saa dan dow ogpabawutismu. ²⁵Aman no maga-an on ni Huwan ogkaponga ka impahinang to Diyus kandin, pig-ilingan din ka kaotawan, 'Atuk ko nigdoromdom kow no iyan a ka ogpasasagad now. Di kona! Puli a impauna. Makasunu kandin kanak, su inggad kanak, kona a angajan nog hinangon no suguanon din.'

²⁶Dow nig-iling si Pablu, "Mgo su-un, iyu no mgo kabuwaran ni Abraham dow iyu no kona no mgo Hudiyu di songo ogsimba da-an to Diyus, ita iyan ka pigparahan to Diyus to pangudlingon mahitongod to kalipwasan. ²⁷Di ka mgo Hudiyu no naman ugpa diya to Hirusalim dow ka mgo tigdumaa ran wara nama-an no si Hisus iyan ka manlilipwasay. Wara da-an makasabut to pig-ikagi to tagailigan to Diyus no nig-basa ran to kara arow no hihimaajay, di kandan nasi ka nigtuman to mgo nailag to mgo tagailigan to Diyus pinabaja to pogkaujuni ran ki Hisus nog himatajan. ²⁸Inggad ko wara saa no angajan nog himatajan kandin, di undag dan on pangamuju a si Pilatu nog pahimatajan si Hisus. ²⁹Dow aman no nahinang dan on ka tibo no pig-iling duon to Kasulatan no iyan ogkahitabu kandin, pigpurut dan kandin diya to krus dow ilobong. ³⁰Di pigbanhow kandin to Diyus likat to kamatajon. ³¹Dow sood to mahan-in no mgo arow nigpa-aha kandin to mgo otow no nigduma kandin likat to Galiliya pailing diya to

Hirusalim. Aman sikan no mgo otow iyan da-an kunto-on mgo titigus ki Hisus diya to Israil. ³²Dow soini koy kunto-on sug nanganon doy iyu to pangudlingon no insa-ad to Diyus to itaw no gin-apuan, ³³no pigtuman din on dini to ita no kabuwaran. Natuman soi pinabaja to pogbanhawa rin ki Hisus. Iyan soi nakasulat duon to ikaduwa no salmu no nig-iling,

'Ikow ka anak ku dow kunto-on ogpasiyantahan ku no kanak iyan ka amoy nu.'

³⁴Tongod su insa-ad on tahan to Diyus nog banhawon din kandin dow ka lawa rin kona ogkagasgasan su nig-iling kandin,

'Ka insa-ad ku diya ki Dabid ogtumanon ku diya to ikow.

³⁵Pig-iling pad iyan duon to mgo salmu,

'Kona nu iujun nog kagasgasan ka lawa duon to matinumanon nu no suguanon.'

³⁶Kona no si Dabid ka igpasabut su pogkaponga to pogdumaa rin to mgo otow sumaa to impahinang to Diyus kandin. Namatoy kandin no impahulid da duon to mgo gin-apuan din dow nagasgasan ka lawa rin. ³⁷Di si Hisus no pigbanhow to Diyus likat to kamatajon wara iyan kagasgasi. ^{38,39}Kaling mgo su-un, kinahanglan nog kama-anan now pinabaja ki Hisus no ig-ikagihon doy iyu ka batbatonon no ita ogkapasaylu to Diyus. Inggad hontawa ka ogtu-u ki Hisus pigmatarong on to Diyus soi. Kona no iyan on ogmakapasaylu to saa ta ka

pogbabali to pano-osan ni Muysis. ⁴⁰Kaling bawbantajay kow dow ka kona'g katuman ka innangon to tagailigan to Diyus iyu,

⁴¹'Iyu no manga bagi bagi ogkaboong boong kow on iyan tog hinangon ku. Ogmamatoy kow su duon timpu nog hinangon ku no kona now og katu-uhan inggad pad ko duon ognangon iyu.' "

⁴²Aman no pogguwa on ni Pablu dow si Birnabi duon to simbahan to mgo Hudiyu pignangonan kandan to mgo otow no liku kow ra to Arow to Hihimaajay dow ka ogmakapamatbat kow pad ogmakaisab. ⁴³Pogkaponga to pogsimba ran, mahan-in mgo Hudiyu dow konan mgo Hudiyu no napujuk to tinu-uhan to mgo Hudiyu no nigtu-u ki Pablu dow ki Birnabi pigbaghot kandan ni Pablu dow si Birnabi nog parajun kandan to pogsalig to Grasya to Diyus. ⁴⁴Aman no sunu no arow to hihimaajay pila ra na-an no otow to Antukya ka wara mogsimba sug paminog to pangudlingon to Magbabaja.

⁴⁵Pogka-aha to mgo Hudiyu no mahan-inka mgo otow no naman amut, nasina on iyan kandan dow pigsawoy ran ka pigpan-ikagi ni Pablu dow pigpasikawan dan pad kandin. ⁴⁶Di nasi on suga nigbuuti si Pablu dow si Birnabi. No nig-iling kandan duon to mgo Hudiyu, "Kinahanglan iyan no igpamatbat doy ig-una dini to iyu ka pangudlingon to Diyus. Di aman su pinakawara now on kandin no ogpakiyaa puli soi no iyu kona no angajan nog bogajan to untung no wara katamanan. Kaling taman kunto-on, diya koy on ogpangudling to konan mgo Hudiyu. ⁴⁷Su iyan soi insugu to Magbabaja kanami:

'Pighinang ku ikow nog makatang-ow to konan
mgo Hudiyu, pinabaja ikow ogtangkap ka
kalipwasan to tibu-uk Kalibutan.' "

⁴⁸Aman no pogkarinog to sikan to mgo Hudiyu naraga kandan
dow pigdajan dan ka pangudlingon to Magbabaja, dow ka
tibo no pigpili para to untung no wara katamanan nahinang
no tumutu-u. ⁴⁹Dow nigtangkap ka pangudlingon to
Magbabaja to sikan no banwa. ⁵⁰Di nighonghongan to mgo
Hudiyu ka mgo panguu duon to magonob no ugpa-an lagkos
ka mgo tumutu-u to Diyus dow ka mgo bibiyaon no mgo bohi,
dow pigpahilu-hilu dan si Pablu dow si Birnabi dow impaaguy
ran to sikan no banwa. ⁵¹Dow pigpamagpag ni Pablu dow si
Birnabi ka mgo aliyabuk duon to mgo kobong isip patahan
para kandan. Dajun andiya kandan to Ikunyu. ⁵²Nangaraga
on iyan ka mgo tumutu-u dow piglona-an kandan to Bala-an
Ispiritu.

Diya to Ikunyu

14 ¹Ka nahitabu diya to Ikunyu angod da da-an to
nahitabu diya to Antukya. Nig-andiya si Pablu dow
si Birnabi to simbahan to mgo Hudiyu. Dow tongod to
pogpangudling dan mahan-in mgo Hudiyu dow kona no mgo
Hudiyu ka nigtu-u ki Hisus. ²Di ka mgo Hudiyu no wara
mogtu-u, nighunghung duon to kona no mgo Hudiyu dow ka
ogkablanton ka mgo tumutu-u. ³Nawugoy duon si Pablu dow
si Birnabi. Wara pogtawtadha-ay ran mahitongod to
Magbabaja. Impa-aha to Magbabaja no tutu-u ka impan-
anad dan mahitongod to grasya rin, su pigbogajan din
kandan to gahom to poghinang to tanhaga dow mgo
kaboongan no hinang. ⁴Kaling, nasa-ad ka mgo otow to

sikan no magonob no ugpa-anan, ka sa-ad diya mogpagampi to mgo Hudiyu no wara mogtu-u, dow ka mgo sa-ad diya mogpa-gampi to mgo apustulis.

⁵Duon mgo Hudiyu dow kona no mgo Hudiyu, duma ran ka mgo panguu ran, nog papalanu nog pasakitan dow dorogpaki to batu ka mgo apustulis. ⁶Pogkama-ani duon to mgo apustulis no sikan ka planu, niglaguy on kandan diyad pailing to Listra dow diya to Dirbi, mgo maganob no ugpa-an no sakup to Likaunya, dow to nakalibong no banwa. ⁷Dow impangudling dan diya ka pangudlingon.

Pigdorogpakan to batu si Pablu diya to Listara

⁸Diya to Listra duon saboka no pogkot no ingkabata din on.

⁹Tagaod to nig-i-ingkud kandin namino'g to in-ikagi ni Pablu. Pigloonglongan ni Pablu ka pogkot na-aha din no duon pogtu-u rin nog kaulian kandin to Magbabaja. ¹⁰Kaling nig-ikagi si Pablu to mahagbot, "Tindog dow tul-id!" Dajun Nigtindog ka pogkot dow hiwhipanow. ¹¹Pogka-aha to mgo otow duon to pighinang ni Pablu, naman a-agyahaw to kandan no inikagihan, "Nigpama-atow on ka mgo bantoy dini to ita!"

¹²Piglanulanuhan dan si Birnabi ki Siyus, dow si Pablu piglanulanuhan dan ki Hirmis su kandin ka taagpamatbat.

¹³Ka uwagdoka to bantoy ran no si Siyus marani ra diya to guwa to maganob no ugpa-an dan kaling ka baylan ni Siyus nigdaa to mgo turu no baka no nigkulintasan to bulak diya to guguwa-an to maganob no ugpa-an kaliyagan din dow ka mgo otow no oglugbak diya to mgo apustulis. ¹⁴Pogkama-an ni Birnabi dow si Pablu to oghinangon dan poron, pighigbit dan ka kabo dan dow nigpinaaguy kandan diya to kabakna-an to mgo otow dow nangiyak. ¹⁵"Mgo su-un, manya to oglugbak

kow man kanami? Angod koy ra iyu no mgo otow. Nangudling koy puli to pangudlingon, dow kag kaojowan now soi wara puus no mgo hinang dow parani to bubuhi no Diyus kandin ka nighinang to langit, dow pasak, dow dagat dow inggad nokoy no botang. ¹⁶Tagna pigpabay-anan da duon to Diyus ka mgo otow kog hinang to kandan nog kaliyagan. ¹⁷Di to tibo no timpu impakiyaa to Diyus ka tu-un din diya to mgo otow pinabaja to marojow no hinang din. Pigbogajan kow to uran dow pig-uraan kow. Kaorak to pogko-on no imbogoy iyu para ogkaraga kow. ¹⁸Di inggad iyan on sikan pig-ikagi to mgo apustulis, wara dan on iyan kabaabagi ka mgo otow no oghimatoy to baka dow ka iglogbak kandan.

¹⁹Duon namanirrow no mgo Hudiyu no likat diya to Antukya no sakup to Pisidya dow ka duma likat to Ikunya pigpujuk dan ka mgo otow nog pagampi kandan pigabubuwbulagan dan to ogdogpak to batu si Pablu dow gujura dan pailing diya to guwa to mapono no ugpa-an, su nongon dan to pogdoromdom ko namatoy on kandin. ²⁰Aman no kamuu liwlibongi to mgo tumutu-u, nigpa-aligbangon kandin dow liku diya to Lungsud pogkabukas nigduruma on kandan no daruwa ki Birnabi diya to Dirbi.

Ka pogmakaliku diya to Antukya no sakup to Sirya

²¹Impangudling ni Pablu dow si Birnabi ka pangudlingon diya to Dirbi, dow mahan-in ka napujuk no nigtu-u ki Hisu-Kristu pogkaponga to sikan nigliku kandan diya to Listra, diya to Ikunya dow diya to Antukya no sakup to Pinisya.

²²Pigtaagson dan ka mgo tumutu-u dow pigbaghid no ogparajun iyan to pogtu-u ran pig-ikagihan dan da-an ka mgo tumutu-u, "Ogkahilu-hilu ta pad ka mawugon human ki

ogmakasood to Gingharian to Diyus. ²³Ka kara nangka banwa to mgo tumutu-u no nighihimun-himun si Pablu dow si Birnabi nigpili to otow no iyan ogpanguu. Namanaang nigkoon kandan dow nig-ampu para ta mgo pinili dow indihaa ran kandan to nigtu-uhan dan no Magbabaja.

²⁴Pogkaponga to sikan, nigbaja kandan diya to Gingharian to Pisidya dow nigtirow kandan to Parpilya. ²⁵Nangudling kandan diya to Pirga dow nigtogbong diya to Atalya. ²⁶Likat diya nigliku kandan dahipag to dagat to Antukya no sakup to Sirya, ka banwa no piglikatan dan in-ampota to mgo tumutu-u nauna no ogpanaanginan kandan to Diyus to oghinangon dan no napongahan dan on kunto-on.

²⁷Aman no pogtirow ni Pablu dow si Birnabi diya to Antukya pighimun dan ka tibo no mgo tumutu-u dow insaysay ran dajun kandan ka tibo no pighinang to Diyus pinabaja kandan. Dow nokoy no pinabaja no nigbogoy ka Diyus to higajun no ogmakatu-u da-an ka kona no Hudiyu. ²⁸Dow nawugoy pad ka pog-ugpa dan diya to Antukya duma ran ka mgo tumutu-u.

Ka pog-uboy uboy diya to Hirusalim

15 ¹Duon mgo otow no likat diya to Hudiyu no nig-andiya to Antukya dow nanohon to mgo tumutu-u no kandan no kona no mgo Hudiyu kona ogkaluwas ko kona ogpatuli sumaa to pano-osan ni Muysis. ²Mojow on si Pablu dow si Birnabi ogpamakig-apuu to mgo kaotawan namakag-bawbali-ngagay on. Kaling nangaujun on ka mgo tumutu-u nosi Pablu dow si Birnabi dow ka duma no tumutu-u diya to Antukya no og-andiya to Hirusalim para ogpakig-aha to mgo

Apustulis dow mgo panguu dow ka ogkahusoy ka na-a-
apuan dan.

³Kaling impadaa to punduk to mgo tumutu-u sing Pablu.
Pogbaja dan to Pinisya dow Samarya nignangonan dan ka
mgo tumutu-u nno duon da-an kona no mgo Hudiyu no songo
nigtu-u ki Hisu-Kristu. Pogkarinog dan to sikan, nangaraga-
daga kandan. ⁴Pogtirow nin Pablu diya to Hirusalim pigsima
sima kandan to punduk to tumutu-u, mgo apustulis dow mgo
panguu to punduk to tumutu-u. Insaysay ran ka tibo no
pighinang to Diyus kandan. ⁵Di duon mgo tumutu-u diya no
sakup to panong to Parisiyu. Namanindog no kagi ran,
"Kinahanglan nog tulion ka kona no mgo Hudiyu dow
ognangonan no ogtumanon ka pano-osan ni Muysis"

⁶Kaling pig-u-uw-ubajan to mgo apustulis dow mgo panguu
to punduk to mgo tumutu-u kanig a-aw-apuan dan.
⁷Pogkaponga to mahaba no pogpa-aw-apuway ran nigtindog si
Pidru no nig-iling, "Mgo su-un nama-ana now on no pigpili a
to Diyus likat diya to iyu nauna su ogpapangudlingon diya to
kona no mgo Hudiyu. Dow ka ogmakarinog da-an dow ogtu-u.
⁸Nama-anan to Diyus ka sood to ginhawa to mgo otow
impakiyaa rin to kona no mgo Hudiyu no pigsakup din da-an
kandan su pigsisingan din kandan to Bala-an Ispiritu angod
duon to pighinang din nauna ita. ⁹Ka pog-aha to Diyus ita no
mgo Hudiyu angod da to kona no Hudiyu. Tongod to pogtu-u
ran nabaliwas on ka saa ran. ¹⁰Manya to ogpanogkaron now
ka Diyus? Manya to ogkaliyag kow no ogpahilu-hilu on now ka
duma ta no mgo tumutu-u pinabaja to pogbalitbit to mgo
tumanon no anoy kira dow ka mgo gin-apuan ta di kona ki
ogmakatuman? ¹¹Nigtu-u ki no nalipwas ki pinabaja to Grasya

to Magbabaja no si Hisu-Kristu, dow ma-angod da-an duon to kona no mgo Hudiyu."

¹²Pogkarinog dan to sikan tibo kandan nakahagtong. Dow pigpaminog dan ka insaysay ni Birnabi dow si Pablu mahitongod to kaboonganganan dow mgo tanhaga no pighinang to Diyus diya to kona no mgo Hudiyu pinababaja kandan. ¹³Pogkaponga ran to pogsaysay, nig-iling si Santiyagu, "Mgo su-un paminoga a now. ¹⁴Insaysay ita ni Simun Pidru ka aw-anajan no pogsabi to Diyus to kona no mgo Hudiyu para duon da-an mgo otow no likat kandan no ogpasakup to Diyus. ¹⁵Su sumaa da-an to mgo insulat tagna to mgo tagailigan to Diyus, su nig-iling man ka kasulatan,

¹⁶Pogkanga to soini ogliku a, bakulion ku'g isaba ka Gingharian ni Dabid no naompag. Bakulion ku'g isaba likat to pogkaompag dan. ¹⁷Dow ka duma no mgo otow ogpan-aha kanakon, no ka tibo no kona no mgo Hudiyu pigsakup ku nog kahinang no ka-otawan ku. ¹⁸Iyan soi pig-ikagi to Magbabaja, nawugoy rinda innangon soi' "

¹⁹Nigparajun nig-ikagi si Santiyagu, "Para kanak kona tad ogpabajaran ka kona no mgo Hudiyu no nigtu-u to Diyus.

²⁰Nasi, no ogsulatan ta kandan no konad ogko-on to mgo pogko-on no intaapag to uwagdokan su in-ojow to tinu-uhan. Dow kona ogpanhilabot to kona din no asawa dow kona ogko-on to bubuhion no kona og-awas ka langosa. ²¹Soini ka mgo pano-osan ni Muysis no likat pad tagna no kunlajun ogbasaha to mgo Hudiyu to kara arow no hihimaajay diya to simbahan dan, ogpan-anaron dan to soi ka kara lunsud.

Ka sulat para to kona no mgo Hudiyu no nigtu-u ki Kristu

²²Dajun kanga ujun ka mgo Apustulis dow ka mgo panguu to panong to tibo no tumutu-u diya no ogpili diya to panong dan to tibo no mgo lukos no ogparumahon dan ki Pablu kow si Birnabi diya to Antukya. Si Hudas no piglanulanu dan ka Barsabas dow si Silas no iyan dan napili. Soini no mgo otawa duon mgo katongod to mgo tumutu-u. ²³Pig-iling duon to sulat no pigdaa ran:

"Kanami no mgo apustulis dow mgo panguu to punduk to mgo tumutu-u dini no mgo kasu-unan now ki Kristu, nangamusta iyu tibo no kona no mgo Hudiyu diyan to Antukya. Sirya dow diya to Sisilya. ²⁴Nabatbatan koy no duon mgo otow no napu-un dini to kanami no nig-andiyan to iyu no nan-anad to nakapataong to karomdomanan now. Wara doy sugua kandan diyan dow ka ogpan-anad to angod to sikan. ²⁵Kaling ka pogkarinog doy toi soi nighihimun-himun koy dajun dini iya na ujunan doy no ogpili koy to mgo otow no igpaduma doy kin Pablu dow si Birnabi no pigdogihan doy to ginhawa no mgo su-un ki Kristu. ²⁶Su impabaja dan on ka untung dan tongod to pogtuman to sugu to Magbabaja no si Kristu. ²⁷Si Hudas dow si Silas nigsugu doy diyan to iyu iyan tagibaoy kandan ka litukan to soi ikagihonon to sulat. ²⁸Naujunan doy pinabaja to pog-uling to Bala-an Ispiritu no kona og-isaban ka iyu no tumanon kinahanglan no soira kag bantajan now. ²⁹Kona kow ko-on to mgo pogko-on no intaapag to uwagdokan, kona kow ko-on to langosa dow ka mgo bubuhion no namatoy no wara mog-awas ka langosa, dow kona ogpanhilabot to kona din no asawa. Marojow kog likajan now sikan tibo. Sikan da."

³⁰Dajun naman hipanog ka mgo otow no pigsugu dan. Pogtirow dan diya to Antukya pighimun dan ka mgo tumutu-u dow imbogoy ran dajun ka sulat diya to kandan.

³¹Pogkabasa ran duon to sulat to mgo tumutu-u nabaghid dow naragadaga kandan. ³²Si Hudas dow si Silas mgo tagailigan to Diyus da-an, kaling mahan-in pad ka impan-anad dan to mgo tumutu-u no nabaghid kandan to pogtu-u ran. ³³Aman no pila on no arow kandan diya, nigliku on diya to Hirusalim, diya to mgo nigsugu kandan. Aman no wara pad kandan maka hipanow pig-ampuan pad kandan to mgo tumutu-u dow ka marojow ka poghipanow ran. ³⁴Di si Silas nakadorom-dom na ogpabilin pad diya. ³⁵Si Pablu dow si Birnabi nigpabilin pad diya to Antukya to pila no arow mahan-in da-an duma ran no nan-anad dow nangudling.

Nigsusuwoy siPablu dow si Birnabi

³⁶Aman no pila on no arow, nig-iling si Pablu diya ki Birnabi, "Likuan ta ka tibo no mgo mapono no ugpa-an no nangudlingan ta dow oglo-ohon ta ka mgo tumutu-u ko nokoy on ka kau-ugpa-ay ran." ³⁷Nig-ujun si Birnabi di ogkaliyagan din no ogdumahon da-an si Huwan no niglanu lanuhan din ki Markus. ³⁸Di kona ogkaliyag si Pablu ko ogdumahon si Markus su nauna no iyan pad kandan nigduruma nig-owowan kandan ni Markus diya to Pampiliya. ³⁹Mojow on ogpa-aw-apuway kandan. Nakaglainay on kandan, nigsusuwoy on kandan. Nigduma on ni Birnabi si Markus dow nigdahipag on kandan pailing diya to Sipri. ⁴⁰Si Silas iyan pigduma ni Pablu. Aman no wara pad kandan makahipanw pig-ampuan pad kandan to mgo tumutu-u no marojow ka poghipanog ran.

⁴¹Nig-andiya kandan to Gibanwahan to Sirya dow Silisya dow pigdigonan dan ka pogtu-u to mgo tumutu-u diya.

Nigduma si Timutiya ki Pablu dow si Silas

16 ¹Nigdajun sing pablu diya to Dirbi dow diya to Listra. Duon tumutu-u diya to Listara no si Timutiya ka inoy rin Hudiya dow tumutu-u ra-an, di ka amoy rin Grigu. ²Ogsasajaon si Timutiya to mgo tumutu-u diya to Listara dow diya to Ikunya. ³Kaliyagan ni Pablu ogdumahon si Timutiya, kaling ka pigtuli rin dow ka wara igkasawuy to mgo Hudiya ki Timutiya, su ka tibo no mgo Hudiya no nigugpa to sikan no banwa nama-anan dan no Grigu ka amoy ni Timutiya. ⁴Pogkaponga nanugbong kandan diya to mapono no ugpa-an dow impasabut dan to mgo tumutu-u ka mgo tumanon no naujunan to mgo apustulis dow mgo panguu to punduk to magtutu-u diya to Hirusalim. Pig-ikagihan dan ka magtutu-u nog tumanon dan sikan no mgo tumanon. ⁵Kaling nigdigon pad amani ka pogtu-u to mgo tumutu-u, dow arow-arow oghan-in ka ogtu-u to Diyus.

Ka lukos no taga Magindunya

⁶Nig-andiya dajun kandan to mgo banwa no sakup to Priga dow Galasya, su wara kandan ujuni to Bala-an Ispiritu no ogpangudling diya to Gibanwahan to Asya. ⁷Pogtiriow ran diya to pag-owangan to Misya, kaliyag poron kandan no og-andiya to Gibanwahan to Bitanya, di ka Ispiritu ni Hisus wara mog-ujun kandan. ⁸Kaling niglaboy on kandan to Gibanwahan to Misya dow nigtugbong diya to mapono no ugpa-an to Truwas. ⁹Sikan no karukiloman duon impa-aha to Diyus ki Pablu, no otow no nigtitindog no taga-Masidunya no

nigpakawkahid-u kandin kagi ruon to otow, "Dahipag dini dow buligi koy." ¹⁰Kaling naninos koy on sug andiya koy on to Masidunya, tongod to narinog doy no pigtawag koy to Diyus su igpapangudling koy to mgo otow diya.

Nigtu-u Si Lidya ki Hisus

¹¹Nigluwan koy to luwananan diya to dagat likat diya to Truwas nigparahus koy to puu to Samutrasya, pogkabukas to sikan no arow naka tirow koy diya to mapono no ugpa-an to Niyapulís. ¹²Likat koy to Niyapulís nig-andiya koy to Pilipus no tawtaga-ay no maganob no ugpa-anan to banwa to Masidunya. Kahan-inan to nig-ugpa duon dow ka mgo panguu ran no matig Ruma. Nig-ugpa koy pad to pila no arow.

¹³Natuman on ka arow no hihimaajay, nigguwa koy diya to maganob no ugpa-an. Nig-andiya koy to higad to wohig su atuk ko duon himunanan to mgo Hudiyu diya no ogmaman-ampu, duon da-an mgo bohi no songo nahimun diya. Kaling ka nig-ingkud koy dow nakig-uboy-uboy koy kandan. ¹⁴Duon naka-amut no naminog kanami no si Lidya no matig-Tiyatira no mamaligya-ay to mahalón no manggad noo mangaogdog. Tigsimba da-an to Diyus dow pigtangkug to Magbabaja ka ginhawa rin no pig-ujunan ka pig-ikagi ni Pablu.

¹⁵Nigpabawutismu kandan no nangkabajaan. Pighinggat koy pad ni Lidya to og-andiya to baoy ran. Kagi rin, "Ko tu tu-u no ogdorum domon a now no kanak tumutu-u to Magbabaja diya kow pad lumun to baoy ku." Wara kandin mogpaboona, kaling nigduma koy.

Nangapirisu sing Pablu dow si Silas diya to Pilipus

¹⁶Songo arow to sikan no kamuu koy ogpailing diya to himunanan to pog-ampu, pigtagbu koy to dawraaga, no suguanon. No nig-ongonan to tagailagan no busow. Duon bajad to ogpatagna kandin no iyan on ogpurut ka agaon din to bajad. ¹⁷Dow sikan ni bohiyuna iyan da tuungan to oglupog lupog kanami ki Pablu ka bohi, no kagi rin no ungud ogpangiyak, "Soi no mgo otawa mgo suguanon to Diyus no makagagahom! Nangudling kandan iyu dow ka ogkama-anan now ko og-omonuhon now to pogkalipwas!" ¹⁸Iyan da tuunganan to sikan to kara arow, mojaw-on pigpowahan on si Pablu. Kaling lingi a iyan ni Pablu ka bohi dow ikagihi rin ka busow no nignangon kandin, "Pinabaja to ngaran ni Hisus og-abugon ku ikow laguy kad diya to kandin!" Dajun nighuwa-an kandin. ¹⁹Aman no natangkod on no konad ogkasaapi ka tagisugoanon kandin dow ka labaw, pigdakop dan on si Pablu dow si Silas dow gujud-gujura ran diya to palasa para no igpa-atubang to mgo labaw to sikan no banwa. ²⁰Pignangonan dan ka mgo panguu, "Mgo Hudiyu soi no mgo otow no ogsamuk dini to maganob. ²¹Nan-anad kandan to mgo batasan no supak to ita no balaud. Mgo Rumanhon kiw, in-
ojow ita ka pogtuman to tinu-uhan dan. ²²Gugupi-i ran iyan sing Pablu. Pogkaponga, impapanhigbit to panguu ka mgo kabo nin Pablu dow si Silas dow pagupi-i ran. ²³Pogkaponga to pogpagupi-i, impapirisu ran. Pigtaagson dan ka nigbantoy nog tuwarongon dan tog bantoy. ²⁴Kaling ka diyad kandan ipamagkot to sungguk to pirisuhan.

²⁵Aman no tonga on to karukiloman, nig-ampu si Pablu dow si Silas dow nigkakanta to pogsaja to Diyus. Ka duma ran no pinirisu iyan tuungan tog papaminog. ²⁶Hignali iyan mo'g

tiyog puli iyan nangahujung ka pirisuhan dow mga puwai ka mgo habangan dow nangatangga ka sagikaa no impamagkot kandan. ²⁷Iyan on ingkabowat duon to nighbantoy to nangapuwa-an on ka habangan to pirisuhan, nangon din to pogdomdom ko namaka sabuk on ka mgo pinirisu, kaling ka pigdagtu din ka kalis su og-ogot on poron. ²⁸Di nighbansagon si Pablu, "Kona ka og-ogot su soi koy ra to sood!" ²⁹Puli pigpamidpid ka nighbantoy no nigdaraa to saong no nigpinaaguy dow mo'g luhod diya to atubangan ni Pablu dow si Silas. ³⁰Dow, dumaha rin si Pablu diya to guwa dow nanginsa kandin, "Nokoy man kag hinangon ku dow kag kalipwas a ?" ³¹Nigtabak si Pablu, "Tu-u ka to Magbabaja no ia Hisu-Kristu dow kag kalipwas ka dow ka gipun nu. ³²Pig-udlingan dajun kandan ni Pablu no songo gipun. ³³Sikan lagboy no karukiloman pighunaran duon to nighbantoy ka mgo pali dan. Pigbawutismuhan dajun kandan no nangka gipun. ³⁴Pogkaponga to sikan pigduma rin sing Pablu dow pako-ona diya to baoy rin, nadaga daga ka nangka gipun no duon on pogtu-u ran to Diyus.

³⁵Pogkabukas pigsugu to mgo panguu ka mgo pulis no ogpasabukan on sing Pablu. ³⁶Pigbatbatan duon to nighbantoy sing Pablu kagi rin, "Ogpasabukan kow on kunto-on to mgo panguu. Diya kow on marojow ubag poron ka poghipanow now." ³⁷Di pig-ikagihan ni Pablu ka mgo pulis no pigsugu to mgo panguu, "Kona ogkabaoy no ighinobonga dan ka pogsabuki kanami. Su ogmakaliras kandan to Pano-osan to Ruma no songo Rumanhon koy da-an wara koy ran pad ungora sukit sukita nasi no unguran koy ran pad pagupi-i diya to kahan-inan to mgo otow dow iliku koy ra na-an iusab diya to pirisuhan. Kinahanglan no iyan lagboy og-andini ka panguu no ogsabuk kanami." ³⁸Pognangoni duon to mgo pulis

to pig-ikagi ni Pablu no mgo Rumanhon da-an kandan, pigpangoba kandan. ³⁹Kaling nig-andiya ka mgo panguu to pirisuhan dow namuju to pasaylu diya kin Pablu. Dajun sabuki ran sing Pablu dow nangamuju kandan no oglaguy on to sikan no banwa si Pablu dow si Silas. ⁴⁰Aman no makaguwa on si Pablu dow si Silas diya to pirisuhan, namanandiya dajun kandan to baoy ni litya. Dow nigpakiglambag pad kandan to mgo inudlingan diya dow pigdanos dan pad kandan para madigon ka pogtu-u ran pogkaponga namanhipanow dajun kandan.

Diya to Tisalunika

17 ¹Nanlaboy-laboy kandan to Anpipulis dow diya to Ampulunya human makatirow to Tisalunika. No duon simbahan to mgo Hudiyu. ²Nabatasan ni Pablu no kunlajun kandin ogsood to simbahan dan. Sood to totowu no arow no hihimaajay ka pogpan-anad din to mgo otow diya pinabaja to impassulat no pangudlingon. ³Impasabut no si Kristu kinahanglan iyan no igduwagid to bajad dow ogkabanhow. Nig-iling si Pablu, "Sikan ignangon ku iyu no si Hisus iyan si Kristu." ⁴Namanu-u ka duma to pigbatbat ni Pablu, dow naman-amut on kandan kin Pablu dow ki Silas. Hahan-inan da-an mgo Grigu no namanimba to Diyus dow mgo bibiya-on no naman-amut kandan.

⁵Di nangabowu ka mgo Hudiyu dow pan himuna ran pad na-an ka mgo langog langog. Aman no mahan-in on kandan, pigpu-una-an dan on to pog-a-agyahaw diya to magonob no ugpa-anan. Dow susuung dan ka baoy ni Jisun no pigdatongan ni Pablu su ogdaahon dan sing Pablu dow si Silas diya to kahimunan. ⁶Di wara dan masaponi si Pablu dow si Silas

kaling iyan dan on pigdakop si Jison dow ka duma ran no mgo tumutu-u dow panggujud-gujura ran diya to mgo panguu to magonob nog ugpa-an naman babansagon ka mgo otow no kagi ran, "Soi no mgo otawa ungud ogsisinamuk inggad hondoï ogpailing ungud ogbalitbit to tinu-uhan dan. No kunto-on dini ra na-an to magonob no ugpa-an ta.

⁷Impaponhik pad kandan ni Jison diya to baoy rin. Oglirason dan ka Pano-osan to Impirador su og-iling kandan to duon pad saboka no hari no ognagranan ki Hisus." ⁸Pogkarinog soi to mgo otow dow ka mgo panguu nangagiyambut kandan.

⁹Impabajad dan pad si Jison dow ka mgo duma rin human dan saboki.

Diya to Biriya

¹⁰Pogkarukilom to sikan pigsugu to mgo tumutu-u sing Pablu dow si Silas diya to Biriya. Pogtirow ran diya nig-andiya dajun kandan to simbahan to mgo Hudiyu. ¹¹Mgo dakag ka mgo otow diya to Biriya kona duon to otow diya to Tisalunika kaliyagliyagan dan ka impan-anad ni Pablu. arow arow ran og-aha-a ka impasabut no pangudlingon dow ka ogkama-anan dan ko tutu-u ka pig-kagi ni Pablu. ¹²Kaling ka mahan-in ka namanu-u inggad ka mgo lukos mgo bibiya-on no matig-Grisya no namanu-u. ¹³Aman no pogkama-ani to mgo Hudiyu no diya to Tisalunika no si pablu nangoudling da na-an diya to Biriya lupuga ra na-an dow hunghungi ka mgo otow to pogsisinamuk diya. ¹⁴Kaling imbu-us dajun to mgo tumutu-u si Pablu diya to baybajon. Di nigpakibilin pad sing Silas dow si Timutiyu diya to Biriya. ¹⁵Ka nigbu-us ki Pablu nigduma pad kandin taman diya to Atinas. Nanugun si Pablu duon to naman-uli no igpa-agpas da igpawupug si Timutiyu dow si Silas diya to Atinas.

Si Pablu diya to Atinas

¹⁶Kamuu ogtatagad si Pablu ki Silas dow si Timutiyu diya to Atinas, pogka-aha ni Pablu no hahan-inan ka mgo kinuros, nataong-taong on iyan kandin. ¹⁷Kaling nigsood kandin diya to simbahan to mgo Hudiyu dow nakig ubuy-uboy kandan maangod da-an to kona no mgo Hudiyu no nigsimba to Diyus. Kara arow ogpakig uboy-uboy kandin to mgo otow no ogkaambag din diya to palasa. ¹⁸Duon mgo mag-a-anaray no daruwa no panong nog ngaranan to Ipikuryu dow Istuyku no nakig apuu ki Pablu no namanikagi ka duma, "Ma-aa ra duon kag kangaikagi to soi no otow?" Nig-iling da-an ka duma, "Angod to bugti man no Diyus kag batbaton din." Kaling naikagi ran sikan su nangudling man si Pablu mahitongod to pogkabanhaw. ¹⁹Kaling pigduma ran si Pablu diya to himunanan to mgo panguu to lunsud no pigngaranan to Ariyupagu. Kagi ran diya to kandin, "Kaliyagan doy ogpaminogi ka bag-u no tinu-uhan nog nangonon nu."
²⁰Nabag-uhan koy to sikan ogkanangon nu, kaling ogkaliyagan doy ogpaminoga ko nokoy sikan. ²¹Su ka mgo taga-Atinas dow ka diya napu-un to songo banwahan no diyad nig-uw-ugpa-ay iyan da tuungan kag pamatbat to mgo bag-u no nawnangonon."

²²Kaling nigtindog si Pablu diya to kabakna-an to mgo otow no nangahimun diya to Ariyupagu no nig-iling, "Mgo tagbanwa to Atinas na-aha ku no mgo matinumanon kow to tinu-uhan. ²³Su pogligbut ku kani to magonob nog ugpa-an now na-aha ku ka simbahan now. Duon pad na-aha ku no uwagdokan no duon sulat no nig-iling, 'To Diyus no wara now pad mama-ani iyan ka Diyus no ignangon ku iyu. ²⁴Iyan soi ka Diyus no nighinang to kalibutan dow ka tibo no kanid on to

soi kandin ka Magbabaja to langit dow pasak, kaling ka wara kandin mog-ugpa to mgo uwagdoka to mgo otow.²⁵ Konad kinahanglan nog buligan ta pad kandin iyan pad nasi nigbogoy to untung to mgo otow dow ka tibo no pigkinahanglan ta.

²⁶Likat to songo otow ra pignabuwad to Diyus ka tibo no kabagbagan taman to nasawud to tibu-uk Kalibutan. Likat pad to pu-una-an pigplanu on tahan to Diyus ko hondo i gipamaugpa ka mgo otow dow ko hondo ra taman.²⁷ Soi tibo pighinang to Diyus dow ka ogpanaagsobon ta ra duon kandin.

²⁸Su pinabaja to gahom din na buhi ki dow naka hisuhisu ki. Ojow pa to pamasabasa now no untuu ki rin no anak.²⁹ Aman su mgo anak ki man to Diyus, kona ta ogdoromdomon no ka Diyus angod to mgo kinuros no buwawan, saapi, batu no puli ra tobo toboa to poghinang to otow.³⁰ Tagna, no wara pad makakiya ka mgo otow to Diyus, wara dan balibaliha ka saa dan di kunto-on pigsugu to Diyus ka mgo otow inggad hondo no banwa to pogpangajumpu dow ojowan dan on ka mgaro-ot no hinang dan.³¹ Su nahina-at on napili to Diyus ka arow to matarong no poghukum din to tibo no mgo otow dini to kalibutan pinabaja to napili din no otow. Impasabut din soi to tibo pinabaja to pogbanhow din to soi no otow likat to kamatajon."

³²Pogkarinog dan to pig-ikagi ni Pablu bahin to pogkabanhow, puli ra bagi-bagi a kandin duon to sa-ad. Di ka duma nigmaniling, "Liku ka ra dini sug kaliyag koy pad ogpaminog to sikan ogbatbaton nu."³³ Dajun nighipanow on si Pablu.³⁴ Ka duma no mgo lukos nigpa-gampi kandin dow nigtu-u. Saboka no duma ran da-an si Diyunisyu no sakup to Aryupagu, dow duon pad da-an bohi no si Damaris, dow duon pad mgo duma.

Diya to Kurintu

18

¹Pogkaponga to sikan, niglikat si Pablu diya to Atinas nigdajun diya to Kurintu. ²Duon nakiya rin no mag-asawa no si Akilya dow si Pirisilya no Hudiyu no matig Puntu. Bag-u pad kandan nakatirow likat to Italya su duon sugu to Impirador no si Kalawudju no kinahanglan no ogpamaagujon to Ruma ka mgo Hudiyu. Pigsabinitan ni Pablu ka mag-asawa diya to baoy ran. ³Aman su og-a-angod kandan no ogkama-an ogpanhinang to pinajag/tulda/binaka/soorong/ diyad kandin moglomun to kandan dow nigdorama on kandan to pogpanhinang. ⁴Kara arow ogpangudling si Pablu to mgo Hudiyu dow mgo Grigu diya to simbahan to mgo Hudiyu kaliyag kandin no ogtu-u kandan ki Kristu.

⁵Ka pogtirow ni Silas dow si Timutiya likat to Masidunya, iyan da tuungan ni Pablu kag pangudling impasabut din to mgo Hudiyu no si Hisus iyan da si Kristu. ⁶Di pigsupak dan si Pablu dow pig-ikagihan pad to maro-ot no katarongan, kaling inhiyab din ka aliyabuk to sabint din. Nig-iling kandin diya to kandan, "Iyu on no saa kog logparan kow to Diyus. Warad labot ku taman kunto-on diya ad ogpangudling to kona no mgo Hudiyu. ⁷Kaling pig-ojowan din ka mgo Hudiyu dow diyad kandin mogdatong to baoy ni Titu-hustu. Kona no Hudiyu soi no otow, di nigsimba to Diyus, dika baoy rin duon lagboy to hugkud to simbahan to mgo Hudiyu. ⁸Sin Krispu no nangka gipuun no tigdumaa to simbahan to mgo Hudiyu namanu-u da-an to Magbabaja no si Hisus, dow mahan-in pad da-an matig-Kurintu no naka dinog ki pablu no nigtu-u dow nigpabawutismu da-an.

⁹Songo karukiloman to sikan, nigpa-atow ka Magbabaja ki Pablu nigpa-aha, dow nig-ikagi, "Kona kag kaharok, parajun ka pangudling dow kona ka sigkon." ¹⁰Su duma a nu mahan-in ka pinili ku kani to soi maganob no ogpa-an, kaling wara oglangob ogpasipaa ikow." ¹¹Kaling songo tuig dow tonga ka pog-ugpa ni Pablu diya to Kurintu dow pogpan-anad din to pangudlingon to Diyus.

¹²Di aman no iyan on si Galyun Gubirnadador to Akaya, nigsasabut sabut ka mgo Hudiyu dow darakopa si Pablu dow daraha diya ki Galyun dow insumbung. ¹³Nig-iling kandan, ogpamujukon din ka mgo otow to pogsimba to Diyus no supak to tinu-uhan ta." ¹⁴Umpat tog ikagi on poron si Pablu. Nig-iling si Galyun to mgo Hudiyu, "Ko soi no husajon no in atubang now kanak ko maro-ot pa no hinang dow amani pa mabogat no saa, ogpaminogon ku iyu. ¹⁵Di kabali kow na-an to soi iyan da ka mgo apuwun mgo ngaran dow mgo balaud now kona a ogsambag to soi." ¹⁶Impaguwa dan dajun kandin diya to Maghusajay. ¹⁷Pogkaponga pigdakop dajun to mgo Grigu si Sustinis no panguu to simbahan to mgo Hudiyu dow gugupi-i dan diya lagboy to atubangan to Maghusajay, di warad iyan mogbalibali si Galyun to soi.

Nigliku si Pablu diya to Antukya

¹⁸Nawugoy-lugoy pad ka pog-ugpa ni Pablu diya to Kurintu duma ka mgo tumutu-u dow nigdajun kandin diya to Sinkriya duma rin ka mag-asawa no si Prisilya dow si Akila. Nigpatabuug kandin to bubu su duon insa-ad din to Diyus dow natuman din on ka insa-ad likat to Sinkriya nigdahipag kandan diya to Sirya. ^{19,21}Nighapit pad kandan diya to Ipisu dow nig-andiya si Pablu to simbahan to mgo Hudiyu no

nigpag-uboy-uboy kandan. Pignangonan dan pad kandin nog pakibilin pad diya to kandan, di wara mog-ujun si Pablu. Poglikat din on, nig-iling kandin, "Di ko pogbo-ot to Diyus, ogliku ara dini to iyu." Imbilen ni Pablu ka mag-asawa no si Prisilya dow si Akila diya to Ipisu dow nigdahipag kandin pailing to Sirya.

²²Pogdu-ung din diya to Sisarya, pigdajunan din pad ka punduk to tumutu-u diya to Hirusalim. Pogkaponga nigtugbong kandin diya to Antukya. ²³Warad kandin moglaguy diya, poglikat din pigligbut din pad ka mgo banwa to Galasya dow Pirigiya dow impadigon din ka pogtu-u to mgo inudlingan diya.

Si Apulus

²⁴Duon saboka no Hudiyu no matig-Alihandriya no nigtirow diya to Ipisu. Ka ngaran din si Apulus. Marojow kandin nog pan-iw-ikagi dow mahan-in ka nama-anan din bahin to kasulatan. ²⁵Tahan on kandin nama-an pinabaja to Magbabaja. Danos kandin nog pangudling dow tutu-u ka impan-anad din mahitongod to Magbabaja no si Hisus, di iyan dinda nama-anan ka in-anad ni Huwan no bawutismu.

²⁶Wara kandin maharok to pogpangudling diya to simbahan to mgo Hudiyu. Pogmakarinog ni Pirisilya dow si Akila to impan-anad din, pighinggat dan kandin diya to baoy ran impasabut dan pad da-an ka pama-agi to Diyus. ²⁷Aman nog kaaliyag og-andiya si Apulus to Akaya, pigdanos kandin to mgo tumutu-u to Ipisu. Pigsulatan dan ka mgo tumutu-u diya to Akaya no ogsiwsimahon dan si Apulus. dow pogtirow din diya dogi rogi ka ingkabulig din no hinang to mgo tumutu-u tongod to Grasya to Diyus. ²⁸Su madigon on iyan ka mgo

katarongan din no likat to kasulatan no si Hisus iyan ka Kristu. Konad iyan ogka-apuwan si Pablu diya to kabakna-an to mgo otow.

Si Pablu diya to Ipisu

19 ¹Aman no diya pad si Apulus to Kurintu, nig-andiya si Pablu to mgo kabubunganan to gibanwahan taman to nakatirow kandin diya to Ipisu. Nangaambag din diya ka mgo inudlinagn. ²Pigpan-insa-an din kandan, "Nakadawat kow on buwa to Bala-an Ispiritu dow no nigtu-u kow on?" Nigtabak kandan, "Wara koy man gani makadinog no duon ogngaranan to Bala-an Ispiritu. ³Nanginsa si Pablu kandan, "Nokoy no bawutismu ka inbawutismu iyu?" Nigtabak kandan, "Ka bawutismu ni Huwan." ⁴Nig-iling si Pablu kandan, "Ka bawutismu ni Huwan para to pogpangajumpu di nig-iling si Huwan duon to mgo otow no kinahanglan no ogtu-u kandan duon to ogmakasunu kandin, no si Hisus." ⁵Pogkarinog dan to sikan, pigbawutismuhan dajun kandan to ngaran to Magbabaja no si Hisus. ⁶Pogdap-ona ni Pablu to uu ran pigbuusan dajun kandan to Bala-an Ispiritu. Naka iakgi dajun kandan to ikagihonon no kona dan no inikagihan dow namakapan-ikagi to pangudlingon to Diyus. ⁷Sampuu dow daruwa kandan no mgo lukos.

⁸Sood to totowu no buwan, ka ungud pogsinood ni Pablu diya to simbahan to mgo Hudiyu. Wara kawkaharok din to pog-ikagi duon to mgo otow. Nigpakig-apuu kandin dow impasabut din kandan ka mahitongod to poghari to Diyus.

⁹Di ka duma ran mgo masinupakon kona'g tu-u, inggad diya to mahan-in no mgo otow ogdo-ot-do-oton dan ka mgo pangudlingon to Diyus. Kaling niglaguy si Pablu diya to

simbahan dan, dow pigduma ka mgo inudlingan ni Hisus, arow arow diya kandin ogpangudling to tungha-anan no iya ni Tiranu. ¹⁰Sood to daruwa no tuig iyan din pighinang sikan, kaling ka tibo no nig-ugpa duon to Gibanwahan to Asya, nakadinog ka tibo no Hudiyu dow ka kona no mgo Hudiyu to pangudlingon to Diyus.

Ka mgo anak ni Iskiba

¹¹Kona no mgo puli puli ka pighinang to Diyus pinabaja ki Pablu no mgo kaboongan. ¹²Inggad ku tuayla ra dow ka mgo manggad nog maka dogkot kandin ogmakauli on tog kangarawuhan dow'g kanga ulian ka pig-ongonan to mgo busow. ¹³Kunto-on, duon mgo Hudiyu no niglogob-logob to pogpan-abug to mgo busow diya to mgo otow no pig-ongonan. Og-antihan dan poron no oggamiton ka ngaran to Magbabaja no si Hisus su ogpaguwa on ka busow. Pig-ilingan dan ka busow, "To ngaran ni Hisus no in nangon ni Pablu, suguon ku iyu to poglaguy." ¹⁴Iyan da-an sikan pighinang duon to pitu no mgo anak ni Iskiba no lukos. Si Iskiba panguu da-an to pari to mgo Hudiyu. ¹⁵Pig-antihan dan poron to ogpaguwa ka busow to ngaran ni Hisus. Puli ra nig-iling ka busow, "To nakiyaa ku si Hisus dow ko hontawa si Pablu, di iyu hontawa kow man?" ¹⁶Kugpahi iyan kandan duon to pig-ongonan to busow dow pangambanga, warad iyan kandan maka atu, namakapakuag no namakapahawahawa no nangapalian. ¹⁷ingkabanawug sikan no hitabu to mgo Hudiyu diya to Ipisu dow nangaharok kandan, dow ingkapahimantug pad ka ngaran to Magbabaja no si Hisus. ¹⁸Mahan-in ka mgo tumutu-u diya no nig-angkon dow nignangon to mga do-ot no hinang dan. ¹⁹Mahan-in da-an ka mgo salamangkahan no pinanangab dan ka mgo libru dan diya to kabak na-an to mgo

otow. Pig-ongod ongod no milyun ka kantidad to ka pinanangab. ²⁰Pinabaja to soi no hitabu ingkabanawug pad amani ka gahom to pangudlingon to Diyus.

Ka pogkagisaw to Ipisu

²¹Pogkaponga to sikan nadomdoman ni Pablu nog dajun pad kandin diya to Masidunya dow diya to Akaya human kandin ogliku diya to Hirusalim, kagi rin, diya ad oglikat to Hirusalim kog andiya a to Ruma. ²²Impauna rin diya to Masidunya ka daruwa no pananalig din no si Timutiya dow si Irastu taga-od pad kandin nigpakibilin diya to Asya.

²³Sikan no timpu duon dogi no kasamuk mahitongod to pogsupak to pangudlingon diya to Ipisu. ²⁴Duon namanaasaa to mgo dipalata no nigngaranan ki Dimitriyu. Naman hinang kandan to angod to piwpinajag ni Artimis no sinasaa no dipalata. No igpamaligya dan ig-ungud. ²⁵Kaling pighimun din ka pananalig din to mgo hinangon dow ka mgo mananaasaa to dipalata. Kagi rin, "Mgo pananalig ku, nama-anan now no likat to soi pogpanasaa ta ogmakasaapi ki. ²⁶Na-aha now dow narinog now ka nighinang to soi no otawa no si Pablu. Nig-ikagi kandin no ka mgo diyus no hininang to otow kona no untuu no mgo diyus mahan-in ka nigtu-u kandin dini to Ipisu dow inggad hondo no banwa to Asya. ²⁷Mojow man nog kakaingowan on ka mgo sinaasaa ta dow konad ogbobolihon kona da-an no iyan da sikan, ogtatamhangon on ka pogkabantugan to kinurus ta no si Artimis no pigsimba to Asya dow to tibo no nig-ugpa to Kalibutan." ²⁸Pogkarinog to mgo otow nangabowu-bowu kandan dow papangiyak, "Gamhanan si Artimis to mgo matig-Ipisu!" ²⁹Nasamuk samuk ka tibo no magonob no ugpa-an, pigdakop dan ka

duma ni Pablu no si Gayu dow si Aristarku no matig-Masidunya. Piggujud gujud dan ka daruwa pailing diya to kahan-inan. ³⁰Ogpanabang poron si Pablu di ppigsaparan to mgo inudlingan. ³¹Duon nangakiyaa ni Pablu no mgo panguu to gibanwahan to Asya no nanugun ki pablu no kona kandin igpa-andiya to himunanan. ³²Guguuban amani ka mgo otow, wara mabarong barong ka duma ko nokoy ka ingkahimun dan, kaling inggad nokoy ka igpangiyak dan. ³³Duon otow diya no si Alihadru no intutuud to mgo Hudiyu diya to kahan-inan para igpapangatarongan no wara labot dan no mgo Hudiyu to pighinang nin Pablu. Impatikang din ka bowad din su ogpahagtongon ka mgo otow³⁴Di pogkama-ani to mgo otow no Hudiyu mana-an kandin, undag on nigpapangiyak kandan tibo, "Gamhanan si Artimis to mgo matig-Ipisul!" Sood to daruwa no uras ka ungud dan pogpapangiyak to sikan.

³⁵Aman no nawugoy-lugoy on nasaparan da to tigdumaa to magonob no ugpa-an ka mgo otow, dajun nig-iling kandin, "Mgo matig-Ipisu, nama-anan to tibo no mgo otow no ita no matig-Ipisu ka tig-atiman to timplu ni Artimis no gamhanan dow manugpung no batu no na uug likat to langit. ³⁶Kona igkahobong soi, kaling ongod-ongod kow ra dow kona kow inagpas. ³⁷Inhatod now soi otow dini no wara manakow diya to timplu wara da-an mogpasipaa to inotow. ³⁸Ko si Dimitriyu dow ka duma rin no mananaasaa to dipalata duon igkasumbung to inggad hontawa no otow, duon Maghusajay dow mgo taaghusoy ta, diya kandan mogsumbung. ³⁹Di ko duon pad bugtyi no igkasumbung now, kinahanglan oghusajon sikan to na-anaran no poghusoy. ⁴⁰Kunto-on dilikadu ki to soi pighinang taw. Atuk ko isusumbung ki to mgo panguu diya to Ruma no nighinang ki to kasamuk. Wara katarongan ta ko

manya to pighinang ta soi. ⁴ⁱPogkaponga rin to pog-ikagi to sikan, impamauli din ka mgo otow.

Diya to Masidunya dow Grisya si pablu

20 ¹Pogkaponga to samuk-samuk, impatawag ni Pablu ka mgo inudlingan ni Hisus, pitaagson din kandan, nigpanumaid dajun kandin su og-andiya to Masidunya.

²Mahan-in banwa no pig-andiya-an din to Masidunya dow pigdigon din ka mgo tumutu-u pinabaja to pogpangudling din kandan, nigdajun kandin diya to Grisya, ³nakaugpa pad kandin diya sood to totowu no buwan. Aman nog dahipag on poron kandin diya to Sirya. Nama-anan din nog himatajan kandin to mgo Hudiyu, kaling ka naka dorom dom kandin no ogliku ogbaja to Masidunya.

⁴Nigduma kandin si Supatir no matig-Birya no anak ni Piru, dow si Aristarku dow si Sigundu no mgo matig-Tisalunika, si Gayun no matig-Dirbi, si Timutiyu dow ka matig-Asya no si Tikiku dow si Tropimu. ⁵pogtirow doy diya to Pilipus, nig-una kandan diya to Turuwas diyad kandan mogtagad kanami. ⁶Impalipwas doy pad ka Kahuugan to Pan no Wara Igpatulín human koy niglikat diya to Pilipus. Lima no arow ka pogluwan doy to luwananan to dagat dow naka'g aha-aha koy ra diya to Turuwas. Nig-ugpa koy pad diya to sood to pila no arow.

Nabuhian si Iyutiku

⁷Marukilom to sabadu nighihimun-himun koy su ogtitibag-tibag koy to pan. Su umpat to og dahipag on si Pablu to pogkasunu no arow, nangudling kandin taman to tonga to karukiloman. ⁸Mahan-in ka mgo saong diya to babow no lawang no duow to pighimunan doy. ⁹Duon bawbata diya no

ogngaranan ki Iyutiku no nig-i-ingkud diya to bintana, aman su nawugoy ka pogpangudling ni Pablu, pighuum on kandin mojaw onno naliporong on kandin dow na-anok anok on iyan kandin dow maug iyan likat diya to ikatowu no andanas. Hinu-un dan madagap no namatoy on kandin. ¹⁰Niglugsad si Pablu dow langkobi rin si Iyutiku dow kopkopi. Dajun nig-iling kandin duon to mgo otow, "Kona kow'g kataong bubuhi kandin!" ¹¹Dow nigliku ponhik si Pablu diya to babow, nigtibag-tibag to pan dow nigko-on. Pogmakaponga rin to nigko-on nigpangudling pad kandin. ¹²Kabawbata no nauug no si Iyutiku duma ran on to nig-uli no bubuhi, naraga-daga amani kandan.

Likat to Turuwas pailing diya to militu

¹³Nig-una koy luwan to luwananan to dagat pailing diya to Asus su nig-iling si Pablu no ogtuujon kandin diya to Asus su oghipanow ra duon kandin pailing diya. ¹⁴Aman no naka'g aha koy on diya to Asus impaluwan doy on kandin nigdajun koy on diya to Mitilin. ¹⁵Pogkabukas, likat to Mitilin, nigdajun koy pad diya to Kiyus. Pogkabukas da na-an diya koy on to Samus, dow pogkabukas da na-an diya koy on to Militu. ¹⁶Wara koy on moghapit diya to Ipisu, su kona ogkaliyag si Pablu ko ogkangaan pad diya to gibanwahan to Asya, su og-agpas kandin og-andiya to Hirusalim no kona pad ogkatuman ka Pintikustis.

Mgo panaagson ni Pablu to mgo tigdumaa to punduk to mgo tumutu-u diya to Ipisu

¹⁷Aman no diya si pablu to Militu imparaokat din ka mgo panguu to punduk to mgo tumutu-u diya to Ipisu. ¹⁸Pogtirow

ran, nig-iling si Pablu kandan, "Nama-anan now ku nokoy ka pighinang ku no diyan a pad to iyu, taman to pogtiriow ku dini to gibanwahan to Asya. ¹⁹Mapa-anud anuron a no nigbabali to insugu to Magbabaja duma to mgo luha. Induwagid a to pogkabajari tongod to maro-ot no planu to mgo Hudiyu no nangakablang kanak. ²⁰Nama-anan now no wara ku iyu hobongi to iyu no karojawan no impan-anad ku diya to kahan-inan dow gibaajan. ²¹pigtahanan ku ikagihi ka mgo Hudiyu dow ka kona no mgo Hudiyu no kinahanglan no ogpangajumpu kandan dow ogpasakup to Diyus dow ogtu-u to Magbabaja no si Hisus. ²²Kunto-on paminog kow, og-andiya-ad to Hirusalim su pigsugu a to Bala-an Ispiritu, wara ku mama-ani ko nokoy kag kapailingan ku diya. ²³Iyan da nama-anan ku no inggad hondo no magonob no ugpa-an no nanga-andiya-an ku, ogpatahan. ²⁴Di inggad pad ko nokoy ka ogkabaybaja-an ku baagaron kud basta ogkaponga ku ka impahinang kanak to Magbabaja nosi Hisus, no iyan ka pangudlingon mahitongod to kahid-u to Diyus."

²⁵"Nalogob kud iyu to pogpangudling mahitongod to poghari to Diyus, nama-anan ku no kona kiw on ogmakaglawlambag usab. ²⁶Kaling ogpatahanan k iyu, no ko hontawa ka konag kalipwas warad labot ku to atubangan to Diyus. ²⁷Wara ku iyu hobongi to karomdomanan to Diyus para to iyu.

²⁸Panigpod kow to tu-un now dow ka mgo otow to Diyus no indihaa iyu to Bala-an Ispiritu, atimana now ka panong to tumutu-u ti Diyus no napurut din to tu-un din no langosa.

²⁹Su nama-anan kud no kog kalious ad on duon mgo gaw-on no ogpan-anad no og-amut iyu dow kag makasuwoy kow to pogtu-u. ³⁰Di to kawugajan duma now ra to panong ka ogbagla iyu to pogtu-u no ogkaliyagan din ko iyan ogpaminogon. ³¹Kaling paniguru kow, dow doromdoma now

sood to totowu no tuig ma-arow dow marukilom wara a moghagtong ka ungud ogmaymay iyu dinumahan ka mgo lukos ku.

³²"Dow kunto-on igdihaa ku iyu to Diyus dow diya to ikagihonon din mahitongod to kahid-u rin, no naka padigon to pogtu-u now dow naka bogoy iyu to tibo no karojawan dow to tibo no nahinang no mgo anad din. ³³Wara a mog-amos to saapi dow manggad. ³⁴Nama-anan now no nanlimbasog a dow ka duon ogkagastu ku to mgo kinahanglan ku dow ka mgo duma ku. ³⁵Pighinang ku sikan dowka igpa-aha ku iyu no kinahanglan no ogpanlimbasog kiw dow ka ogkabuligan ta ka mgo aju aju? Kanunoy ta ogdoromdoma ka pig-ikagi to Magbabaja no si Hisus no kawkampa ka nigbogoy kona ka nigdawat."

³⁶Pogkaponga ni Pablu toig-ikgi naman luhud kandan dow mog-ampu. ³⁷Nigsisinogow kandan tibo, piggakos dow pigharokan dan si Pablu. ³⁸Nataong amni kandan su nig-iling si Pablu no konad on kandan ogmakag aha'g usab. Dajun imbu-us dan si Pablu diya to luwanan.

Pog-andiya ni Pablu to Hirusalim

21 ¹Nanumaid koy to mgo panguu to mgo tumutu-u diya to Ipisu, nigdahipag koy diya to Kus. Pogkabukas nakatirow koy diya to puu to Rudas. Likat diya nigdaju koy pailing diya to Patara. ²Duon na-aha doy no luwananan to dagat no uma-andiya-ay to Pinisya, kaling nigluwan koy. ³Natandow doy ka puu to Sipri, di wara koy on mogtawu on niglipas koy nasi diya to kalintu-u dapit nigdahus koy on diya to Sirya diya koy mogdu-ung to mapono no ugpa-an to Tiru su duon impanhaw as to

lawananan diya. ⁴Pigpangaha doy ka mgo inudlingan, dow nigsimanahan koy pad diya, pigbahog dan si Pablu pinabaja to Bala-an Ispiritu, no konad og-andiya to Hirusalim.

⁵Pogkaponga to songo simana nigparajun koy pad to pogdahipag. Kandan tibo, lagkos ka mgo asawa ran dow ka mgo kabata-an, nighatod kanami diya to guwa to maganob no ugpa-an. Naman luhud koy diya tibo diya to baybajon dow pamangajumpu. ⁶Aman no nakapanumaid koy on kandan, nigluwan koy on to luwananan to dagat dow naman-uli on kandan.

⁷Likat diya to Tiru nigpadajun koy to pogpangudling pailing diya to Tulimayda. Pogtirow doy diya, nigpag-aha koy to kasu-unan ki Kristu dow nasaboka-an koy pad diya to kandan. ⁸Pogkabukas nigdahipag koy ra na-an pailing diya to Sisarya. Pogtirow doy diya nig-andaya koy to baoy ni Pilipi no mangungudling, dow diya koy paratong ki Pilipi, saboka to pitu no napili diya to Hirusalim no ogbulig to mgo apustulis. ⁹Duon anak din daaga no tibo tagailigan to Diyus. ¹⁰Pogmakapila duon da-an naka tirow no tagailigan to Diyus likat diya to Hudiya. No ogngaranan ki Agabu. ¹¹Pigdanihan koy rin dow puruta ka bakos ni Pablu, dow baku a rin ka mgo kobong din dow mgo bowad din, dow nig-iling kandin, "Sumaa to Bala-an Ispiritu, angod da-an to soi kag hinangon to mgo Hudiya diya to Hirusalim to ta'g tu-un to soi no bakos, dow igdihaa dajun kandin diya to kona no mgo Hudiya. ¹²Pogkarinog doy to soi pigsaparan doy poron dow ka mgo taga diya to konad on ogdajun diya to Hirusalim. ¹³Di puli ra nigtabak si Pablu, "To manya tog sisinogow kow? Pigpawutajan a now nigpabahawan a now andam-a nog pabaku dow mamuwa diya to Hirusalim tongod to ngaran to Magbabaja no si Hisus."

¹⁴Kona doy on iyan ogkataawiran si Pablu, kaling ka puli koy

ra na-an nakailing to, "Nasi no iyan poron ogkatuman ka pogbo-ot to Magbabaja."

¹⁵Aman no nakapila on ka pog-ugpa doy nanhimus koy dajun dow andiya to Hirusalim. ¹⁶Duon da-an inudlingan no nigduma kanami. Pigduma koy ran diya to baoy ni Minason no matig-Sipri dow diya koy nigdatong to kandin. Si Minason saboka duon to tawtaga-ay no inudlingan .

Na numbaoy si pablu ki Santiyagu

¹⁷Pogdatong doy diya to Hirusalim, nangaraga-daga no nigpagsima kanami ka mgo kasu-unan diya ki Kristu.

¹⁸Pogkabukas, nigduma kanami si Pablu no nanumbaoy ki Santiyagu. Diya da-an ka mgo panguu to punduk diya tumutu-u to Hirusalim. ¹⁹Nanaahuran si Pablu kandan dow nigpamatbat mahitongod to nighinang to Diyus diya to kona no mgo Hudiyu pinabaja kandin.

²⁰Pogkarinog dan to pigbatbat din kandan pigsaja dan ka Diyus. Dajun pig-ikagihan dan si Pablu, "Nama-an ka buwa su-un linibu on ka mgo Hudiyu no nigtu-u ki Hisus no tibo kandan nigbalitbit to pano-osan ni Muysis. ²¹Nakaranog kandan no nan-anad ka to mgo Hudiyu no nig-ugpa duon to banwa to kona no mgo Hudiyu no kona dan on kinahanglan no ogbalitbiton ka pano-osan ni Muysis no nig-iling ka kun no kona dan on ogtulion ka mgo anak dow konad on ogtumanon ka duma pad no bubuhaton to mgo Hudiyu. ²²Nokoy buwa ka marojow no oghinangon kunto-on? Kona no duwaruwa no nama-anan on kandan no dini kad. ²³Marojow buwa no oghinangon nu ka igkasambag doy ikow duon upat dini no lukos no duon pana-ad to Diyus. ²⁴Duma ka kandan dow

hinanga now ka pogbaliwas. Bajari no ka kinahanglan dan to pogtaapag to Diyus dow ka ogmakapatabuug kandan! Iyan soi pama-agi dow ka ogkama-anan dan no ka batbatonon mahitongod ikow kona no tutu-u su ogka-aha dan no ikow ogbalitbit da-an to mgo pano-osan ni Muysis. ²⁵Ko mahitongod to kona no mgo Hudiyu no nigtu-u ki Hisus naka paraa koy on to surat bahin to naubay-ubajan no kona kandan ogko-on to mgo pogko-on no igka taapag diya to uwagdoka, langosa, dow ka mgo bubuhi-on no namatoy no wara mog-awas ka langosa. Dow kona oghilabot to kona din no asawa." ²⁶Kaling pogkabukas pigduma ni Pablu ka upat no lukos dow nig-amut kandin to pogbaliwas dan sumaa to panaad dan. Dow dajun nig-andiya si Pablu to timplu dow ka ogkama-anan ko kagan-u ogkaponga ka pogbalowas dan su ogkaponga to soi duon igtaapag no bubuhi-on kara saboka.

Pogdarakopa ki Pablu

²⁷Aman no marani on ogkaponga ka ikapitu no arow to pogbaliwas, duon mgo Hudiyu no niglikat to Asya no naka-aha ki Pablu diya to Timlu. Pighunghungan dan ka mgo otow diya to Timplu dow ka ogdakopon si Pablu. ²⁸Nigpangiyak kandan, "Mgo Israilinhon, bulig kow! Iyan soi ka otow no inggad hondo ogpailing ogpan-anad supak ita no mgo Hudiyu, supak to pano-osan ni Muysis, dow supak to soi timplu dow kona no sikan da, pigduma rin pad ka kona no Hudiyu dini to sood to timplu saboka soi no pogpasipaa no to soi Bala-an no timplu!" ²⁹Nakaikagi kandan to soi su na-aha dan si Trupimu no matig-Ipisu no nigduma ki Pablu diya to Hirusalim, dow nangon dan no pigduma ni Pablu soi no otow diya to timplu. ³⁰Kaling nagiyasow ka mgo otow to Hirusalim dow pamakuag pailing diya to timplu su ogdakopon dan si

Pablu. Pigdakop dan si Pablu dow piggujud dan diya to gawas pogkaponga piglokoban dan ka habangan to timplu. ³¹Su oghimatajan dan on poron, aman su naka dinog ka agaon to sundawu no taga Ruma no kasamuk ka mgo otow to Hirusalim. ³²Kaling ka agaon nigduma rin dajun ka mgo sundawu dow ka mgo aw-agon diya to nahimun no mgo otow pogka-aha to mgo otow no duon mgo sundawu nahagtongan dan to oggugupi si Pablu. ³³Dow dani to agaon si Pablu dow dakopa, dow ipakabo ka daruwa no sagikaa. Nanginsa dajun ka agaon diya to mgo otow, "Hontawa man otawa soi dow nokoy man ka nahinang din no sajop?" ³⁴Konad oga-angod-angod ka tabak no narinog din, di tongod to ogkagulisow ka mgo otow wara maloongi ko nokoy ka nahitabu. Kaling pig-andaa to agaon ka mgo sundawu no ogdumahon si Pablu diya to kampu. ³⁵Pogtirow ran diya to habangan to kampu pigsasapipi ra ra-an puli to mgo sundawu si Pablu sug gagawhaton on to mgo otow no nangaangotan. ³⁶Piglulupog to mgo otow no naman papangiyak to, "Himataji now on!"

Pigtabak ni Pablu ka mgo sumbung

³⁷Aman no ogdaahon on si Pablu diya to sood to kampu nig-ikagihan din ka agaon, "Duon og-ikagihon ku poron ikow."

Nigtabak ka agaon, "Makaikagi ka mana-an to Grigu?"

³⁸Nangong ku ko ikow ka otow no matig-Ihptu no nanguu to pogribildi to gubirnu kunto-on no bag-u, upat no libu ka mgo bagani no duma rin diya to ka-awangan." ³⁹Nigtabak si Pablu, "Saboka a no Hudiyu no matig-Tarsu no bantugan no Siyudad to Silisya. Ko ogkabawuy paikagiha apad diya to mgo otow." ⁴⁰Pig-ujunan kandin to sundawu no og-ikagi, kaling nig tindog si Pablu diya to habangan dow larawani rin

ka mgo otow no duon ig-ikagi rin, aman no nahagtong on kandan, nig-ikagi kandin to inikagiyan dan no Hibriyu.

22

¹"Mgo su-un dow mgo ginikanan, paminogi now pad ka katarongan ku!" ²Pogkarinog to mgo otow no nig-ikagi kandin to inikagiyan no Hibriyu, namakahagtong on iyan kandan. Dow nigparajun nig-ikagi si Pablu. ³Saboka a no Hudiyu a no na otow to Tarsu no sakup to Silisya, di dini ad katulin to Hirusalim. Nigtungha a dini dow ka taisturu ku si Gamalil. Nainagak a lagboy to pogbalitbit to pano-osan no pigbalitbit to mgo gin-apuan ta. Dow angod da-an iyu kunto-on no mabaga ka pog-alagad to Diyus. ⁴Impahilu-hilu ku taman to kamatajon dan ka nigbalitbit to pama-agi ni Hisus kona no mgo lukos da inggad ka mgo bohi impadakop ku dow ipapirisu. ⁵Ka pangguu no pari dow ka tibo no sakup to Maghusajay to mgo Hudiyu nakasiyanta to soi pig-ikagi ku. Kandan lagboy ka nigbogoy kanak to mgo surat no para to mgo kasu-unan ta no mgo Hudiyu diya to Damasku. Dow tongod to nigbogajan a to katongod to sikan no surat. Nig-andiya a to Damasku dow ka ogpandakopon ku ka mgo otow no namanu-u ki Hisus dow liku a pangdumaha dini to Hirusalim dow kag logparan kandan.

Pigsaysay ni Pablu ko manya to nahinang kandin no inudlingan

⁶Moong-oong no maudtu sikan no nakadani-rani koy on to Damasku. Hignali duon makasilang no maajag no nigbandog kandak no likat to langit. ⁷Natuad a diya to pasak dow duon narinog ku no lagong no nig-iling kanak, Sawlu Sawlu! Manya to impahilu-hilu a nu? ⁸Nanginsa a, 'Hontawa ka man? Nigtabak ka lagong iyan a si Hisus no matig-Nasarit no

pigpahilu-hilu nu. ⁹Na-aha to duma ku ka lajag di wara kandan makadinog to lagong no nigpag-uboy uboy kanak.

¹⁰Dow nig-isab a nig-insa, 'Magbabaja, nokoy man kag hinangon ku?' Nig-iling kandin, 'Tindog dow andiya to Damasku. Duon ognangon ikow diya ko nokoy ka igpahinang to Diyus ikow.' ¹¹Kona ad ogmaka-aha su amani to kaajag. Kaling pigkikipit a ra na-an to mgo duma ku pailing to Damasku.

¹²"Duon otow diya to Damasku no pigngaranan ki Ananiyas. Soi no otow matinumanon pano-osan dow tinahuran to tibo no mgo Hudiyu no nig-ugpa diya. ¹³Nig-andiya kandin to kanak dow nig-iling, 'Su-un, ogmaka-aha kad on.' Dajun nahamaagan ku si Ananiyas. ¹⁴Nig-iling kandin kanak, 'Nigpili ka to Diyus to gin-apuan ta dow kag kama-anan nu ka pogbo-ot din, dow ka ogka-aha nu ka matarong no suguanon dow'g karinog nu ka lagong din. ¹⁵Su ipamatbat nu to tibo ka narinog nu dow ka na-aha nu. ¹⁶Nokoy pad man kag tagaran nu. Tindog! Dow pabawutismu dow huraa kad kandin dow ka ogkapasaylu ka mgo saa nu.'

Pigsugu si Pablu to pogpangudling diya to kona no mgo Hudiyu

¹⁷"Pogkaponga to sikan nigliku a to Hirusalim, kamuu ag-ampu diya to timplu nigpa-atow kanak. ¹⁸Na-aha ku ka Magbabaja no si Hisus dow nig-ilingan a, 'Agpas kad on! Hipanow dow laguy kad dini to Hirusalim, su ka mgo otow kona ogpaminog to ignangon nu.' ¹⁹Nig-iling a kandin, 'Magbabaja, nama-anan dan lagboy no naligbut ku ka mgo kasimbahan to mgo Hudiyu dow ka ogpandakopon su ogpamirisuhon ku ka mgo otow no nigtu-u ikow. ²⁰Dow ka

nighimatoy ki Istiban no nigpangudling mahitongod ikow, saboka a no nig-ujun nog pahimatajan kadin, dow iyan a pad nigbabantoy to mgo kabo to nighimatoy kandin.' ²¹Di nigtabak ka Magbabaja kanak, 'Hipanow kad su ogsuguon ko ikow diya to mariyu no banwa dow ipangudling nu ka udling ku diya to kona no mgo Hudiyu.' "

²²Pogkaikagi ni Pablu to sikan, warad maminog ka mgo otow. Nigpangiyak kandan, "Himataji now kandin! Kona'g kabawuy nog buhion dini to kalibutan ka otow no angod kandin.

²³Nigparajun pad kandan nog papangiyak, impanimbag dan ka mgo sabinit dan dow sawod to aliyabuk. ²⁴Dajun andaa duon to labow no agaon no matig-Ruma ka mgo sundawu rin to ogpasooron si Pablu diya to kampu dow ogpahilu-hilu on dow ka ogmakaikagi ko nokoy ka sajop no nahinang din su manya to ungod ogpangiyak nog kangabaw-balingagan ka mgo Hudiyu kandin. ²⁵Aman nog babako-on on si Pablu su ogpahilu hiluon on, pig-ikagihan ni Pablu ka kapitan to sundawu no nigtitindog diya to dani rin, "In-ujun buwa to Pano-osan nog pahilu-hilu on now ka otow no matig-Ruma no wara pad mama-ani no sajopan?" ²⁶Pogkarinog duon to kapitan, pig-andiya-an din ka agaon dow ikagihi, "Nokoy man soi igpahinang nu? Matig-Ruma mana-an sikan no otow!" ²⁷Kaling, pig-andiya-an to agaon si Pablu dow nanginsa, "Nangoni a matig-Ruma ka iyan?" Nigtabak si Pablu, "Ho-o." ²⁸Nig-ikagi dajun ka agaon, "Nahinang a no matig-Ruma pinabaja to pogbajad ku to dogi no saapi." Nigtabak si Pablu, "Matig-Ruma a lagboy likat pad to pogka-otow ku." ²⁹Namakaondud ka mgo sundawu nog lampos poron ki pablu. Naharok da-an ka agaon su impabaku din si Pablu no Rumanhon mana-an kandin.

Pigduma si Pablu diya to Maghusajay to mgo Hudiyu

³⁰Kaliyagan pad duon to agaon nog ukit ukiton ko manya to igsusumbung pad nto mgo Hudiyu si Pablu. Kaling, pogkabukas pigpahubaran din to baku no sagikaa si Pablu dow nighiumun ka labow to pari dow ka maghuhhusoy to mgo Hudiyu. Dajun ipa-atubang dan si Pablu diya to kandan.

23 ¹Pigloonglongan on iyan ni Pablu ka mgo sakup to taaghusoy dow nig-iling, "Mgo su-un mahitongod kanak, marojow ka ginhawa ku diya to atubangan to Diyus pailing kunto-on." ²Ppogkaikagi ni Pablu to sikan pignangonan ni Ananias no panguu to pari ka namantitindog to dani ni Pablu no igparagpang ka baba ni Pablu. ³Nig-iling si Pablu diya to kandin, "Dagpangon ka ra-an to Diyus, ikow no ungud ogpalibu-libu! Anoy sug hukuman anu sumaa to pano-osan nokoy na-an tog lirason nod ka pano-osan su igpadagpang a nu!" ⁴Nig-iling ka mgo otow no namantitindog diya to dani ni Pablu, "Nigpagaba-gaba ka no nig-ikagi to sikan diya to panguu no Pari to Diyus!"

⁵Nigtabak si Pablu, "Mgo su-un ku, wara a mama-an no kandin mana-an ka panguu to Pari, su nig-iling ka impasulat no pangudlingon no kona ki og-ikagi to maro-ot diya to nigdumaa ita." ⁶Aman no pogka-aha ni Pablu no duon mgo Sadusiyu dow mgo Parisiyu no nig-amut diya, nigbawbansagon kandin duon to ngo maghuhhusoy to mgo Hudiyu, "Mgo su-un saboka a da-an no Parisiyu, dow Parisiyu da-an ka amoy ku dow ka mgo gin-apuan ku insusumbung a kani su duon pog-iman ku no duon pogkabanhow."

⁷Pogka-iagi rin to sikan nasamuk ka Parisiyu dow ka mgo Sadusiyu nasa-ad ka nig-amut to husoy. ⁸Iyan ingka-iling to sikan su kona ogtu-u ka mgo Sadusiyu no duon pogkabanhow. Kona da-an kandan ogtu-u no duon da-an mgo diwata dow mgo ispiritu. Di ka soi tibo pigtu-uhan to mgo Parisiyu.

⁹Kaling nigpu-una da na-an kandan mogpamabawbansagonay. Diya duon mgo mag-anaray to pano-osan no mgo Parisiyu no nigtindog no nigsupak no nig-iling, "Wara na-aha doy no maro-ot no pighinang to soi no otowa. Atuk ko duon ispiritu dow ko diwata no nakig-uboy-uboy kandin!"

¹⁰Nig-undag on ka pogpama-aw-apuway ran mochow on no nahimonow on ka agaon kog hihihiniton dan si Pablu. Kaling ka pigsugu din ka mgo sundawu rin nog lugsaran dan si Pablu dow puruta diya to kabakna-an to mgo otow dow ogdumahon diya to kampu.

¹¹Pogkarukilom to sikan nigpa-aha ka Magbabaja ki Pablu no nig-iling, "Kona kag kaharok! Su nigpasabut ka mahitongod kanak dini to Hirusalim, kinahanglan no iyan nu ra-an sikan oghinangon diya to Ruma."

Ka pogplanu to poghimatoy ki Pablu

^{12,13}Pogkabukas to sikan nighihimun-himun ka kapin kapatan no mgo Hudiyu dow nigplanu kandan ko nokoy kag hinangon dan. Nangibot kandan no konad iyan ogko-on dow og-inom taman to kona dan pad ogkamatoy si Pablu. ¹⁴Dajun nama-andiya kandan to mgo labaw to Pari dow diya to mgo panguu to Hudiyu dow nig-iling, "Namangulibot koy no kona ogko-on to inggad nokoy taman to kona doy pad matatoy si Pablu.

¹⁵Kaling iyu dow ka mgo maghuhusoy ogma-anon now on ka

agaon to sudawu no Rumanhon nog kaliyagan now no igpa-atubang din igpaisab si Pablu dini to iyu. Ogpalibu-libu kow no ogkaliyagan now kandin ungud og-ukit-ukita. Di kona pad kandin ogmakatirow dini oghimatajan doy on."

¹⁶Di soi no planu narinog to anakon ni Pablu no lukos. Ka anak to su-sn din no bohi, kaling nig-andiya kandan to kampu dow nangoni si Pablu. ¹⁷Dajun pigsabi ni Pablu ka saboka no upisyal/katongoranon/duon katongod diya dow ikagihi, "Dumaha nu soi bawbata diya to agaon, su duon ignangon din kandin." ¹⁸Kaling pigduma duon to kapitan ka bawbata diya to agaon. Pogmakatirow ran diya nig-iling ka kapitan, "Pigsabi a to prisu no si Pablu, no nigpangamuju si Pablu kanak no igpaduma dini to ikow soi bawbata, su duon kun ignangon ikow." ¹⁹Pigkipit to agaon ka bawbata dow duma diya to mariyu no konad on ogkadinog to duma. Dajun pig-insa-an din to, "Nokoy man ka ignangon nu kanak?" ²⁰Nig-iling ka bawbata, "Nangaujun ka mgo Hudiyu no ogpangamuju dini't ikow no igpa-atubang si Pablu diya to Maghusajay asoom. Su ungud dan kon ogsukit-sukita. ²¹Di kona ka ogtu-u kandan, su subra kapatatan ka mgo otow ka nigbangan kandan diya to daan. Nanapa kandan no kona ogko-on dow og-inom ko kona dan pad ogkamatoy si Pablu. Dow andam on no nigtatagad da na-an to pog-ujun nu. ²²Nig-iling ka agaon kandin, "Kona kad iyan pannangon to inggad hontawa nog ikagihan nu." Dow ka bawbata nig-uli on dajun.

Inhatod si Pablu diya ki Gubirnadur Piliks

²³Dajun ipasabi to agaon ka daruwa no mgo kapitan dow pig-ikagihan kandan, "Hina-ata now ka daruwa no gatus no mgo sundawu su igpa-andiya ku iyu to lunsud to Sisarya. Dumaha

now da-an ka kapituwan no taga komagan. Hipanow kow gaja ko mgo alas nuwibi to marukilom.²⁴Hina-ata da-an ka kabaju nog kaluwanan ni Pablu. Dow bantaji now kandin siguruhi dow ka wara'g kahitabu kandin taman makatirow diya ki Gubirnadur Piliks."²⁵Dow nigsusulat da-an ka agaon diya to Gubirnadur no nig-iling:

²⁶"Taahuron no Gubirnadur Piliks iyan a si Kalawudju Lisiyas no nangamusta ikow.²⁷Soi no otow pigdakop to mgo Hudiyu sug himatajan dan poron. Di pogkama-ani ku no Rumanhon kandin, nigduma ku ka mgo sundawu dow kag kalipwas kandin.²⁸Kaliyagan ku poron nog kama-anan ku ko manya to igsumbung kandin, kaling ka impa-atubang ku kandin diya to Maghusajay.²⁹Nama-anan ku no wara nahinang din no maro-ot para'g himatajan dow'g pirisuhon. Ka insumbung dan kandin mahitongod da to Pano-osan dan.³⁰Kaling pogkama-ani ku no pigsabutan on kandin to mgo Hudiyu nog himatajan, nakadorom dom a no suga pad igpahatod ku kandin diya to ikow. Dow pignangonan kud ka namanumbung kandin no diyan on igpasumbung to ikow."

³¹Pigbabali to mgo sundawu ka insugu kandan. Pogkarukilom to sikan pig-andiya-an dan si Pablu dow dumaha diya to Antipatris.³²Pogkasoom to sikan, ka mgo sundawu no nigmanhipanow iyan da nigliku diya to kampu dow ka naman luwan to kabaju iyan da nigduma ki Pablu.³³Pogtirow ran diya to Sisarya, imbogoy ran ka surat diya to Gubirnadur dow indihaa ran si Pablu kandin.³⁴Pogkabasa rin to surat, pig-insa-an din si Pablu ko taga hondo kandin no Gibanwahan. Pogkama-ani rin no matig-Silisya si Pablu,³⁵nig-iling kandin, "Oghusajon ku ka kabilinggan prublima ko

ogdatong ka namanumbung ikow." Pigbantajan din si Pablu diya to palasyu no pighinang tagna ni Hirudis.

Insusumbung si Pablu to mgo Hudiyu

24 ¹Pogmakalima on, nig-andiya si Ananiyas to Sisarya no panguu to Pari duma rin ka pila no katow no mgo panguu to mgo Hudiyu dow ka Abugadu no si Tirtulu. Nig-andiya kandan ki Gubirnadur Piliks dow insumbung dan si Pablu. ²Impa-angoy si Pablu, aman no nakatubang on kandin pigpu-una-an on ni Tirtulu ka pogsumbung ki Pablu. Nig-iling kandin, "Taahuron no Gubirnadur tongod to marojow no pogdumaa nu nigkopot ka kalinaw to nasud doy. Dow mahan-in ka nahinang nu no karojawan to nasud doy. ³Kaling dogi amani ka pog-uhang doy ikow dow kona doy on iyan soi ogkalingawan. ⁴Kunto-on, kona kud oglugajon paminogi nu pad su duon pad majopot nog ikagihon doy. ⁵Nasiyantahan doy no soi no otawona no ogpatumina, no ogmakabogoy to kasamuk to mgo Hudiyu to gawa to kalibutan, dow panguu kandin to panong nog ngaranan to Nasarinu. ⁶Inggad ka timplu doy nog antihan din to pogpasipaa. Kaling pigdakop doy kandin pinabaja to kanami no Pano-osan. ⁷Di nigtirow ka agaon no si Lisiyas dow piglogos-logos din puruta diya to kanami si Pablu. ⁸Dow nig-iling kandin no ka duon sumbung kandin kinahanglan nog andiya to ikow. Kog sukit-sukiton now soi no otawona ogkama-anan nu ko tutu-u ka tibo no insumbung doy kandin. ⁹Dow nigdusun da-an ka mgo Hudiyu diya no tutu-u iyan ka tibo no naikagi ni Tirtulu.

Pigtabak ni Pablu ka mgo sumbung kandin

¹⁰Pogkaponga to sikan, piglarawanan to Gubirnadur si Pablu no iyan da na-an ogpatabakon. Dow dajun ikagi si Pablu, "Nama-anan ku no nawugoy kad on no maghuhusoy kani to soi no nasud. Kaling naliyag a nog pangatarongan kunto-on kani to tubaangan nu. ¹¹Ko ogka-anma-anon nu su sampuu dow daruwa pad no arow ka niglaboy taman to pogtiriow ku to Hirusalim no nogsimba. ¹²Soi no mgo Hudiyu warad maka-aha no ungud a ogpakig-apuu to inggad hontawa dow ko nigsinamuk to mgo otow diya to timplu dow ko diya to simbahan to mgo Hudiyu dow ko inggad hondo no banwa diya to maganob no ugpa-an to Hirusalim. ¹³Kona ran man da-an ogkatindogan diyan to ikow no tutu-u ka mgo igkasawuy ran kanak. ¹⁴Di kag angkonon ku dini atubaangan nu iyan soi: Ka Diyus to mgo gin-apuan doy pigsimba ku to pama-agi no ojow pa to soini no mgo otawona, iya kun sikan to sajop no panong. Di nigtu-u a ra-an to tibo nasulat to pano-osan ni Muysis dow ka tibo no pigsulat to mgo taga-ilagan. ¹⁵Ka pog-iman ku to Diyus angod da duon to kandan no pog-iman, no ka tibo no otow, marojow dow maro-ot, ogbanhowon din. ¹⁶Kaling ka pigpanaman-tamanan ku kunlajun ka pogtagon to lubas/marojow no karomdomanan ku diya to atubangan to Diyus dow diya mgo otow.

¹⁷"Aman no pila on no mgo katuigan ka pogmakadiyu ku to Hirusalim nigliku a diya su nigdaa a to saapi no andunu/hinabang para to mgo duma ku no mgo Hudiyu dow kag makataapag a da-an to Diyus diya to timplu. ¹⁸Dow diya a ran matirawi no nigtaaapag pogkaponga to pogtuman ku to insugu to pano-osan mahitongod to pogbaliwas. Pipilahon da ka otow to sikan no timpu, dow wara kasamuk. ¹⁹Di duon mgo

Hudiyu diya no likat to Gibanwahan to Asya. Kandan poron ka angajan nog atubang ikow ko duon man igkasawuy ran kanak. ²⁰Di aman su wara kandan dini, ipaikagi ka mgo otow no kani kunto-on ko nokoy ka na-aha dan no kanak no sajop no sukit-sukiton a diya to Maghusajay. ²¹Su wara duma no naikagi ku no pogtitindog ku diya iyan da soi, insumbung aran kunto-on su ogtu-u a no ogkabanhow ka nangamatoy?"

²²Su mahan-in on ka nama-anan ni Piliks nauna mahitongod to pama-agi to pogpangudling to mgo tumutu-u ni Hisus, nigkonan din ka husoy nig-ikagi kandin, "Oghusajon ku ra soi ko ogtirow on ka agaon no si Lisiyas." ²³Pogkaponga pig-andaa rin ka tininti no ogpabantajan si Pablu, di ogbogajan da-an kandin to maintok no kalingkawasan dow og-ujunan da-an ka mgo kadumahan din no ogbogajan kandin to mgo panginahanglan din.

Si Pablu duon to atubangan ni Piliks dow si Drusila

²⁴Pogkaponga to pila no arow nigliku si Piliks dow pigduma rin ka asawa rin no si Drusila no songo Hudiyu. Impasabi rin si Pablu su ogpaminog kandin to pogsaysay rin mahitongod to pogtu-u ki Kristu Hisus. ²⁵Di aman nog ikagi on si Pablu mahitongod to tutu-u no pamatasan, to pogtigoo to tu-un dow mahitongod to pasasagaron no arow to poghukum, naharok si Piliks dow pig-lingan din si Pablu, "Tambagan pad sikan! Ogpanangonan ku ra ikow kog makahigajun ad."

²⁶Masabid din igpatawag si Pablu dow ogpag-uboy-uboy kandin su ogpasasagad kandin ko ogbogajan ni Pablu to saapi. ²⁷Pogkaponga to daruwa no tuig, pigsokolihan si Piliks ni Pursiyu Pistu to pogka Gubirnadur. Su ima ni Piliks ko

ogkasaja-an kandin to mgo Hudiyu, pigpabay-anan din si Pablu diya to pirisuhan.

Nigpa-aput si Pablu to Impiradur

25

¹Kunto-on, nigsokoli ka bag-u no Gubirnadur no si Pistu to Prubinsia to Hudiya. Poglaboy to totowu no arow Nig-andiya kandin to Hirusalim likat to Sirya.

²Insaysay diya to kandin to mgo agaon to Pari dow mgo panguu to mgo Hudiyu ka sumbung pad ki Pablu. Nangamuju kandin ³no igpaliku si Pablu diya to Hirusalim. Di pigsasabutan dan mana-an nog babanganan dan si Pablu diya to daan su oghimatajan. Nigtabak si Pistu, "Diyad on suga si Pablu to pirisuhan to Sisarya. Kona ad oglaguy dini su magaan a ra ogliku diya. ⁵Kaling ipaduma now ka panguu now diya now on isumbung ko duon mado-ot no pighinang din."

⁶Subra nangka simana ka pog-ugpa ni Pistu diya to Hirusalim, pogkaponga nigliku kandin diya to Sisarya. Pogkabukas nig-andiya kandin to Maghusajay dow nigsugu nog pasooron si Pablu. ⁷Pogsood ni Pablu piglilibongan kandin to mgo Hudiyu no likat to Hirusalim. Dow hahan-inan ka pigpan-ikagi ran no mgo mabogat no sumbung no kona dan man gani ogkapamatu-uran. ⁸Nangatarongan si Pablu no kagi rin, "Wara a makaliras to pano-osan to mgo Hudiyu, dow timplu. Dow to Impiradur to Ruma." ⁹Su ogkaliyagan ni Pistu no ogsaja-on kandin to mgo Hudiyu pig-insa-an din si Pablu, "Kaliyagan nu buwa nog andiya to Hirusalim dow diya kud oghusaja soi purublima nu?" ¹⁰Nigtabak si Pablu, "Soi ad kani nigtingdog to Maghusajay to Impiradur, dow kani ad on angajan nog hukumi. Wara nahinang ku no saa to mgo Hudiyu, nama-anan nu soi. ¹¹Ko nakaliras a to pano-osan

angajan a nog pahilu-hilu on to kamatajon, ogdawaton ku di ko wara kamatu-uran ka mgo sumbung dan batuk kanak, kona a angajan nog pahilu-hilu on dan to kamatajon. Kaling ogdangop ad suga diya to Impiradur to Ruma." ¹²Nakig-uboy-uboy dajun si Pistu to sakup to Maghusajay din, pogkaponga nig-iling kandin ki Pablu, "Su ogdangop ka man to Impiradur, igpa-andiya ku ikow kandin."

Impa-atubang si Pablu diya ki hari Agripa

¹³Pogkaponga to pila no arow, nigtirow si hari Agripa. Dow ka hari rin no si Birnays su ogkalyagan dan ogpanumbaaqi si Pistu no gubirnadur. ¹⁴Pogtirow ran diya pigbatbatan ni Pistu ka hari to kasu ni Pablu nig-iling kandin, "Duon pinirisu dini no imbilin nauna to Gubirnadur no si Piliks. ¹⁵Pog-andiya ku to Hirusalim, soi no otow insumbung kanak to mgo labow toa mgo Pari dow ka mgo panguu to mgo Hudiyu. Nangamuju kandan kanak nog hukuman kud kandin dow'g logparan.

¹⁶Pignangonan ku kandan no kona no batasan to Rumanhon no oglogparan ka inggad hontawa no wara pad maka atubang duon to imsumbung kandin, dow wara pad gani bogaji to higajun nog katabak din ka mgo sumbung kandin. ¹⁷Kaling nigliku kandan nigduma dini to Sisarya. Wara ad iyan moglangan, pogkamabukas impa-atubang ku kandin diya to Maghusajay. ¹⁸Nangon ku ko nokoy on ka amani no igsawoy kandin, di aman no naka'g atubang on kandan, wara mana-an igkasumbung dan kandin. ¹⁹Iyan da ungud dan ogka-aw-apuwi mahitongod da to tinu-uhan dan dow mahitongod to saboka no otow no pigngaranan ki Hisus. Patoy on soi no otow, di ojow pad ni Pablu bubuhi kandin. ²⁰Wara ku mama-ani ko nokoy ka angajan nog hinangon ku to soi no kasu, kaling pig-insa-an ku si Pablu kog kaliyag kandin og-andiya to Hirusalim

su diya kud oghusaja ka kasu. ²¹Di nigtabak siPablu no igdangop din on ka kasu diya to Impiradur dow ka Impiradur on lagboy kag husoy. Kaling ka pigbantajan ku kandin taman to iakahatod ku kandin diya to Impiradur." ²²Nig-iling si Agripa diya ki Pistu, "Kaliyag a nog paminog to soi otow." Nigtabak si Pistu, "Ho-o, ogkarinog nu asoom kandin."

²³Pogkamabukas nig-andiya si Agripa dow si Birnays dow mabantug no pogtiriow ran duma ka mahan-in no mgo otow dow agaon to mgo sundawu dow mgo tinahuran no mgo otow to Siyudad. Dow nig-andaa si Pistu nog pasooron si Pablu. Aman no siyad on to sood si Pablu, ²⁴Nig-iling si Pistu, "Hari no Agripa dow iyu no kani tibo to soi kunto-on, soi ka otow no insumbung kanak to mgo Hudiyu dini to Sisarya dow diya to Hirusalim. Nigpangiyak pad kandan nog hitajan soi no otow. ²⁵Di sumaa to pogsusi ku wara na-aha ku no hinong dan no angajan kandin nog hukuman to kamatajon, di aman su ogdangop kandin to Impiradur, nighukum a no igpahatod kandin diya to Impiradur. ²⁶Di wara igkasulat ku siya to Impiradur ko manya to igpahatod kandin diya. Kaling impa-atubang kandin iyu dow labi on ikow Hari Agripa, dow pogpongahi ta to pogsusi ka kasa rin duon on igkasulat ku. ²⁷Su kona ogka baoy no iogpahatod ku ka saboka no pirisu diya to Impiradur ko kona og ka klaru ka sumbung batuk kandin."

Nangatarongan si Pablu diya to atubangan ni Hari Agripa

26 ¹Nig-iling si Agripa diya ki Pablu, "Sigi pigtugutan ka to pogpangatarongan." Kaling niglarawan si Pablu. Nig-ikagi kandin, ²"Hari no Agripa, marojow su

ogpaikagihon a to pogpangatarongan kani to atubangan nu mahitongod to tibo no sumbung to mgo Hudiytu batuk kanak. ³Labi on su paid-paid ka amani to tibo no mgo tumanon dow ka ungud og-a-aw-apuwi to mgo Hudiyu. Kaling nangamuju a noi kog kabaoy, paminogi now kag ikagihon ku.

⁴"Nama-anan to mgo Hudiyu ko nokoy ka pogkaotow ku sukad pad to pogka bata ku diya to kanak no Lunsud dow diya to Hirusalim. ⁵Ko og-ikagi pa kandan to tutu-u, nasiyantahan dan lagboy sukad pad nauna, sakup toa mgo Parisiyu no iyan ka pinaka pina no panong to mgo tinu-uhan to mgo Hudiyu. ⁶Dow kunto-on kani a to Maghusajay, pighukuman su nigpasasagad a no ogtumanon to Diys ka insa-ad dini to mgo gin-apuan doy. ⁷Kanami no sampuu dow daruwa no tribu nigpasasagad nog katuman iyan soi. Kaling ma-arow dow marukilom pigsimba doy ka Diys. Dow Harii Agripa, tongod to pogtu-u ku to sikan, insusumbung a to mgo Hudiyu. ⁸Dow iyu no mgo Hudiyu, manya man to kona kow ogtu-u no ka Diys ogmakabanhaw to patoy?

⁹"Nauna kanak lagboy ka nigdoromdom no kinahanglan nog hinangon ku ka tibo dowka ogkakablang ku ka nagrahan ni Hisus no matig-Nasarit. ¹⁰Iyan soi pighinang ku nauna diya to Hirusalim. Pinabaja to katongod no imbogoy kanak to mgo labaw to pari, hahan-inan ka mgo tumutu-u no impapisu ku. Dow pogkahuugi to kamatajon, nig-ujun a ra-an. ¹¹Masabid a og-inandiya to simbahan to mgo Hudiyu su ogpangahaon ku kandan, dow oglogparan kandan dow ogpogosan no ogmak-ikagi to maro-ot ki Hisus su naangut-langutan ad iyan kandan, nakatirow-tirow a diya to diriyuan no maganob no ugpa-an no ungud ogpahilu-hilu kandan."

Pigbatbat ni Pablu ko nig-omonu rin to pogkiyaa ka Magbabaja

¹²"Iyan soini ka ingka-andiya ku to Damasku no duon daa no sulat no likat to labaw to mgo Pari. Ka sikan no sulat nigbogoy kanak to katongod dow insulat da-an ko nokoy ka oghinangon ku ko diya. ¹³Moong-oong no maudtu sikan, Hari Agripa, kamuu a'g hipanow duon nigsimag no likat to langit no maajag pad kona to sog a no nigbandog to naka-libong kanak dow to mgo duma ku. ¹⁴Nangatu-ad koy diya to pasak dow duon narinog ku no inikagihan no Hibru no nig-iling kanak, 'Sawlu, Sawlu! Manya to pigpahilu-hilu a nu? Pigpahilu-hilu nu ka pogka otow nu. Angod da to naka pakduu ka to mahait no kaju. ¹⁵Nanginsa a, 'Magbabaja, hontawa ka man?' Nigtabak ka Magbabaja, 'Iyan a si Hisus no impahilu-hilu nu. ¹⁶Bangun dow tindog. Nigpa-aha a ikow su nigpili ku ikow nog kahinang no sugu-onon ku. Ipamatbat nu to duma ka mahitongod to pogpa-aha ku ikow kunto-on, dow ka ignangon ku ikow ko kagan-u. ¹⁷Lipwason ko ikow likat to mgo Hudiyu dow kona no mgo Hudiyu. Igpa-andiya ku ikow to kandan ¹⁸dow ka ogka-alimadmaran kandan, dow ka oglagoy kandan diya to karigloman dow ogmakahalin to ma-awang, likat to gahom ni Satanas dow ogdani kandan to Diyus. Dow pinabaja to pogtu-u ran kanak ogkapasaylu ka mgo saa dan. Dow ogkasakup on kandan duon to mgo imbugti to Diyus no mgo sakup din.

Pigsasaysay ni Pablu ka nahinang din

¹⁹"Kaling, Hari Agripa, pigtuman ku ka impa-aha kanakon likat to langit. ²⁰Tawtaga-ay nigpangudling a diya to Damasku dow diya to Hirusalim. Likat to Hirusalim pigligbut

ku ka Gibanwahan to Hudiya, dow pig-andiya-an ku da-an ka kona no mgo Hudiya. Pig-udlingan ku kandan no kinahanglan no oghuraa to mgo saa dan dow ogdani to Diyus, dow igpa-aha dan pinabaja to binuhatan no tutu-u ka poghuraa ran.

²¹Iyan soi hinongdan no pigdakop a to mgo Hudiya diya to timplu su og-amos-amoson a ran oghimataji. ²²Di pigbuligan a to Diyus pailing kunto-on no arow. Kaling kani a to soini dowka igkabat-bat ku to tibo, to mgo tinahuran dow kona, ka innangon tagna to taga-ilagan to Diyus dow si Muysis no ogkatuman: ²³no ka Kristu kinahanglan no igduwagid to bajad dow ogkamatoy. Dow ogkahinang no tawtagna-ay no ogkabanhow likat to kamatajon dow ka ogmakatang-ow to mgo Hudiya dow kona no mgo Hudiya."

²⁴Kamuu pad og-ikagi si Pablu, nigbansagon si Pistu, "Pablu, naangog kad! Napaabihan kad to ka-agsob kaling ka naangog kad!" ²⁵Nigtabak si Pablu, "Tinahuran no Pistu, wara a maangog. Tutu-u ka ogkanangon ku dow matul-id ka karom-domanan ku. ²⁶Nama-anan soi ni Hari Agripa. Kaling wara a maharok to pog-ikagi kandin. Namas-masan ku iyan no nama-anan din soi tibo, su wara makahobong soi. ²⁷Hari Agripa, nigtu-u ka buwa to ognangonon to mgo taga-ilagan to Diyus? Nama-an a no ogtu-u ka." ²⁸Nigtabak si Agripa, "Atuk ko nigdorom-dom ka nog kawomu-lomu anu nog kahinang no Kristuhanon." ²⁹Nigtabak si Pablu, "Maga-an man dow ko mawugoy, ka pog-ampu ku to Diyus no kona no ikow ra ko kona ka tibo da-an no naminog kanakon kunto-on nog kahinang no mgo Kristuhanon no angod ku, wara labot to soini pogkaprisu ku."

³⁰Dajun nigtindog ka Hari, ka Gubirnadur, si Birnays, dow ka tibo no naman-amut diya. ³¹Aman no naman-guwa on kandan,

naman-iling kandan, "Wara maro-ot no nahinang to soi no otawa no angajan no oghukuman dow oghimatajan." ³²Nig-iling si Agripa ki Pistu. "Aman ko kona pa kandin ogdangop diya to Impiradur, kabawuy on poron kandin no ogsabokan."

Pog-andiya ni Pablu to Ruma

27 ¹Aman no naujun on kandan no ogpahipanawon koy on pailing diya to Italya, indihaa ran si Pablu dow ka mgo duma rin no pinirisu diya ki Hulyu. Soi si Hulyu kapitan to mgo sundawu no Rumanhon no pigngaranan to panong/batalyun to Impiradur." ²Dajun, diya to Sisarya duon saboka no barku/luwananan diya to dagat no likat to Adramitiyu no lumilikat pailing diya to du-unganan to Gibanwahan to Asya. Iyan doy sikan pigluwanan. Nigduma kanami si Aristarku no matig-Tisalunika no sakup to Gibanwahan to Masidunya. ³Pogkabukas to sikan nigdu-ung koy diya to Sidun. Pigsakasaka si Pablu ni Hulyu. Pig-ujunan din si Pablu no ogpanumbaoy diya to mgo kiyaa rin dow ka ogkabuligan kandin to mgo kapahitan din. ⁴Likat to Sidun nigdahipag koy dow nigliput koy diya to dibaoy to puu to Sipri no ogmaka-ipoo to kaamag, su ogkasugang/kasawung-sung doy ka kaamag. ⁵Pigdahipag doy ka dagat no longod to Silisya dow Pampilya dow nigdu-ung koy diya to Mira no sakop to Gibanwahan to Lisy. ⁶Naka-aha diya ka kapitan no si Hulyu to barku no likat to Alihandriya no lumilikat on pailing diya to Italya, kaling impahalin koy rin diya.

⁷Hihinajan ka pogdahipag doy sood to pila no arow, maogon on iyan amani taman to naka-dani koy to mapono no ugpa-an to Ginidu. Aman su ogkasugang/kasawung-sung koy to kaamag kona koy on ogmakadahus diya to ogpailingan doy. Kaling dini koy on nigliput to puu to Krita no ogmaka-ipoo to

kaamag dow naka-baja koy to dani to Salmun. ⁸Nagingkilid koy puli, anlogosa koy makatirow diya to banwa nog ngaranan to Marojow no du-unganan." Dani to mapono no ugpa-an to Lasya.

⁹Nahiwhina koy diya taga-od/hangtod to nasa-aban koy diya to maro-ot no timpu no darahipagay, su naponga on ka arow to pogsaang to pogko-on. Kaling nig-ikagihan ni Pablu ka mgo duma roy, ¹⁰"Nig-ongod-ongod ku no makamumuwa ko ogdajun ki pad, kona no ka impanluwan da ka ogka-tabug dow ka barku ra ka ogkawonod ko kona atuk ko ogmaka-unung kid." ¹¹Di kona ogpaminog ka kapitan to sundawu to sambag ni Pablu su iyan din ogpaminogon ka kapaitan to barku dow ka tagitu-un to barku. ¹²Su ka du-unganan diya kona no marojow no ogpasalingoran ko tingbagyu, ka kahan-inan no duma roy nig-ujun no ogdajun koy su atuk ko ogmakatirow koy pad diya to Pinisi su diya pad ogtaga-od ogpasalingod. Ka Pinisi iyan ka du-unganan to barku diya to Krita no duon marojow no pasalingoranan ko tingbagyu.

Ka pogbagyu diya to dagat

¹³Aman no mahinoy on ka oghoros no kaamag likat to babagan-kalintu-u, nigdorom-dom ka mgo duma roy no ogkabawuy on no ogdahipag koy. Kaling pigbatun dan ka palibatu dow nigdajun koy mogpagingkilid to puu to Krita.

¹⁴Kawugoy-logoy, nighuros ka mahagbot no kaamag no likat to baabagan gibang, no napu-un diya to puu to Krita. ¹⁵Aman no horosan koy to bagyu, kona koy on ogmakasagang-sang, kaling nigpa-anud-anud koy on puli baagaron doy on ko hondo koy igsaraa to bagyu. ¹⁶Nakapasalingod koy ubag to maintok no diya koy on dapit to baabagan gibang to puu to

Kauda. Inggad mawugon on ka lasa roy/ka-ahot doy ra nan, ingkaluwan doy pad to barku ka luwananan no manga-intok dow ka kona ogkaro-ot. ¹⁷Aman no ingkangaluwan on, indigon doy on impanhikot diya to barku. Aman su ogkaharok kandan ko ogsaraa ka barku to pantad dani to Libya, nig-us-us dan ka layag dow nigpa-anud-anud. ¹⁸Nigparajun pad ka bagyu, kaling pogkabukas nigpu-una-an dan on to pogpanabug diya to dagat ka mgo impanluwan to barku. ¹⁹pogkasunu da na-an no arow, iyan on ka mgo kahimanan to barku ka pigpanabug dan. ²⁰Sood to pila no arow no warad iyan mogbowat-bowat ka sogad dow ka mgo bitu-un, warad iyan totoo/tawtawo-on ka bagyu. Kawugajan wara koy on mog-iman no ogkalipwas koy pad.

²¹Pila no on no arow ka warad iyan mamakako-on ka mgo otow, kaling nig-iling si Pablu diya to kandan, "Mgo su-un, ko naminog kow pa poron kanak no kona ki pad oglikat diya to Krita, kona ki poron ogkanga-iling to soi igduwagid ki to bajad. ²²Kunto-on igbaghid ku iyu no paginbubuut kow su wara da ogkamatoy ita. Iyan da ogkaro-ot soi barku. ²³Ganin no marukilom ka Diyus no nigtagon kanak dow pigtu-uhan ku nigsugu ka diwata rin dini to kanak. ²⁴Nig-ikagi kandin, 'Pablu kona kag panaguharok. Kinahanglan no og-dangop ka diya to Impirador to Ruma. Dow tongod to kahid-u to Diyus ka tibo no duma nu ogkalipwas tongod ikow.' ²⁵Kaling mgo su-un, kona kow on panaguharok, su nigsalig a to Diyus nog tumanon din ka innangon din kanak. ²⁶Di igsaraa ki diya to songo puu."

²⁷Aman no ikasampuu on dow upat no karukiloman no pogka-anud doy to bagyu diya to dagat to Miditiranyu, mgo tonga on sikan to karukiloman, pig-ongod-ongod to nigdumaa to

barku no marani koy on diya to siwsibian to dagat. ²⁸Kaling pigtogkad dan ka dagat dow nama-anan dan no duon kawa-an no dupa no karawuman. Pogkaisog-isog pitogkad dan da na-an isaba no mgo sampuu da na-an dow lima no dupa. ²⁹Aman sug kaharok kandan ko ogsaraa to batu, pigtabug dan ka upat no palibatu diya to talikuran to barku. Dow nig-ampu kandan no ogkabukas on. ³⁰Ogdorom-dom poron no oglaguy /ogtahaw ka nigdumaaa to barku. Kaling pigtuntun dan ka maintok no luwananan diya to dagat, dow nigpama-aw-amangukuwa/ nigpamulamu-lamu no puli ogpanabug to palibatu diya to ugbus/lobut. ³¹Di nig-iling si Pablu duon to kapitan to mgo sundawu, "Ko ogmanlaguy/ogtahaw ka mgo nigdumaa to barku kona kow on ogkalipwas." ³²Kaling pigpang-gotas to mgo sundawu ka lubid no impanhikot duon to maintokay no luwananan dow pigpabay-anan no ogka-anud.

³³Aman no ogkabukas-bukas on, pigpogos kandan tibo ni Pablu no ogmakako-on. Nig-iling kandin, "Daruwa on no simana ka pogpasasagad now no ogsigkon ka bagyu, dow wara kow on iyan makabawu-bawu makako-on. ³⁴Kaling ka ko-on kow pad dow kag mangadoson kow su wara inggad saboka iyu nog kamatoy/kamuwa." ³⁵Pogkaponga ni Pablu to pog-ikagi to sikan, nigpurut kandin to pan dow diya to kabaknaan to tibo nigpasalamatan din to Diyus. Dow pigpanibag-tibag din dow nigko-on. ³⁶Nabaghid kandan /nabagahan ka ginhawa ran dow nigko-on. ³⁷(kanami no namanluwan to barku daruwa koy no gatus dow kapituwan dow unom tibo.) ³⁸Aman no namakako-on on ka tibo dow nangahantoy on, pigpanabug dan diya to dagat ka mgo impanluwan no trigu dow ka ogkahagkapan ka barku.

Ka pogkawagkas to barku

³⁹Pogkasoom, wara mama-ani to mgo suguanon to barku ko nokoy puu-a ka nadu-ungan doy, di duon na-aha dan no naka hobong no nakasiyak no dagat no duon siwsibian, naujun kandan no diya igpadu-ung ka barku. ⁴⁰Kaling pigpanlogtas dan ka mgo lubid no impanhikot to mgo palibatu. Pigpamadbab dan da-an ka mgo lubid no inhikot to timun. Dow pigpanlindog dan ka layag diya to ugbus dow ka iglajap/igdopung kandan pailing diya to siwsibian. ⁴¹Di warad on makatirow diya to siwsibian, nigsaraa ka barku dow nigsab-it ka ugbus {din}, tagaod/ananoy on ogkawagkas ka lobot to barku tongod to mahagbot no pogdaapi to luwak to dagat.

⁴²Panhimatajan on poron to sundawu ka tibo no prisu dow warad ogmakapamaas pailing diya to kilid dow wara ogmakaaguy. ⁴³Di pigsaparan kandan to kapitan dan su ogkaliyagan din no oglipwason si Pablu. Impamakawas din ka tibo no ogkama-an ogpamaas, pailing diya to kilid. ⁴⁴Ka kona ogkama-an ogpamaas, puli on ogpamang-gagamba to bahan dow ka mgo himan to barku no naman-lotow. Iyan sikan pighinang doy, dow tibo koy nakatirow diya to siwsibian no wara manga-omonu.

Diya to Malta

28

¹Aman no nakalingkawas koy on to sikan makamumuwa, nama-anan doy no sikan no puu pigngaranan to Malta. ²Masima-sima kanami ka mgo tagbanwa diya. Aman su ting-amihan/tilondong dow pinanhagsii koy, naman totomog kandan dow pigtaanu koy

ran on iyan. ³Namurut si Pablu to kaju no totomogay no songo bogkot. Di aman no itomog din on ka kaju, hignali niglogwa ka oglogot no uwod likat duon to intomog no kaju su napasuan, dow pigkagat ka bowad din. ⁴pogka-aha to mgo tagbanwa no pig-ongotan to uwod ka bowad ni Pablu, naman-iling kandan, "Mangingimatoy mana-an iyan soi no otawona. Nakalipwas kandin to dagat di kona ujun ka nigbaja no ogkabuhi pad kandin. ⁵Di insawilik da ni Pablu ka uwod diya to hapuy dow wara kandin ma-amonu. ⁶Nigpasasagad ka mgo otow ko oglobag ka bowad ni Pablu dow ogkabantang/ogkapood/ogkatuad kandin dow ogkamatoy. Di puli on kandan ogkapora ko ogpasasagad di kona man ogka-omonu si Pablu, kaling naisab ka ginhawa ran dow nig-iling, "Songo diyus on kandin!."

⁷Si Publiyu ka ngaran duon to panguu to sikan no banwa. Marani ra ka pasak din duon to pighapitan doy. Pigtanuu koy rin on iyan diya sood to totowu no arow. ⁸Nakataga-od da-an to narawuhan ka amoy ni Publiyu. Ogdaton kandin dow ogu-uta dow ogmakaindos to langosa. Kaling nigsood si Pablu diya to sinabong to amoy ni Publiyu dow nig-ampu. Dow pigdap-on din dajun kauli-i kandin. ⁹Tongod to sikan, ka tibo no mgo magindawuhanon to sikan no puu pigpanduma ran diya to kanami dow nangaulian da-an kandan. ¹⁰Dogi ka mgo hinukhow no imbogoy ran kanami, dow aman no oglikat koy on pighatoran koy pad to mgo kakuwangan doy diya to barku.

Likat to Malta pailing diya to Ruma

¹¹Aman no totowu koy on no buwan diya to Malta, nigluwan koy to barku no nigpasalingod diya no timpu tingbagyu. Likat

soi no barku to Alihandriya. Ka marka diya to duung/ugbus din iyan ka larawan to nig-i-iping no diyus. ¹²Likat to Malta nigbaja koy to maganob no banwa to Sirakusa dow nakatowu koy pad diya. ¹³Likat diya nigpa-ajun-ajun koy pailing diya to Rihiyu. Pogkabukas nighoros ka kaamag no likat to baabagan-kalintu-u, dow sood to daruwa no arow naka tirow koy to mapono no banwa to Putiyuli. ¹⁴Nangaambagan doy diya ka mgo tumutu-u. Nangamuju kandan no og-ugpa koy pad diya to sood to songo-simana. Pogkapinga, nigdajun koy diya to Ruma. ¹⁵Pogkarinog to mgo tumutu-u {diya} to Ruma no nakatirow koy on, pigtagbu koy ran diya to puru ni Apiyu dow diya to tris Tabirnas. Aman no pogka-aha ni Pablu to mgo tumutu-u nigpasalamat kandin to Diyus dow nigmabaga ka ginwaha rin.

Diya to Ruma

¹⁶Pogtirow doy diya to Ruma, pinagbo-ot si Pablu ko inggad hondoig ogkaliyag og-ugpa, no duon saboka no sundawu no igpabantoy kandin. ¹⁷Aman no nakatowu on impamatawag ni Pablu ka mgo panguu to mgo Hudiyu to Ruma. Aman no nahimun on kandan, nig-iling si Pablu, "Mgo kasu-unan, inggad wara nahinang ku no maro-ot to angod ta no mgo Hudiyu dow wara a makaliras to tumanon to mgo gin-apuan ta, pigdakop aran diya to Hirusalim dow insusumbung a ran diya to Gubirnu to Ruma. ¹⁸Pigsukit-sukit a to mgo katongoranon/upisyal/duon katongod no Rumanhon, di pogkama-ani ran no wara nahinang ku no maro-ot no angajan a no oghukuman/oghuugan to kamatajon, ogsabukan a ran on poron. ¹⁹Di pigbaabagan to mgo Hudiyu, kaling napogos a nog dangop to Impiradur, inggad poron wara saa/sajop ku pigbotangbotangan/tobotobo-an a to mgo karumahan ku no

mgo Hudiyu. ²⁰Kaling impamatawag ku iyu, dow kag makaikagi a iyu, nabaku-a to sagikaa kunto-on su ogtu-u a to ogkaiman to mgo Hudiyu."

²¹Nig-iling kandan ki Pablu, "Wara koy makadawat to surat likat to Hudiya mahitongod ikow. Ka mgo karumahan ta no mgo Hudiyu no nigtirow dini likat to Hirusalim wara da-an batbaton dan no maro-ot mahitongod ikow. ²²Di ogkaliyagan doy ra-an ogkarinog ko nokoy ka ikow no igkaikagi, su narinog /nasulimanan doy to inggad hondo no banwa no maro-ot kun ka panong/punduk no pig-amutan nu."

²³Kaling nigsasabut-sabut kandan ko nokoy arawa ka ighimun dan. Pogkatuman to arow no pigsasabutan dan mawmahan-in pad ka otow no nig-amut kona duon to tawtaga-ay/nauna no kahimunan diya to baoy no pigdatongan ni Pablu. Likat to masoom pailing to marukilom ka pogsaysay ni Pablu.

Impasabut din kandan ka mahitongod to poghari to Diyus, dow imbatbat din kandan ka mahitongod ki Hisus pinabaja to mgo sinulat ni Muysis to pano-osan dow to mgo sinulat to mgo taga-ilagan to Diyus dow ka ogtu-u kandan ki Hisus.

²⁴Namanu-u ka duma to pig-ikagi rin di ka duma wara mogtu-u. ²⁵Aman su kona kandan ogkangaujun, naman-uli on kandan. Di aman no wara pad kandan makahipanow, duon pad pig-ikagi ni Pablu kandan. Nig-iling kandin, "Warad iyan masajop ka pig-ikagi to Bala-an Ispiritu to mgo gin-apuan ta pinabaja ki Isayas no tagailagan to Diyus. ²⁶Su nig-iling kandin,

'Andiyai nu dow nangoni sikan no mgo otawona no inggad ogpaminog on iyan kandan kona kandan ogmakasabut, dow inggad ogloongloong on iyan kandan kona kandan ogmaka-aha, ²⁷Su

mangahunit ka ginhawa to sikan no mgo
otawona. Pigsagpongan dan ka mgo talinga ran,
dow pigpiyong dan ka mgo mata ran. Su ko wara
pa kandan mog-i-iling, ogmaka-aha poron ka mgo
mata ran dow ogmakarinog ka mgo taling ran,
dow oglaboton dan ko nokoy ka tutu-u, dow
ogparani kandan kanak, dow ogbangkuwasan ku
kandan.' "

²⁸Nig-iling pad iyan si Pablu, "Ogkaliyagan ku ra-an no
igbatbat iyu ka pangudlingon to Diyus mahitongod to
kalipwsan no impangudling on to kona no mgo Hudiyu; Dow
namaminog on iyan kandan." ²⁹[Pogkaikagi to sikan ni Pablu
namanuli ka mgo Hudiyu no nigpama-aw-apuway kandan.]

³⁰Sood to daruwa no tuig ka pog-ugpa ni Pablu diya to baoy
no pig-abangan din. Dow pig-awubang din ka tibo no
nigpasaka kandin. ³¹pigpan-anad din kandan mahitongod to
poghari to Diyus dow mahitongod to Magbabaja no si Hisu-
Kristu. Warad iyan kaharok din to pogpan-anad dow wara
nigbaabag kandin.

